

TUNKU ABDUL RAHMAN PUTRA AL-HAJ -
DR. MAHATHIR MOHAMAD:
KE ARAH PERPADUAN



**TUNKU ABDUL RAHMAN PUTRA AL-HAJ -
DR. MAHATHIR MOHAMAD:
KE ARAH PERPADUAN**

IDRIS TULIS

FORARI BUSINESS & INDUSTRIAL CONSULTANT
SUITE 105, GROUND FLOOR,
WISMA CENTRAL, JALAN AMPANG,
50450 K. LUMPUR

**TUNKU ABDUL RAHMAN PUTRA AL-HAJ -
DR. MAHATHIR MOHAMAD:
KE ARAH PERPADUAN**

© Idris Tulis
Cetakan Pertama November 1990

FORARI BUSINESS & INDUSTRIAL CONSULTANTS
SUITE 105, GROUND FLOOR,
WISMA CENTRAL, JALAN AMPANG,
50450 K. LUMPUR.

HAKCIPTA TERPELIHARA.

*Tidak dibenarkan mengeluarkan-ulang dalam apa juga bentuk dan
dengan apa juga cara, baik elektronik, fotokopi, mekanik
maitu-pun lain-lain, mana-mana bahagian artikel/
ilustrasi, isi kandungan buku ini sebelum
mendapat izin bertulis daripada
IDRIS TULIS*

M
320-09595
17R

M

10 APR 2003

1103423

*Perpustakaan Negara
Malaysia*

PENGHARGAAN

Saya ingin merakamkan penghargaan saya kepada nama-nama yang tercatit di bawah ini:

1. Tuan Haji Isa bin Ali (*selalu membaca doa*), Tuan Haji Mohd Amin bin Hj Mohd Yassin, Allahyarham Tuan Haji Ghani bin Abd Rahman (*semoga Allah mencucuri rahmat ke atas rohnya*), dan lain-lain dalam jemaah Madrasah Ampang Jaya, Selangor, kerana pengertian mereka dan turut sama mendoakan agar usaha-usaha KE ARAH PERPADUAN menjadi kenyataan. Tidak lupa juga kepada Puan Kamariah (Mak Mai) bt Mohd yang ringan tangan di dapur dan melayan tetamu yang datang ke rumah kami.

2. Cik Maslinda binti Mohd Yusoff, Setiausaha peribadi saya, yang telah bekerja dengan penuh dedikasi dan tidak jemu-jemu menaip manuskrip ini berulang-ulang kali.

3. Penghargaan khas kepada Sdr. Ahmad Nadzir Amir (*secara kebetulan rakan sedarjah di sekolah Victoria Institution, Kuala Lumpur pada tahun 1953 dahulu*) yang telah banyak membantu dari awal sehingga terbitnya buku ini. Dengan pertolongan beliau maka dapatlah saya menyiapkan buku ini dalam masa tiga minggu (8 hingga 26 November, 1990).

Akhirkata, sekiranya terdapat kesalahan di sana-sini sama ada dari fakta, urutan peristiwa dan tersalah kata, saya memohon maaf terlebih dahulu. Itu adalah kerana kesuntukan masa untuk menulis buku seumpama ini dengan berdasarkan ingatan semata-mata. Sekiranya buku ini mengalami ulang cetak akan diusahakan supaya kesalahan-kesalahan itu dapat diperbetulkan. Juga sekiranya ada nama orang-orang yang telah menyumbangkan jasanya tetapi tidak disebutkan, itu bukanlah dilakukan dengan sengaja.

Dengan terbitnya buku ini adalah diharapkan semoga "yang baik tetap memperolehi kemenangan" dan "kebatilan akan hapus dan kebenaran akan muncul".

DEDIKASI

Kepada

Kedua orang-tua saya yang dikasihi
Allahyarham Haji Tulus bin Fakeh Muda (Sutan Melenggang)
dan bonda saya
Hajah Asmah bt.Raja Melintang
kedua-duanya telah mengajar saya mengenal erti kehidupan.

Isteri saya
Ramlah bt. Abdul Moktik
yang faham tentang perjuangan saya

Kepada anak-anak saya
Fouad, Rafiq, Rizal dan Nor Idrila
yang kerap menuntut kasih sayang seorang ayah
sedangkan ayah mereka masih dalam perjuangan
moga-moga mereka mengerti saya lakukan semua ini
demasi depan yang gemilang

• Kepada anak-anak tersayang
serta generasi mereka kini dan masa datang
inilah aku serukan kepada kalian
di tanahair Malaysia tercinta
Berfikirlah *KE ARAH PERPADUAN*
& binalah kehidupanmu gemilang
tanpa sengketa, angkara bencana membawa perang
agar Malaysia kita maju ke depan
dan rakyat hidup makmur
dan bersatupadu.

Kepada semua yang tersebut
& kepada pemimpin-pemimpin
khususnya semua ahli UMNO
kepada bangsaku Melayu dan rakyat Malaysia
Aku mendedikasikan bukuku ini
untuk ditatapi dan dihayati
laksanakan apa dikira baik
buat kita bersama
demi cinta kepada agama, bangsa dan negara
Itulah seruan & harapan rakyat
mandat yang diberikan
binalah kehidupan kami semua
menuju *KE ARAH PERPADUAN*
antaranya tugas yang kau harus laksanakan!

TUNKU ABDUL RAHMAN PUTRA AL-HAJ -
DR. MAHATHIR MOHAMAD:
KE ARAH PERPADUAN



PENDAHULUAN

Terlebih dahulu saya mengulurkan sepuluh jari memohon berbanyak ampun dan maaf kepada Yang Teramat Mulia Tunku Abdul Rahman Putra Al-Haj dan Yang Amat Berhormat Dato' Seri Dr. Mahathir Mohamad kerana saya telah menggunakan kedua-dua pemimpin itu sebagai hiasan kulit buku ini. Ini bukanlah maksud mencari publisiti untuk diri saya sendiri (kerana saya berdiri di tengah-tengah kedua-dua pemimpin agung itu) dan jauh sekali hendak merendah-rendahkan atau meninggi-ninggikan mana-mana pihak. Sama sekali bukan begitu tujuan saya. Kedua-dua pemimpin yang ada dalam gambar ini adalah pemimpin-pemimpin agung dalam zamannya masing-masing. Kedua-duanya saya hormati dan sanjung tinggi. Kedua-duanya juga amat saya sayangi.

Gambar ini digunakan hanyalah sebabkan ia mempunyai sejarahnya yang sangat unik. Tidak terlintas di hati

saya untuk merendah-rendahkan martabat Dato' Seri Dr. Mahathir sebagai seorang pemimpin Melayu yang telah banyak berjasa kepada negara, bangsa dan agama dan membawa banyak pembaharuan dan kemajuan. Tujuan saya ialah hendak menunjukkan satu lagi sifat yang dipunyai oleh Dato' Seri Dr. Mahathir iaitu beliau walaupun sudah mempunyai kedudukan yang tinggi tetapi masih sedia merendah diri sesuai pada orang, tempat dan waktunya. Beliau juga sentiasa bersedia memberikan penghormatan yang sangat tinggi kepada orang yang lebih tua daripadanya bersesuaian dengan adat resam orang-orang Melayu iaitu dengan mencium tangan. Budi pekerti seperti yang ditunjukkan oleh Dato' Seri Dr. Mahathir ini akan membuatkan seseorang itu dipandang tinggi serta dihormati. Ia harus menjadi tauladan kepada generasi muda kita.

Bagi Tunku Abdul Rahman Putra pula, sungguhpun sudah menjangkau usia yang begitu tua, dengan penglihatan yang sudah kabur, lemah anggota badan dan terpaksa dibantu ketika berjalan, namun beliau sanggup berjalan ke muka pintu dengan dipimpin untuk menunggu dan mengalau-alukan ketibaan Dato' Seri Dr. Mahathir Mohamad. Tarikhnya yang tidak mudah dilupakan ialah pada 11 November, 1989. Peristiwanya pula ialah untuk membin-cangkan perpaduan umat Melayu.

Dalam gambar ini terakam sifat-sifat mulia yang terpuji yang ditunjukkan oleh kedua-dua pemimpin Melayu yang teragung. Alangkah baiknya sekiranya ini berterusan buat selama-lamanya. Yang tua dihormati dan yang muda disanjungi.

Dengan maksud itu jugalah saya menggunakan gambar tersebut.

Dalam pada itu saya dengan segala rendah diri merakamkan terima kasih saya yang begitu tinggi kepada YTM Tunku Abdul Rahman Putra Al-Haj, bekas Perdana Menteri Malaysia yang pertama, Bapa Kemerdekaan, Bapa Malaysia dan YAB Dato' Seri Dr. Mahathir Mohamad, Perdana Menteri yang keempat dan Bapa Perindustrian, kerana telah memberi kepercayaan dan penghormatan kepada saya dalam saya menjalankan tugas-tugas serta melicinkan peranan saya yang telah membawa ke arah pertemuan yang bersejarah itu. Saya juga ingin mengucapkan terima kasih kerana kedua-dua pemimpin teragung itu telah sedikit sebanyak menerima pandangan dan rayuan saya tentang perlunya pertemuan itu untuk negara, bangsa dan agama. Dalam saya menjalankan tugas-tugas tersebut sudah tentu saya membuat kesilapan dan kesalahan oleh itu saya dengan penuh ikhlas meminta maaf di atas semua kesalahan saya yang didapati melalui surat-surat dan juga secara lisan.

Saya berharap kandungan buku yang merakamkan segala peristiwa bersejarah ini akan dapat direnungi bersama oleh pembaca-pembaca khususnya orang-orang Melayu dan seterusnya memberi manfaat kepada generasi yang akan datang.

Sekian,

*Kuala Lumpur
November 24, 1990.*

Idris Tulis

BAB 1

SAYA INGIN MENCIPTA PERDAMAIAIN

Saya masih ingat lagi bagaimana saya mula mengambil keputusan untuk mencerahkan fikiran dan perasaan saya di atas kertas.

Malam itu, entah mengapa fikiran saya tidak tenang kerana memikirkan suatu masalah yang amat berat, rumit dan sulit untuk diatasi. Saya melihat diri saya berada di tengah-tengah masalah ini. Saya berasa diri saya begitu kerdil kerana masalah yang saya hadapi adalah begitu besar. Berupayakah saya mengatasinya?

Saya cuba meyakinkan diri; saya melakukan ini semua kerana didorong oleh keinginan yang kuat untuk melihat bangsaku bersatupadu. Hanya dengan bersatupadu sahajalah

sesuatu bangsa itu akan menjadi lebih kuat dan maju serta disegani oleh bangsa-bangsa lain. Saya berusaha ke arah ini dengan hati yang cekal, bersih dan ikhlas.

Sesungguhnya masalah ini membuatkan saya berada di dalam dilema. Dilema saya adalah juga ‘DILEMA MELAYU’ (untuk meminjam nama judul buku Dato’ Seri Dr. Mahathir Mohamad).

Saya bukan seorang oportunist. Kalau saya seorang oportunist, pasti sejak dahulu lagi saya sudah bergiat aktif dalam politik. Sekiranya saya masih muda lagi, saya akan menjadikan politik itu sebagai karier saya, ada kemungkinan saya sudah mencipta nama dalam politik. Kemungkinan juga saya berada di mercu kejayaan. Sedangkan orang yang hanya baru beberapa tahun sahaja menceburkan diri dalam politik, dia sudah berada di mercu kejayaan. Saya mempunyai ramai kenalan yang telah berjaya dalam politik. Saya bercadang menulis tentang kejayaan mereka dalam buku saya yang akan datang.

Saya telah memilih jalan saya sendiri. Politik bukan kerjaya saya. Saya seorang usahawan. Saya ingin mencapai kejayaan dalam perniagaan. Perniagaan adalah periuk nasi saya dan bukannya politik. Saya hanya melibatkan diri saya dalam soal-soal politik tanahair secara tidak langsung.

Memikirkan ini semua membuat saya lemah. Betapa tidak? Saya sedang memikirkan masalah yang begitu sulit dan rumit untuk saya atasi sendirian. Siapakah yang akan turut serta dalam misi suci ini?

Masalah ini bukan untuk orang politik sahaja memikirkannya. Ahli-ahli UMNO, khususnya bangsa Melayu yang mengaku agamanya Islam, boleh dan harus memberikan fikiran dan perhatiannya tentang masalah ini.

SAYA INGIN MENCIPTA PERDAMAIAN

Alangkah baik sekiranya fikiran dan perhatian itu diturutsertakan dengan tindakan yang positif.

Melalui usaha-usaha ini, saya ingin mencipta perdamaian. Saya teringat akan perintah ini: "*Orang-orang Mukmin itu adalah bersaudara. Sebab itu perdamaikanlah antara dua orang saudaramu dan takutlah kepada Allah, mudah-mudahan kamu mendapat rahmat daripadaNya*". (Surat Al-Hudjurat, ayat 10)



To my trusted Idris Tulus a friend and
dedicated worker in the cause
of his people and country. May 14th 1980
Yours regards T B Ramanan

Photo 21/37



Gambar ini sungguh bersejarah tetapi juga menyediakan kerana yang pertama sekali Perdana Menteri yang kedua Allahyarham Tun Abdul Razak tidak ada bersama. Tun Hussein Onn ialah Perdana Menteri yang ketiga juga sudah meninggal kita. YTM Tunku Abdul Rahman Putra Al-Haj, Perdana Menteri yang pertama, tidak lagi berada dalam parti UMNO dan bubar parti telah dikarang oleh Mahkamah dan sekarang menjadi presidat Parti Semangat 46. Dato' Musa Hitam pula telah meletakkan jawatannya sebagai Timbalan Perdana Menteri dan kalah kepada Dr. Ghafar Baba sebagai Timbalan Presiden Parti UMNO lama dan sekurang berada di New York sebagai wakil khas Malaysia ke Bangsa-Bangsa Bersatu. Yang tinggal ialah Dato' Seri Dr. Mahathir Mohamad yang sekarang ini menjadi Presiden Parti UMNO baru.

Gambar yang bersejarah ini diambil ketika mereka menghadiri Pernidangan Agung MCA di Wisma MCA, Jalan Ampang pada beberapa tahun dahulu. Di ketika itulah Dato' Seri Dr. Mahathir Mohamad dengan cara terbuka meminta maaf dari YTM Tunku di atas kesilapan dan kesalahan beliau yang sudah rada terhadap Tunku.

Alangkah gembiranya kita melihat keempat empat pemimpin itu sedang ketawa riang dan zudah tentu ada sesuatu yang dikatakan oleh Tunku ataupun Dr. Mahathir yang membuatkan mereka ini tersenyum lebar.

Beginilah yang diharapkan dari pemimpin-pemimpin kita supaya seniuruh bersatu-pada dan melupakan apa yang berlaku.

Penulis telah bernasih baik benar kerana telah berjaya mendapatkan tandatangan semua pemimpin-pemimpin itu yang diadakan oleh YTM Tunku, Tun Hussein Onn, Dr. Mahathir dan Dato' Musa. Gambar ini telah juga dihadiahkan kepada tiap-tiap pemimpin itu oleh penulis.

Tairanwan
M. Sulaiman
John
Dato'



Gambar yang bersejarah ini diambil di Istana Negara pada 20hb. Julai, 1981 seketika Dato' Dr. Mahathir Mohamad mengangkat sumpah sebagai Perdana Menteri yang keempat dan Dato' Musa Hitam sebagai Timbalan Perdana Menteri dan Menteri Dalam Negeri. Tidak siapa menyangka kedua 2M ini boleh berpecah.

BAB 2

SEGALANYA BERMULA APABILA.....

Pergolakan politik tanahair benar-benar bergolak apabila Dato' Musa Hitam yang pada ketika itu menjadi Timbalan Presiden UMNO lama merangkap Timbalan Perdana Menteri dan Menteri Dalam Negeri Malaysia mengejutkan seluruh anggota UMNO dan seluruh negara apabila beliau membuat keputusan untuk menarik diri dari jawatan-jawatan penting tersebut. Beliau telah memberi lima sebab mengapa beliau membuat keputusan itu. Dalam surat-surat yang ditulisnya kepada Dr. Mahathir, Dato' Musa telah menghuraikan sebab-sebab penarikan diri daripada jawatan-jawatan itu. Di antara sebab-sebab itu ialah "money politics" dan "abuse of power". Ekoran daripada kenyataan beliau

yang mengejutkan itu, satu Majlis Kerja Tertinggi UMNO (MKT) telah diadakan khusus untuk membincangkan isu tersebut. Selepas berbincang dan berbahas selama 6 jam, MKT telah membuat keputusan menghantar empat orang anggota MKT untuk menemui Dato' Musa. Pada ketika itu Dato' Musa sudah pun berada di luar negara, sama ada di Mekah atau London.

Tujuan utama anggota MKT berjumpa dengan Dato' Musa ialah untuk memujuk beliau supaya menarik balik keputusan beliau itu. Empat anggota rombongan yang telah dipilih untuk pergi, antaranya Tan Sri Haji Wan Mokhtar Ahmad, Dato' Ajib Ahmad dan Tan Sri Ngah Talib. Rombongan itu hanya berjaya meyakinkan Dato' Musa supaya terus menjadi Timbalan Presiden UMNO di atas sebab-sebab perpaduan dalam UMNO dan kestabilan negara. Dato' Musa tidak berganjak dengan keputusannya meletakkan jawatan sebagai Timbalan Perdana Menteri dan Menteri Dalam Negeri. Sebelum masalah yang amat mendukacitakan itu berlaku, kita semua tahu bahawa semenjak Dato' Musa dilantik oleh Dr. Mahathir pada 18 Julai, 1981, sebagai Timbalan Perdana Menteri dan Menteri Dalam Negeri dan setelah beliau menang dengan menewaskan Ku Li bagi jawatan Timbalan Presiden UMNO dengan mendapat undi sebanyak 722 berbanding dengan undi 517 yang diperolehi oleh Ku Li. Persahabatan Dr. Mahathir dengan Dato' Musa adalah sangat rapat dan menyenangkan sekali. Berbagai-bagai slogan telah dibuat untuk memperkenalkan mereka. Seluruh rakyat Malaysia berasa sangat lega melihat persetujuan antara mereka yang begitu secocok dan baik sekali. Ada orang menyatakan mereka berdua bagaikan "pinang dibelah dua", iaitu sama kena dan sama padan.

Umur mereka sahaja yang berbeza tetapi mereka tetap saling hormat menghormati. Di mana-mana sahaja mereka ditemui berdua. Saya lihat ada sahaja perkara yang dilakukan oleh salah seorang daripada mereka untuk menarik perhatian orang-orang di sekeliling mereka. Ini diperhatikan oleh orang-orang lain yang turut hadir bersama. Dalam keadaan begini, sudah tentu ada mata yang senang memandang dan ada mata yang merasa iri hati.

Dato' Musa memang terkenal dengan lawak jenakanya yang sering membuat orang ketawa. Beliau sememangnya suka bergurau atau berseloroh dengan kawan dan lawannya. Beliau juga tegas orangnya kerana pernah suatu ketika beliau pernah memberitahu Dato' Seri Samy Vellu supaya jangan campurtangan dalam masalah UMNO. Beliau juga pernah menasihatkan MCA supaya meninggalkan parti Barisan Nasional jika tidak boleh bekerjasama.

Di sinilah agaknya Dr. Mahathir Berasa kesunyian kerana tidak ada orang kesayangannya berada di sisi beliau sebagai tempat 'bermanja'. Sahabat yang sangat beliau percayai itu telah memilih untuk memisahkan diri.

Pernah juga saya mendengar cerita bagaimana rapatnya persahabatan Dr. Mahathir dengan Dato' Musa Hitam. Contohnya, Dato' Musa gemar duduk di kerusi Dr. Mahathir dan "berlagak" kononnya beliaulah Perdana Menteri iaitu ketika Dr. Mahathir ke bilik air. Dr. Mahathir pula tidak ambil kisah atau ambil hati di atas perbuatan rakannya itu. Ini menunjukkan betapa erat sekali persahabatan dan perhubungan di antara mereka berdua. Mereka sangat cocok dan saling faham memahami.

Melihat perhubungan mereka yang intim itu mungkin menyebabkan orang akhbar mencipta gelaran 2M untuk

mereka. Rangkaian nama ini menjadi terkenal di dalam dan luar negara. Apabila Dato' Musa tidak lagi menjadi Timbalan Perdana Menteri tempat yang dikosongkan oleh beliau telah tidak diisi buat beberapa lama. Agaknya Dr. Mahathir masih sayang kepada Dato' Musa dan mengharapkan masalah-masalah peribadi yang berlaku di antara mereka akan dapat diselesaikan dengan cara kekeluargaan. Lagipun, tidak ada perkara yang tidak boleh diselesaikan dan diatasi melalui perbincangan atau mesyuarat. Hal ini memang selalu dilaung-laungkan oleh mereka berdua.

Ekoran dari perletakan jawatan yang begitu tinggi oleh Dato' Musa, maka UMNO telah membuat keputusan mengadakan Perhimpunan Agung UMNO untuk membuat pemilihan pemimpin-pemimpin UMNO yang baru. Sekali lagi Dato' Musa telah membuat keputusan yang mengejutkan. Kali ini beliau telah menyatakan yang beliau akan berganding bahu dengan Ku Li untuk menentang Dr. Mahathir. Maka di sini bermulalah sejarah UMNO berpuak kepada dua kumpulan yang akhirnya membawa perpecahan. Bermula dari situlah, istilah Team A dan Team B wujud dalam UMNO. Dr. Mahathir dan Dr. Ghafar Baba (yang dilantik untuk menggantikan Dato' Musa) serta pengikut-pengikut mereka dikenali sebagai Team A manakala Dato' Musa dan Ku Li serta pengikut-pengikut dikenali sebagai Team B.

Dato' Musa dan Ku Li telah membuat satu pakatan atau "pact" untuk merebut kerusi Dr. Mahathir. Cara yang telah diatur ialah dengan Ku Li bertanding melawan Dr. Mahathir bagi jawatan Presiden UMNO sementara Dato' Musa pula mencabar Dr. Ghafar bagi jawatan Timbalan Presiden UMNO.

Untuk menghadapi perlawanan yang sengit itu, Dato' Musa dan Ku Li telah mengadakan berbagai-bagai ceramah serta kempen di seluruh pelusuk negara untuk menerangkan kepada rakyat khususnya anggota UMNO mengapa Dr. Mahathir ditentang dan mesti diganti dengan orang lain. Orang yang layak menggantinya ialah Ku Li sendiri. Semakin hari semakin sengit perlawanan antara mereka hingga kepada serangan peribadi. Sudah tentu pihak yang diserang tidak boleh duduk diam sahaja. Perkara-perkara yang sepatutnya tidak diketahui umum akhirnya diceritakan secara meluas.

Saya "bernasib baik" kerana dapat menghadiri beberapa ceramah yang diadakan oleh kedua-dua pihak. Namun, yang mencemaskan dan menakutkan saya ialah apabila saya menghadiri satu perhimpunan Team B di Regent Hotel (sekarang dikenali sebagai Park Royal Hotel K.L). Saya mendapati pengikut-pengikut Team B penuh sesak di bilik bawah hotel tersebut di mana diadakan perjumpaan itu. Peti-peti televisyen telah disediakan bagi menyenangkan orang-orang yang hadir melihat dan mendengar rakaman video serta ceramah-ceramah yang telah diadakan oleh Dato' Musa dan Ku Li di seluruh negara. Gambar-gambar tentang lawatan Ku Li ke Johor yang disambut oleh Dato' Musa dan lawatan Dato' Musa ke Gua Musang yang disambut oleh Ku Li juga dipertunjukkan. Saya lihat keadaan dan suasana sangat 'panas' kerana semua penceramah yang turut serta telah berucap dengan begitu lantang dan berapi-api sekali. Melihatkan gaya mereka berucap dengan mengeluarkan kata-kata yang penuh dendam membara membuatkan saya menjadi kecut dan takut. Saya berasa seram sejuk dan sekali-sekali terasa bulu rompok.

tengkok saya naik. Apakah orang-orang ini hendak berjihad terhadap bangsanya sendiri? Di luar hotel tersebut kelihatan penuh sesak dengan kereta. Orang-orang yang datang memenuhi ruang tempat perhimpunan sehingga melimpah keluar bangunan. Menyedari akan keadaan serta suasana tegang itu, orang awam takut memandu kereta mereka di hadapan hotel itu. Apatah lagi terdapatnya khabar-khabar angin mengatakan orang Melayu hendak berperang sesama orang Melayu. Amat merbahaya.

Setelah melihat dan mendengar apa yang sedang berlaku di Hotel Regent, saya beredar pergi pula ke Hotel Hilton. Pada malam yang sama Team A sedang mengadakan perjumpaan mereka. Pemimpin-pemimpin Team A pula mengutuk pemimpin-pemimpin Team B dengan berbagai-bagai kata yang tidak pernah kita dengar dari pemimpin-pemimpin kita. Orang-orang yang pernah menjadi kawan akrab kini memukul canang untuk berperang sesama sendiri. Saya terus-terusan bertanya kepada diri saya sendiri: Mengapakah orang-orang ini yang sama keturunan bangsa dan agama dengan saya sanggup melakukan perkara-perkara tersebut?

Saya menunggu sehingga hampir pukul 12 tengah malam sebelum beredar dari situ untuk pulang ke rumah. Dalam perjalanan pulang itu saya berfikir panjang. Apakah yang akan terjadi sekiranya kedua-dua belah pihak ini dibiarkan bercakaran sesama sendiri? Apakah akan terjadi kepada bangsa, negara serta agama orang-orang yang sedang bermusuhan ini? Negara Malaysia telah merdeka dan kemerdekaan negara telah diperolehi tanpa pertumpahan darah walaupun setitik. Pemimpin-pemimpin negara telah bersusah payah berusaha untuk membebaskan negara daripada

terus dipegang oleh pihak penjajah Inggeris, walaupun di masa itu pemimpin-pemimpin tidak mempunyai wang ringgit, pemimpin-pemimpin ketika itu hanya berbekalkan semangat yang waja untuk membebaskan tanahair tercinta. Kaum ibu sanggup menggadaikan barang-barang kemas mereka. Bukanlah mudah di waktu itu untuk mengumpul wang dan harta, tetapi mereka sanggup melepaskan semua demi cinta mereka terhadap tanahair, demi kemerdekaan tanahair tercinta ini.

Teringat saya akan sejarah Yang Teramat Mulia Tunku Abdul Rahman Putra Al Haj yang telah menerima jawatan Presiden UMNO setelah Dato' Onn "merajuk" dan terus meninggalkan UMNO yang telah ditubuhkan sendiri oleh beliau lalu menubuhkan Parti Negara. Dato' Onn "merajuk" disebabkan beliau mendapat tentangan keras daripada orang-orang Melayu khususnya anggota UMNO ketika itu kerana Dato' Onn ingin menjalankan dasar "pintu terbuka" di mana pintu UMNO dibuka kepada semua orang tidak kira keturunan atau bangsa.

Setelah Dato' Onn meninggalkan UMNO, tidak ada orang yang benar-benar sanggup menerajui parti UMNO sehingga Tun Abdul Razak meminta Tunku Abdul Rahman Putra Al Haj mengambil alih pucuk pimpinan UMNO. Pada mulanya Tunku enggan menerima tawaran itu kerana tanggungjawabnya sangat berat. Lagipun, tidak ada orang lain yang sanggup menerima jawatan tersebut. Namun, menyedari orang-orang Melayu mesti dibela nasibnya dan tidak senang dengan tindak tanduk kerajaan British yang membawa hasil negara ini ke negara mereka serta membiarkan negara sendiri terus miskin, maka Tunku dengan rendah diri telah menerima tawaran tersebut.

Oleh kerana, UMNO miskin dan tidak mempunyai wang pada ketika itu maka Tunku telah menjual 16 buah rumahnya di Pulau Pinang untuk membiayai perbelanjaan UMNO dan membawa satu rombongan ke London untuk menuntut Kemerdekaan daripada kerajaan British.

Apabila Tunku menerima jawatan untuk mengetuai UMNO sebagai Yang DiPertua UMNO, Dato' Onn telah menyatakan bahawa UMNO akan hanya boleh hidup selama enam bulan di bawah pimpinan Tunku. Tetapi UMNO terus hidup sebagai parti orang Melayu yang terbesar dan terkuat di dunia sehingga lah parti itu didapati tidak sah oleh mahkamah pada 2 Februari, 1988.

Ekoran daripada peristiwa yang sangat menyayat hati seluruh anggota UMNO yang cintakan partinya ditambah pula dengan suasana tegang, apatah lagi sebelumnya Dato' Musa telah membuat ucapan di Kelab Foreign Correspondents, Hong Kong, bahawa beliau tahu apa yang akan dilakukan oleh Dr. Mahathir sekiranya beliau tersepit iaitu beliau akan mengadakan "Snap Election" dan mengisyiharkan "Emergency Rule" sekiranya beliau tahu akan kalah, telah membuatkan keadaan benar-benar menjadi bertambah tegang dan tidak menentu.

Setelah saya berfikir panjang dan menyedari akan tanggungjawab saya sebagai seorang rakyat dan sebagai seorang Melayu kerana hal-hal yang sedang berlaku menyengkam kedudukan orang Melayu sendiri apatah lagi saya kenal dengan orang-orang yang terbabit dalam pergerakan yang sedang berlaku, maka saya telah memutuskan untuk menemui Dr. Mahathir dan bertanya serta menawarkan diri sekiranya ada apa-apa yang boleh saya lakukan untuk menolong beliau.

Saya telah menelefon Encik Mohd. Ali iaitu juru iring beliau yang saya kenal baik meminta beliau memberitahu Dr. Mahathir tentang hasrat saya hendak menemui Perdana Menteri dengan seberapa segera. Tujuan saya ingin segera bertemu dengan Dr. Mahathir ialah kerana saya lihat keadaan pada ketika itu sudah menjadi genting. Keesokan harinya (Ahad) saya ke pejabat saya di Jalan Ampang dan menelefon Mohd. Ali untuk mempastikan sama ada beliau telah memberitahu hajat saya itu kepada Dr. Mahathir. Beliau berkata sudah. Saya bertanya lagi apakah jawapan bossnya itu. Katanya, Dr. Mahathir telah bertanya, "Apakah yang Idris boleh buat? Dia bukan ahli politik." Bagaimanapun katanya, Dr. Mahathir menyuruh saya menelefon beliau di kediamannya. Katanya lagi Dr. Mahathir sedang menunggu panggilan saya untuk menyatakan apa yang sedang saya fikirkan.

Sebelum itu saya berasa gentar juga hendak bercakap dengan seorang pemimpin seperti Dr. Mahathir, apatah lagi melalui telefon. Rasanya, tidak manis dan mungkin akan dianggap tidak hormat bercakap dengan pemimpin seperti Dr. Mahathir melalui telefon melainkanlah beliau sendiri yang menelefon saya terlebih dahulu. Sebenarnya saya sudah kenal lama dengan Dr. Mahathir iaitu semenjak saya bekerja di firma perunding beliau pada tahun 1966 lagi. Saya juga pernah membuat urusan-urusan peribadi beliau ketika itu.

Memandangkan bahawa keadaan sudah begitu hangat dan saya sudah membuat keputusan untuk berbuat apa sahaja yang terdaya oleh saya, maka saya memberanikan diri lalu menelefonnya. Oleh kerana talian itu talian terus beliau, maka Dr. Mahathir sendiri yang menjawab. Berdebar juga

hati saya dibuatnya kalau-kalau panggilan itu mengganggu beliau. Setelah memperkenalkan diri dan memberi salam saya pun menerangkan hajat saya ingin menolong. Saya dengar suara beliau yang tidak bertenaga dan dapat mengagak bahawa beliau sangat letih dan sedang berdukacita dengan peristiwa yang berlaku, lebih-lebih lagi beliau ditentang oleh seorang kawan baik beliau dalam kabinet. Malah beliau sendiri yang telah melantik semula rakannya itu sebagai Menteri Perdagangan dan Perindustrian, biarpun sebelumnya Dato' Musa Hitam tidak merestui adanya Ku Li dalam kabinet.

Dr. Mahathir telah menasihatkan saya supaya datang ke pejabat beliau keesokan harinya (Isnin) kerana pada ketika itu ada ramai orang di rumahnya. Saya mengucapkan terima kasih di atas jemputan beliau itu. Saya berasa sungguh lega kerana saya akan dapat menemui beliau keesokan harinya untuk menawarkan diri menolong dengan apa cara yang boleh.

Tepat pada waktu yang dijanjikan, saya bersiap sedia menemui beliau di pejabatnya dengan penuh harapan untuk berbakti kepada parti dan pemimpin yang memerlukan pertolongan. Saya sampai kira-kira pukul 10 pagi dan terus menemui Ketua Setiausaha Sulit Dr. Mahathir. Dalam tangan saya ada satu fail plastik berwarna biru. Dalam fail itu saya sudah sediakan segala maklumat penting yang saya kira boleh menolong beliau seperti nama-nama orang yang memihak kepadanya dan yang menentang beliau. Sebelum itu saya telah membuat satu kajian yang teliti akan jumlah undi yang akan diperolehi oleh beliau dalam Perhimpunan Agung UMNO nanti. Selain itu, saya juga bercadang menesyorkan kepada Dr. Mahathir supaya dapat melakukan

sesuatu bagi mengelakkan pertandingan dan perpecahan orang-orang Melayu. Saya juga hendak memberitahu Dr. Mahathir tentang hasrat saya mahu menghadap Tunku Abdul Rahman di Pulau Pinang dengan tujuan meminta jasa baik Tunku menjadi orang tengah.

Malangnya, saya tidak berjaya menemui Dr. Mahathir sungguhpun saya telah memberitahu dan menerangkan kepada Ketua Setiausaha Sulit beliau mengenai hasrat saya itu kerana takut kedatangan saya itu disalahertikan sebagai ingin meminta projek. Lalu saya bertanya sama ada saya boleh berjumpa Perdana Menteri pada sebelah petang atau keesokan harinya ataupun pada hari-hari lain. Namun jawapannya negatif, katanya saya akan diberitahu kelak apabila sesuai dengan masanya. Menyedari bahawa 'time is the essence' maka saya beredar dengan perasaan hampa yang amat sangat kerana hasrat saya yang jujur hendak menolong tidak terlaksana. Maka berkecailah harapan saya untuk menawarkan apa-apa pertolongan yang saya fikir boleh membantu Dr. Mahathir. Saya tidak tahu siapa yang patut saya persalahkan kerana saya benar-benar telah ber-cakap dan membuat temujanji dengan Dr. Mahathir sendiri pada hari Ahad itu dan Dr. Mahathir sendiri telah menyuruh saya datang menemui beliau di pejabatnya. Walau bagaimanapun, saya telah mendapat tahu kemudiannya daripada seorang yang rapat dengan Dr. Mahathir bahawa saya tidak dibenarkan menemui pemimpin parti saya itu kerana saya dianggap sebagai seorang oportunist.

Dato' Musa telah mengisytiharkan dirinya bersara daripada politik tanahair. Khabarnya, seratus peratus bersara terus. Tetapi ada juga orang yang masih tidak percaya bahawa beliau bersara terus. Sama-samalah kita tunggu.

Ekoran daripada itu, Dato' Musa telah mengambil keputusan tidak mahu dicalonkan semula dalam pilihanraya umum 21 Oktober yang lalu di atas sebab-sebab "sudah hilang minat dalam politik" sebaliknya hanya mahu menumpukan perhatian kepada kariernya sebagai 'duta' negara ke Bangsa-bangsa Bersatu (PBB) di New York. Sedangkan, orang kuatnya, Dato' Shahrir Abdul Samad sendiri menyatakan jawatan itu hanya sesuai disandang oleh mereka yang benar-benar telah bersara daripada politik. Sekali-sekala kita akan mendengar suara wakil kita ini di forum antarabangsa. Tugas ini sangat sesuai bagi seorang yang berkaliber seperti Dato' Musa. Ditinjau dari sudut kekuatan dan kebaikan beliau sahaja (setiap manusia ada kelemahan dan keburukan masing-masing); saya berasa sungguh kagum akan keberanian serta keikhlasan beliau. Sekiranya beliau telah bersalah ('berdosa') beliau telah membayarnya dengan harga yang begitu mahal sekali. Sekarang ini beliau tidak berhutang lagi!

Saya terkenangkembali semasa saya berada di rumah beliau beberapa tahun dahulu dalam suasana Hari Raya. Di kala itu beliau tidak bersama dalam kabinet Tunku. Dia telah dipecat oleh 'bossnya'.

"Hendak dengar lagu Perancis tak? Bagus lagu ini," katanya. Saya tidak faham bahasa Perancis kecuali satu perkataan sahaja, "Adieu!"



Gambar menunjukkan penulis sedang berucap mengalau-alukan kehadiran YTM Tunku Abdul Rahman Putra Al-Haj di kediaman penulis pada Hari Keputeraan YTM Tunku yang ke-86 yang diadakan pada 20-2-1989. Turut hadir ialah Dato' Haji Harun Idris, Dato' Rais Yatim dan Puan Hajah Marina Yusof. Juga dijemput ialah Tengku Razaleigh Hamzah dan Dato' Paduka Rahmah Othman tetapi mereka tidak dapat hadir.

Di masa itulah penulis merayu bersungguh-sungguh kepada YTM Tunku dan pemimpin-pemimpin Semangat 46 yang hadir bersama supaya mencari jalan penyelesaian kepada masalah-masalah yang dihadapi oleh orang-orang Melayu untuk mencapai perpaduan



Gambar ini diambil di Bangunan Parlimen ketika penulis mengunjungi Dato' Musa Hitam dan isterinya untuk mengucapkan Selamat Hari Raya. Di ketika itu jugalah penulis memberi satu hadiah yang berbentuk gambar di mana YTM Tunku Abdul Rahman Putra Al-Haj, Tun Hussein Onn, Dato' Seri Dr. Mahathir Mohamad dan Dato' Musa sendiri bergambar bersama-sama. Gambar itu telah ditandatanganai oleh keempat-empat pemimpin tersebut.

"PRO DR. M"

Setelah gagal bertemu dengan Dr. Mahathir, saya mula berfikir untuk berjumpa dan berbincang dengan lain-lain kenalan yang dikira senang dibuat janjitemu atau terus dapat berjumpa tanpa banyak halangan ketika itu. Di antaranya, ialah Dato' Napsiah Omar yang pada ketika itu menjadi Timbalan Menteri Perumahan dan Tempatan. Saya telah mengadakan perbincangan dengan beliau di pejabatnya. Beliau juga sungguh bimbang dengan apa yang akan berlaku nanti. Saya juga telah menemui Datin Paduka Hajah Rahmah Osman. Ada khabar-khabar yang mengatakan bahawa beliau memihak kepada Ku Li. Dalam perbualan saya dengan beliau di pejabatnya pada 20 Mac, 1987, sambil makan tengah hari di situ, saya telah meminta beliau supaya menyokong Dr. Mahathir. Saya katakan kepada beliau

bahawa kami berdua telah mengenali Dr. Mahathir begitu lama. Saya juga telah mengenali Datin Paduka Hajah Rahmah begitu lama. Kami pernah menganggotai MAYC (Malaysian Association of Youth Council) dan menghadiri Persidangan WAY (World Association of Youth) di Liege, Belgium dan Manchester di England, termasuklah Dato' Seri Anwar Ibrahim. Dalam Pilihanraya Umum baru-baru ini (1990) Datin Paduka Rahmah telah bertanding sebagai calon Semangat 46. Dan beliau telah kalah. Amat disayangkan, sewaktu saya kenang-kenangkan kembali pertemuan saya dengan beliau. Saya telah meminta beliau memihak kepada Dr. Mahathir. Beliau telah meyakinkan saya bahawa beliau sememangnya "Pro Dr. M". Saya telah mengetahui bahawa beliau akan mengadakan persidangan akhbar petang itu. Jadi saya telah mengambil kesempatan itu untuk meminta beliau mengisyiharkan "loyalty" kepada Dr. Mahathir. Semasa itu beliau memegang jawatan sebagai Timbalan Menteri Pengangkutan. Beliau telah menepati janji kerana akhbar *The Malay Mail* pada muka hadapannya pada 21 Mac, 1987 ada menyatakan bahawa beliau memihak kepada kepimpinan Dr. Mahathir. Tetapi tidaklah saya faham mengapa beliau berubah angin akhirnya.

Saya telah juga menemui Dato' Abu Hassan Omar yang pada waktu itu memegang jawatan sebagai Menteri Kebajikan Masyarakat. Beliau juga telah menyatakan kebimbangannya di atas pertandingan itu. Tetapi beliau telah menyatakan akan "*sink or swim*" bersama dengan kepimpinan Dr. Mahathir. Begitulah taat setianya kepada ketuanya. Saya telah menyatakan kepada beliau yang saya berhasrat menghadap Tunku untuk meminta pertolongan. Beliau ber-setuju benar dan memberikan sokongannya di atas usaha-

usaha saya itu. Dato' Abu Hassan menganggap misi saya itu seperti "Kissinger-like Mission". Tetapi saya katakan bahawa saya merasa agak bimbang tentang kedudukan Menteri Besar Selangor kerana saya dan Dato' Abu Hassan adalah anak Selangor dan UMNO Selangor mesti memainkan peranan yang penting. Lalu saya meminta Dato' Abu Hassan menemani saya pergi berjumpa dengan Menteri Besar Selangor untuk mendapatkan sokongan beliau. Sebelum berlepas ke rumah Menteri Besar, saya telah menelefonnya terlebih dahulu memberitahu bahawa kami akan ke rumah beliau di Shah Alam untuk berbincang sedikit di atas perkara yang sangat penting.

Saya memandu kereta saya. Dato' Abu Hassan duduk di sebelah. Kami sampai di rumah Menteri Besar Selangor di Shah Alam. Di perkarangan rumah Menteri Besar saya lihat ada beberapa buah kereta. Dalam rumah ada ramai tetamu termasuk Dato' Basri Bajuri (MP Ulu Langat) dan Encik Jamaluddin bin Adnan (ADUN Permatang, Kuala Selangor). Kami memberi salam dan setelah duduk beberapa ketika, Dato' Abu Hassan telah memberitahu para hadirin yang saya ada membawa satu rancangan dan berharap para hadirin sudi mendengarnya. Mereka bersetuju. Sayapun menerangkan rancangan saya itu. Pokoknya, saya telah meminta Menteri Besar Selangor supaya terus menyokong Dr. Mahathir, apatah lagi Menteri Besar Selangor baru sahaja beberapa bulan memegang jawatan setelah dilantik oleh Dr. Mahathir.

Datuk Menteri Besar Selangor, iaitu Tan Sri Haji Muhammad Haji Taib adalah kenalan baik saya. Kampung beliau, Batang Kali adalah berhampiran dengan kampung saya, Sungai Choh. Bapa beliau pernah menjadi guru saya

di Sekolah Melayu, Rawang, Selangor. Saya berasa sangat berbesar hati kerana Datuk Menteri Besar Selangor sudah menunjukkan kewibawaannya. Banyak projek telah dijalankan di Selangor semenjak beliau memegang kerusi Menteri Besar Selangor Darul Ehsan.

Nampaknya beliau mempunyai masa depan yang cerah dalam arena politik tanahair. Baru semalam saya terbaca (*Berita Harian* 17 November) bahawa Dato' Abu Hassan telah memberi laluan kepada beliau untuk bertanding jawatan Naib Presiden UMNO dalam Perhimpunan Agung hujung November 1990 ini. Alasan yang diberikan oleh Dato' Abu Hassan ialah "bertujuan mengekalkan perpaduan dan kewibawaan UMNO Selangor."

Sebagai seorang anak Selangor, saya berasa bangga di atas keputusan yang diambil oleh Dato' Abu Hassan itu. Untuk tujuan "mengekalkan perpaduan" sesama kita, haruslah kita mencari atau menerima alternatif. Alternatif bagi Dato' Abu Hassan ialah beliau akan mempertahankan jawatan Ahli Majlis Tertinggi UMNO.



...akah yang dibisikkan oleh Dr. Mahathir kepada YTM Tunku yang membuatkan 4 orang Wanita UMNO cuba mendengar bisikan mereka berdua itu. Kelihatan juga ialah Dato' Hussein Onn dan Dato' Bahaman Shamsuddin.



Gambar menunjukkan YTM Tunku Abdul Rahman sedang berbual-bual dengan Dato' Suhaimi Kamaruddin dan Pak Yem sesudah Pergerakan Pemuda UMNO bertemu dengan Tunku. Apakah agaknya yang dibualkan?

BERTEMU DENGAN BAPA KEMERDEKAAN

Pada malam itu saya berfikir panjang akan apakah tindakan yang akan saya ambil selanjutnya. Saya melakukan sembahyang sunat istikhah untuk memohon kepada Allah SWT meminta petunjukNya. Apakah yang dapat dilakukan supaya tidak berlaku pertarungan di antara Dr. Mahathir dengan Ku Li dan Dr. Ghafar dengan Dato' Musa.

Pada keesokan harinya saya telah memberanikan diri untuk menelefon Tunku di Pulau Pinang. Setelah dapat menghubungi Tunku saya menyatakan hasrat saya hendak menghadap beliau dengan secepat mungkin yang boleh. Saya menerangkan kepada Tunku tentang tujuan saya mahu

menghadap beliau itu. Tunku berkata, "Apa yang Hang boleh buat Idris. Saya sendiri tak boleh buat apa-apa. Saya sedih melihatkan ini semua kerana saya takut orang-orang Melayu akan berpecah dan UMNO sendiri akan hancur. Lagipun, buat apa Hang nak buang duit datang jumpa saya. Tambang kapal terbang pun mahal!" Masih terdengar lagi di telinga saya akan kata-kata Tunku dengan loghat Kedahnya itu. Saya telah menyatakan bahawa saya tetap hendak menghadap beliau. Selepas mendengar rayuan saya yang dibuat dengan bersungguh-sungguh itu, Tunku pun berkata: "Baiklah Idris. Hang datang esok pukul 12 tengah hari. Boleh Hang makan tengah hari dengan saya. Saya bangkit lambat sikit kerana malam ini ada orang ajak saya main poker." (Ketawa.....)

Senang rasa hati saya setelah dapat bercakap dengan Tunku. Di samping itu perasaan takut pun ada. Bagaimanapun, terfikir juga di hati, apakah yang dapat saya nyatakan kepada Tunku? Namun saya tetap berharap dan berdoa agar Bapa Kemerdekaan, Bapa Malaysia, Perdana Menteri Malaysia pertama yang dihormati dan seorang negarawan yang terkenal dapat berbuat sesuatu bagi mengatasi masalah yang rumit yang sedang melanda bangsa Melayu ketika itu. Saya ini siapalah hendak bercakap tentang politik dengan beliau. Saya masih teringat akan kata-kata Dr. Mahathir seperti yang dilafazkan oleh juru iring beliau: "Apa yang Idris boleh buat. Dia bukan ahli politik."

Setelah difikirkan masak-masak ada benarnya kata Tunku itu. Buat apa saya sibuk-sibuk hendak membuang duit bertemu dengan beliau. Pada ketika itu saya memang benar-benar terdesak. Perniagaan saya merosot disebabkan kemelesetan ekonomi yang begitu teruk. Masalah saya

ketika itu banyak. Saya telah menerima tidak kurang daripada 12 surat saman dan saya terpaksa turun naik mahkamah. Bank Bumiputra pula telah mengambil tindakan yang begitu tidak ‘berperi-kemanusiaan’ kerana saya menjadi penjamin kepada satu pinjaman syarikat. Usaha saya hendak membayar secara ansuran bulan tidak diterima langsung oleh bank tersebut. Selain daripada itu, harta saya hendak dilelong dan tuanpunya lot di mana syarikat saya menyewa telah cuba pula mengusir saya dan berbagai-bagai lagi cabaran yang saya hadapi pada ketika itu. Walaupun saya menghadapi masalah-masalah tersebut, saya tidak dapat membiarkan apa yang sedang berlaku kepada pemimpin-pemimpin UMNO yang sedang bergolak begitu sahaja. Saya teruskan hasrat saya untuk mencari jalan perpaduan orang Melayu ketika itu.

Saya tidak tahu mengapa saya mesti melibatkan diri dalam isu yang sedang berlaku. Hanya yang saya tahu ia adalah tanggungjawab saya kerana sekiranya negara kucar-kacir sudah tentulah semua akan merasa susah dan pahitnya. Saya berazam untuk cuba menyelamatkan keadaan dan sekiranya setelah dicuba dan tidak mendatangkan apa-apa hasil yang boleh meredakan keadaan, apa boleh buat. Saya berserah kepada Allah SWT dan memohon kepadaNya pertolongan serta restu kerana esok saya akan berlepas ke Pulau Pinang dengan kapal terbang menghadap Tunku.



Gambar menunjukkan penulis berjalan di samping YTM Tunku Abdul Rahman Putra Al-haj selepas YTM Tunku melancarkan syarikat kepunyaan penulis di Wisma Central pada bulan Januari, 1984 iaitu semasa YTM Tunku berusia 81 tahun.



Gambar ini diambil pada 26 Mac 1987, di rumah 'Takdir' iaitu kediaman YTM Tunku Abdul Rahman Putra Al-haj di Pulau Pinang. Gambar menunjukkan penulis sedang berbincang dan merayu kepada YTM Tunku agar beliau campurtangan untuk mengelakkan pertarungan di antara YAB Dato Seri Dr. Mahathir Mohamad dengan YBM Tengku Razaleigh Hamzah bagi Parti Presiden UMNO.



Kedua pemimpin lama dan baru menghadiri HARI WANITA yang ke-40 di PWTC tahun lepas.

ALAMAT TIDAK BAIK

Untuk menepati janji yang telah saya buat dengan Tunku, saya terpaksa meminjam wang daripada seorang sahabat sebanyak \$500.00 untuk tambang kapal terbang dan lain-lain perbelanjaan ketika berada di sana.

Saya terbang ke Pulau Pinang dengan membawa sejuta harapan dan dada yang berdebar-debar kerana hendak menghadap Tunku yang saya hormati sebagai bapa saya sendiri.

Ketika di Pulau Pinang saya menginap di Hotel Shangrila tetapi hanya sekerat hari sahaja kerana kesuntukan waktu. Saya menyewa taxi ke kediaman Tunku di No. 1, Jalan Tunku Abdul Rahman. Saya tiba di rumah Tunku tepat jam 12 tengah hari. Rupa-rupanya, Tunku sedang menunggu kedatangan saya. Melalui pegawai peribadinya, Encik

Samad, saya mendapat tahu Tunku sentiasa bertanyakan saya sama ada saya sudah sampai atau belum. Apabila Tunku mengetahui bahawa saya datang dengan menaiki teksi beliau lantas bertanya kepada Encik Samad mengapa tidak menjemput saya di lapangan terbang.

Ketika saya tiba Tunku sedang menunggu saya di ruang tamu. Saya memberi salam hormat kepada beliau seperti yang biasa yang saya lakukan dan hulurkan dua belah tangan untuk bersalamanserta mencium tangannya. Sambil terus duduk di sebelahnya, saya bertanyakan khabar tentang kesihatannya. Tunku memberitahu, walaupun beliau pernah mengidap beberapa jenis penyakit seperti sakit kaki, sakit pinggang, kencing manis tetapi berkat doa orang-orang yang kasih kepadanya, beliau sudah sembah daripada semua penyakitnya itu. Saya berkata, "Syukurlah Tunku. Nampaknya Tuhan benar-benar sayang kepada Tunku." Tunku tersenyum sahaja lalu berkata, "Idris, sebelum Hang menyatakan apa-apa, terlebih dahulu elok saya beritahu tentang apa yang Idris patut tahu." Lalu Tunku menerangkan kepada saya berbagai perkara yang bersangkutan dengan UMNO semenjak penubuhannya, mengenai pemimpin-pemimpin seperti Dato' Onn, Haji Zulkifli, Tun Abdul Razak, Tun Hussein Onn, Dr. Mahathir, Dato' Musa dan banyak lagi nama yang disebut oleh Tunku yang tidak boleh saya ingat. Nampaknya, Tunku berusaha bersungguh-sungguh untuk menyedarkan saya tentang perjuangan UMNO yang senantiasa membela nasib orang-orang Melayu semenjak dahulu lagi. Tunku juga mengingatkan saya perkara yang mungkin berlaku sekiranya tidak ada persefahaman di antara pemimpin-pemimpin yang menerajui UMNO. Tunku telah memberi contoh seperti yang telah

berlaku di antara Dr. Mahathir dan Dato' Musa Hitam. Menurut Tunku, sungguhpun mereka pernah begitu rapat akhirnya berpecah juga. Tunku pula menyatakan serba sedikit tentang persahabatan beliau dengan Tun Razak. Katanya, sungguhpun ada orang yang mengapi-ngapikan beliau dan Tun Razak, persahabatan mereka tetap terjalin mesra sehingga Tun Razak meninggal dunia. Menurut Tunku lagi kerjasama di antara mereka juga tetap teguh dan sentiasa sokong menyokong di antara satu dengan lain. Itulah yang sepatutnya dilakukan oleh kedua-dua pemimpin tersebut kerana rakyat dan negara akan sentiasa mengharapkan mereka membimbang negara hingga mencapai kemajuan. Sambil itu, Tunku juga menyatakan kebimbangan mengenai wujudnya pihak-pihak yang akan menangguk di air keruh atau ada pihak pembangkang yang akan mengeksplorasi keadaan untuk mendapatkan lebih kerusi di Parlimen. Tunku juga ada menyebutkan tentang surat yang dikirimkan oleh Dr. Mahathir kepada beliau yang membawa kepada persaraannya daripada jawatan Perdana Menteri.

Setelah bercakap dengan saya selama lebih kurang 1 jam, kami beredar ke meja makan. Oleh kerana kami tahu bahawa Tunku gemar makan lauk kepala ikan dan rendang, isteri saya telah menyediakan lauk itu untuk saya bawa bersama ke Pulau Pinang. Rupa-rupanya Tunku telah menyediakan berjenis-jenis lauk untuk menjamu saya. Tidak kurang daripada 10 jenis lauk-pauk yang disediakan di atas meja makan.

Saya dipersilakan duduk di meja yang boleh diduduki oleh seramai 12 orang. Tunku duduk berhadapan dengan saya. Sambil makan dan menjamah lauk-pauk kami terus

bercerita. Pada saat yang baik saya pun mulalah menceritakan hasrat saya datang ke Pulau Pinang dan menghadap beliau itu. Tunku berkata bahawa beliau sudah tahu tujuan saya datang menghadapnya. Katanya saya mahukan pertolongan beliau. Saya mengakui kebenaran tekaan beliau itu. Rupanya, Tunku dapat membaca niat dan hasrat hati saya dan beliau juga tahu apa yang hendak saya katakan. Saya merayu kepada Tunku supaya campurtangan, dan berkata tidak ada orang lain yang lebih layak yang dapat ‘melarang’ atau mengelakkan pertandingan di antara Dr. Mahathir dengan Tengku Razaleigh itu. Setelah mendengar kata-kata saya itu, maka Tunku bersetuju untuk membuat sesuatu. Mendengar kata-kata Tunku, hati saya bagaikan disentuh oleh perasaan yang indah. Tidak dapat saya menggambarkan kegembiraan di hati saya ketika itu. Saya merasakan seolah-olah berada dalam mimpi yang indah. Betulkah saya benar-benar sedang duduk berhadapan dengan Tunku, duduk semeja dan berbincang dengan Tunku sambil ‘santap’? Tunku yang pada suatu ketika dahulu sepatutnya menaiki takhta dan menjadi Sultan Kedah tetapi telah memilih untuk menjadi kakitangan kerajaan dan seterusnya mendapat gelaran sebagai Bapa Kemerdekaan Malaysia. Apalah saya, hanya seorang insan hamba Allah, tidak mempunyai sebarang pangkat dan masih ‘budak’ pula lagi!

Tunku telah menjelaskan apa yang akan dilakukannya. Beliau akan menulis surat kepada Dr. Mahathir dan Ku Li. Beliau akan menasihati Ku Li supaya membiarkan Dr. Mahathir meneruskan penggalnya dan meminta Ku Li bertanding bagi jawatan Naib Presiden sahaja. Saya telah memberitahu Tunku iaitu saya ada mendengar ura-ura Dr.

Mahathir akan melantik Ku Li sebagai Timbalan Perdana Menteri sekiranya Ku Li menang pertandingan jawatan Naib Presiden. Tunku nampaknya berpuas hati dengan berita yang saya sampaikan kepada beliau itu. Namun hati saya juga berkata, apa akan jadi apabila Ku Li menang dan beliau tidak dilantik sebagai Timbalan Perdana Menteri? Saya berkata kepada diri saya, "*I'll cross the bridge when I come to it.*" Tunku bertanya saya bila akan pulang ke Kuala Lumpur. Saya menjawab bahawa saya akan pulang pada petang itu juga. Tunku lalu menawarkan kepada saya boleh menggunakan biliknya di atas untuk berehat. Saya mengucapkan berbanyak terima kasih kepada Tunku sambil memberitahu beliau bahawa saya sudah menempah bilik di hotel dan biarlah saya meminta diri sahaja untuk balik ke hotel dan bersiap-siap balik ke Kuala Lumpur. Lagipun saya tidak sabar-sabar lagi untuk menyampaikan berita baik hasil perjumpaan saya dengan Tunku itu kepada Dr. Mahathir.

Sewaktu saya hendak pulang, Tunku dengan kerusi rodanya menghantar saya ke muka pintu. Saya sungguh tidak menyangka yang Tunku akan berbuat begitu. Layannya kepada saya sungguh baik. Saya berasa sangat bangga kerana mendapat menghormatan yang begitu tinggi daripada Tunku. Beliau telah menyuruh pemandunya menghantar saya ke hotel. Sebelum saya meninggalkannya, saya telah mengucapkan berbanyak-banyak terima kasih seraya mencium tangannya. Pada ketika itu, saya rasa sedang berada di alam mimpi. Saya tidak pernah menduga bahawa saya telah melakukan ini semua. Saya amat bersyukur kepada Allah SWT. kerana semuanya adalah dengan izin dan kehendakNya juga.


Sebaik sahaja saya berada di bilik hotel, saya terus mengambil sehelai kertas dan menulis kepada Tunku merakamkan terima kasih saya yang tidak terhingga kerana telah sudi menemui saya. Saya mengirim surat itu melalui seorang sahabat yang tinggal di Pulau Pinang. Setibanya saya di Lapangan Terbang Subang saya mencari telefon untuk bertanya kepada sahabat saya, sama ada surat itu telah disampaikan kepada Tunku atau belum. Katanya sudah. Saya berasa lega kerana sungguhpun perkara menghantar surat itu dipandang kecil, tetapi kepada orang yang menerimanya sudah tentu berasa besar hati kerana kita memberi penghargaan kepada orang yang telah memberi kita layanan yang baik atau membuat jasa kepada kita.

Setelah berada semula di Kuala Lumpur, saya berusaha menemui Dr. Mahathir untuk memberitahu beliau hasil pertemuan saya dengan Tunku di Pulau Pinang itu. Tetapi saya berasa sedikit hampa kerana ketika itu Dr. Mahathir tidak berada di Kuala Lumpur. Beliau sedang melakukan lawatan ke seluruh negara seperti yang dilakukannya sebelum Pilihanraya Umum baru-baru ini. Oleh kerana saya berasa khuatir ada kemungkinan saya tidak akan dapat peluang bertemu dengan beliau, saya telah menulis surat. Sungguhpun begitu, saya tidaklah menekankan sangat tujuan saya untuk menemuinya kerana saya masih menunggu surat-surat yang akan disiapkan dan dikirimkan oleh Tunku kepada saya untuk dihantar kepada Dr. Mahathir dan Ku Li. Dengan surat itu, barulah ada kenyataan atau bukti yang menunjukkan bahawa saya telah benar-benar berjumpa dengan Tunku.

Sehari sebelum Tunku datang ke Kuala Lumpur beliau telah menelefon saya di pejabat. Hati saya gembira tetapi

masih berasa berdebar. Tentu ada sesuatu perkara penting dan mustahak yang hendak diberitahu oleh Tunku kepada saya. Saya memegang ganggang telefon dengan tangan yang sedikit menggeletar. Tunku memberitahu saya bahawa draf surat yang akan dihantar itu sudah siap, tetapi Tunku juga menyatakan bahawa beliau telah mendapat alamat yang tidak baik. Saya bertanya, apa perkaranya. Tunku berkata bahawa setelah dia menunaikan fardu Subuh, beliau tidur semula. Dalam tidurnya itu, Tunku mendapat mimpi atau alamat yang tidak baik. Apabila saya hendak tahu dengan lebih lanjut lagi tentang alamat mimpi yang tidak baik itu, Tunku berkata hal itu akan beliau terangkan nanti apabila beliau datang ke Kuala Lumpur pada esok harinya.

Tunku juga ada menyentuh tentang berita muka depan akhbar 'The Star' yang menyiarkan kenyataan Dr. Mahathir ketika melakukan lawatan ke Brunei. Kenyataan Dr. Mahathir berbunyi, sekiranya beliau mendapat satu undipun, beliau akan terus memegang jawatan Presiden Parti UMNO.





Dato' Seri Dr. Mahathir Mohamad bersambutan bersama dengan Tan Sri Rosmah dan isterinya



Apabila kita melihat ketiga-tiga pemimpin ini ketawa riang sudah tentu kita berkata alangkah baiknya jika ketiga-tiga pemimpin yang bertelagah ini berbaik semula seperti dalam gambar ini yang tidak langsung menunjukkan mereka memusuhi antara satu sama lain. Inilah yang dicari-cari oleh orang-orang Melayu supaya bersama-sama menghadapi masa depan bangsanya dengan contoh tauladan yang ditunjukkan oleh pemimpin-pemimpin agung kita. Penulis yakin ketiga-tiga pemimpin yang berlainan parti ini akan berbaik semula jika kita semua mahukan mereka bersatu.

SUDAH BULAT DENGAN KEPUTUSAN

Sebaik sahaja Tunku tiba di Kuala Lumpur, saya terus pergi menghadap beliau di kediamannya di Jalan Tunku. Tunku telah menerangkan kepada saya tentang mimpiinya tempoh hari. Kata Tunku ada kemungkinan usaha beliau itu tidak akan dapat diterima oleh Dr. Mahathir dan Ku Li.

Bagaimanapun, Tunku tidak mahu menghampaskan saya. Beliau meminta saya membaca surat yang telah disiapkannya itu yang akan dikirim kepada Dr. Mahathir dan Ku Li. Setelah saya membaca surat-surat itu Tunku menyuruh saya menyimpannya dahulu kerana memandangkan keadaan yang tidak sesuai. Tunku juga meminta saya supaya memberitahu Ku Li untuk datang menghadap

beliau. Saya pun pergi ke pejabat Ku Li di Kementerian Perdagangan dan Perindustrian. Namun, kerana Ku Li sangat sibuk tidaklah dapat saya bertemu beliau. Saya meninggalkan pesan kepada Setiausaha Haji Redzuan. Saya juga telah menerangkan kepada Haji Redzuan supaya beliau menyampaikan kepada Ku Li tentang usaha-usaha yang telah saya buat serta menunjukkan gambar-gambar saya dengan Tunku di Pulau Pinang. Ku Li diminta sangat-sangat supaya dapat menghadap Tunku secepat mungkin.

Pada hari Jumaat 3 April 1987, Ku Li telah datang menghadap Tunku di kediamannya pada jam 11 pagi. Saya tidak ada bersama-sama ketika pertemuan itu diadakan kerana tidak ingin campur tangan. Selepas pertemuan itu Tunku berangkat pulang ke Pulau Pinang. Saya yang menghantarnya ke Lapangan Terbang Subang. Tunku tidak memberitahu saya tentang hasil pertemuannya dengan Ku Li itu. Saya pula tidak bertanyanya kerana takut mengganggu perasaan Tunku. Sekiranya berita itu baik, sudah pasti Tunku memberitahu saya ketika itu juga. Ini tentu berita kurang baik, fikir saya. Lagi pula saya berfikir masanya tidak sesuai untuk bertanya kepada Tunku kerana sudah lewat dan Tunku hendak pulang segera ke Pulau Pinang.

Pada keesokan harinya, saya menelefon Tunku di Pulau Pinang untuk bertanya tentang hasil perjumpaan beliau dengan Ku Li. Seperti yang telah dijangkakan, Tunku menyatakan kesedihannya. Beliau tidak berhasil. Setelah mencuba sedaya upaya memujuk Ku Li supaya jangan bertanding menentang Dr. Mahathir dan sebaliknya bertanding kerusi Naib Presiden, dapat patuh seperti yang dikehendaki oleh Tunku, akhirnya ditolak oleh Ku Li.

Ku Li telah menyatakan sebab-sebabnya kepada Tunku, bahawa beliau telahpun membuat perjanjian dengan Dato' Musa untuk melawan Dr. Mahathir dan Encik Ghafar bagi jawatan-jawatan Presiden dan Naib Presiden parti UMNO. Ku Li menyatakan lagi bahawa pasukannya iaitu TEAM B mempunyai penyokong dan pengikut yang sama ramainya dengan TEAM A. Pada ketika itu juga sudah terlewat untuk mereka menarik diri.

Tunku telah memberitahu saya beliau juga ada membuat satu cadangan lain kepada Ku Li. Cadangannya itu, sekiranya dipersetujui oleh Ku Li boleh menyelamatkan keadaan yang tidak tenteram ketika itu. Cadangan atau formula yang dikemukakan oleh Tunku itu berkehendakkan Ku Li menarik daripada bertanding kerusi Presiden dan hanya bertanding kerusi Naib Presiden sahaja. Sekiranya Ku Li menang Dr. Mahathir akan dinasihatkan supaya melantik Ku Li sebagai Timbalan Perdana Menteri. Dato' Musa akan dicadangkan dilantik menjadi wakil Malaysia ke Bangsa-Bangsa Bersatu atau dilantik sebagai Menteri Luar Negeri. Tentang Dr. Ghafar pula, Tunku akan cuba menasihatkan Dr. Mahathir supaya memberikan jawatan yang kurang penting seperti menjadi Gabenor Pulau Pinang atau Melaka. Itulah satu cara kata Tunku untuk menyelamatkan keadaan pada ketika itu. Namun, itu Ku Li tetap tidak dapat menerima cadangan itu. Beliau sudah bulat dengan keputusan yang diambilnya.

Sebelum hari pertandingan itu, saya telah cuba menemui Ku Li beberapa kali tetapi telah dihalang oleh orang-orang tertentu yang sentiasa berada di sekeliling Ku Li. Biarpun begitu saya telah menulis surat yang panjang lebar kepadanya sehari sebelum pertandingan itu berlaku.

Surat itu saya serahkan kepada setiausaha supaya disampaikan kepada beliau. Sama ada surat itu benar-benar sampai ke tangan Ku Li atau tidak, tidaklah dapat saya pastikan.

Dalam surat itu saya meminta Ku Li dengan segala rendah diri supaya menarik diri daripada bertanding. Saya nyatakan juga akan cuba memberi cadangan kepada Dr. Mahathir supaya melantiknya sebagai Timbalan Perdana Menteri. Saya telah memberikan beberapa sebab kepada Ku Li tentang mengapa beliau sepatutnya membatalkan ran-cangannya untuk melawan Dr. Mahathir bagi jawatan Presiden Parti.

Fakta-fakta yang saya berikan adalah berdasarkan bahawa beliau akan mendapat undi terbanyak sekiranya beliau bertanding kerusi Naib Presiden kerana beliau adalah seorang yang sangat disayangi serta ramai penyokong. Dr. Mahathir sendiri pernah membayangkan yang beliau sedia melanjuk Ku Li sebagai Timbalan Perdana Menteri jika Ku Li tidak menentangnya bagi merebut kerusi Presiden dan Ku Li menang kerusi Naib Presiden. Dr. Mahathir dan Ku Li sudah sekian lama menjalin persahabatan dan sudah berada dalam kabinet sekian lama. Yang penting jika perlawanan itu diteruskan, sudah tentu orang-orang Melayu akan berpecah dan parti UMNO juga akan rosak.

Namun saya tidak juga berjaya memujuk Ku Li. Sedangkan Tunku tidak berhasil, inikan pula saya. Tetapi saya masih tidak berputus asa. Saya telah menelefon ke pejabat Tengku Rithauddeen untuk bertemu beliau.

Saya disambut oleh Tengku dengan baik dan saya telah menerangkan segala-galanya kepada beliau tentang apa yang telah saya lakukan untuk menyelamatkan keadaan. Untuk

meyakinkan beliau tentang apa yang telah saya lakukan itu saya telah menunjukkan gambar-gambar saya bersama Tunku ketika saya menghadap Tunku di Pulau Pinang. Beliau mendengar kata-kata saya dengan penuh perhatian. Turut sama mendengar saya bercakap dengan Tengku ialah setiausaha Encik Rahim Razak. Sesudah saya bercakap dengan panjang lebar sayapun berkata lagi, "Terserahlah kepada Tengku sekarang ini. Haraplah Tengku berjumpa dengan Tunku di Pulau Pinang ketika Tengku melawat Pulau Pinang esok. Cubalah kita membuat sesuatu sebagai usaha terakhir," kata saya dengan penuh harapan. Saya sudah tahu terlebih dahulu bahawa Tengku akan melakukan lawatan ke Pulau Pinang pada esok harinya. Saya mendesak supaya beliau menghadap Tunku. "Patik akan menelefon pejabat Tunku di Pulau Pinang memberitahu bahawa Tengku akan mengadap Tunku." Demikianlah saya mengakhiri percakapan saya supaya Tengku tidak dapat mengelak lagi.

Sekembalinya beliau dari Pulau Pinang, saya telah bertanyakan tentang hasil pertemuan beliau dengan Tunku. Kata Tengku, tidak ada apa-apa yang dapat dilakukan lagi kerana kedua-dua Ku Li dan Dato' Musa benar-benar merasa yakin akan menang dalam pertandingan mereka.


Apa yang tidak boleh saya lupakan ialah kata-kata perangsang Tengku Ahmad Rithauddeen kepada saya. Katanya, ramai orang yang telah datang menemui beliau supaya berbuat sesuatu, tetapi katanya tidak ada seorangpun yang benar-benar jujur dan ikhlas berusaha seperti yang saya tunjukkan. Jika adapun yang datang bertemu beliau berkaitan masalah itu semuanya mempunyai kepentingan masing-masing. Apabila saya hendak meninggalkannya, beliau telah menghantar saya sampai ke muka pintu. Kata

setiausaha yang mengiring saya separuh jalan, hal seumpama itu jarang-jarang dibuat oleh Tengku Ahmad Rithauddeen.

Dalam ruangan ini, saya mengucapkan berbanyak terima kasih kepada Tengku Ahmad Rithauddeen kerana telah memberikan hormat kepada saya dengan kata-kata yang menggalakkan itu. Sewaktu saya menulis buku ini Tengku Ahmad Rithauddeen telah meninggalkan kabinet kerana beliau gagal mempertahankan kerusi Parlimennya di Kota Bharu. Saya berharap Tengku tidak berasa kecewa sangat kerana saya percaya apa juga yang telah beliau curahkan kepada negara dan rakyat sudah cukup menjadi kenangan manis buat selama-lamanya. Saya mengucapkan selamat bersara kepada beliau sebagai Menteri Pertahanan. Namun, saya percaya tenaga dan buah fikiran Tengku Ahmad Rithauddeen masih sangat diperlukan oleh UMNO, khususnya untuk mengembalikan semula kuasa, UMNO di Kelantan.



Gambar di atas adalah satu-satunya gambar penulis dengan YBM Tengku Razaleigh Hamzah. Gambar ini diambil seketika Tengku Razaleigh datang ke Changkat Pavilion di mana syarikat penulis telah menganjurkan satu pameran pada bulan Julai, 1980. Ketika itu Tengku Razaleigh memegang jawatan Menteri Kewangan. Turut juga mengunjungi pameran tersebut di atas permintaan penulis ialah Dato' Seri Dr. Mahathir Mohamad (Timbalan Perdana Menteri), Dato' Musa Hitam (Menteri Pelajaran) bersama dengan Dato' Seri Dr. Siti Hasmah Bte Mohd. Ali dan Dato' Abdul Manan Osman (Menteri Perusahaan Awam).



MANUSIA HANYA BOLEH MERANCANG

Suasana dan bahang perlawanan amat terasa ketika diadakan pertandingan merebut kerusi dalam Perhimpunan Agung UMNO pada 24 April, 1987 yang diadakan di Pusat Dagangan Dunia Putra itu. Bukan anggota-anggota UMNO sahaja yang berminat mengikuti pertandingan dan mengetahui keputusan pertandingan, malah rakyat di seluruh negara berdebar-debar. Semua bertanya dan ingin tahu; apakah yang akan berlaku? Tetapi jawapan hanya boleh diketahui selepas diumumkan keputusan pengundian.

Pada hari penutup, Timbalan Presiden Parti Dato Musa telah berucap. Beliau seolah-olah telah memberikan ucapan-nya yang terakhir di forum politik tanahair dengan

menasihatkan semua yang hadir supaya, "Jagalah UMNO baik-baik."

Saya teringat kembali kepada Perhimpunan Agung UMNO Baru pada tahun 1988. Dr. Mahathir telah memberikan ucapan penggulungan. Dalam ucapannya itu Dr. Mahathir telah mempelawa Dato' Musa dan Ku Li masuk kabinetnya sebagai menteri tidak berjawatan. Mendengarkan pelawaan yang tidak disangka-sangka itu, ramai orang terpegun sebentar seperti tidak percaya kerana hanya beberapa jam sebelumnya mereka ini telah dikritik dengan hebatnya oleh para perwakilan UMNO baru. Di sinilah kita melihat Dr. Mahathir telah menunjukkan kelembutan hatinya dan pelawaan beliau itu telah membuatkan penyokong-penyokong Ku Li dan Dato' Musa 'bingung' kerana memikirkan apakah muslihat Dr. Mahathir berbuat begitu? Ketika itulah ramai orang menitiskan airmata. Saya juga turut menitiskan air mata kerana itulah yang saya tunggu-tunggu supaya kedua pemimpin yang masih disayangi dan dihormati itu berada semula dalam kabinet untuk membantu Dr. Mahathir. Disebabkan saya terharu dan tidak percaya kepada apa yang terjadi di hadapan saya itu, saya terus pergi memberitahu Tunku yang pada ketika itu berada di Kuala Lumpur. Saya meminta kerjasama Tunku menasihatkan Ku Li menerima pelawaan yang dibuat oleh Dr. Mahathir itu.

Semasa dalam Dewan Perhimpunan pada pemilihan Pucuk Pimpinan Parti tahun 1987 itu, saya duduk di sebelah Tan Sri Azman Hashim yang ada membawa kamera zoom-nya untuk merakamkan segala apa yang berlaku di saat-saat yang genting itu. Saya tidak membawa kamera hari itu seperti lazimnya. Tetapi saya perhatikan Dato' Musa duduk releks

sahaja sambil membaca suratkhabar. Dr. Mahathir duduk di sebelahnya tetapi mereka tidak berkata apa-apa. Dr. Mahathir nampak risau kerana memikirkan, agaknya, itulah kali terakhir beliau menjadi Presiden Parti. Beliau gelisah dan saya berasa kasihan melihatnya begitu, tetapi lain pula gaya Dato' Musa. Beliau nampaknya sangat yakin untuk menang.

Apabila sudah hampir pengundian diadakan, waktu sembahyang Jumaat juga sudah hampir tiba. Pengundian terpaksa ditangguhkan hingga selesai sembahyang fardu Jumaat. Yang membuatkan ‘suspense’ lagi ialah apabila mendengar bahawa tali tong-tong pengundi telah bersimpul-simpul antara satu dengan lain dan untuk menghurainya telah mengambil masa yang lama juga. Ada yang berkata, ada orang cuba sabotaj dan bermacam-macam lagi cerita yang didengar pada ketika itu. Penyokong-penyokong bagi kedua pihak telah menjadi tidak tentu arah dan sangat gelisah.

Ku Li duduk di depan bersama-sama dengan ahli-ahli yang lain menghadapi podium kerana beliau tidak memegang apa-apa kedudukan dalam parti, tidak seperti Dato' Musa yang masih lagi menjadi Timbalan Presiden Parti UMNO.

Sesudah pengundian dijalankan dan persidangan ditangguhkan, hanya keputusan yang ditunggu lagi. Dalam pada itu, satu jamuan besar telah disediakan di kediaman Dr. Mahathir di Sri Perdana sungguhpun keputusan pengundian Presiden UMNO tahun 1987 itu belum diketahui. Hujan telah turun dengan lebatnya. Hujan yang turun mencurah-curah itu tidak mematahkan semangat penyokong-penyokong Dr. Mahathir. Mereka datang berduyun-duyun

untuk mendengar keputusan. Dr. Mahathir dan Datin Seri Dr. Siti Hasmah sibuk menyambut kedatangan penyokong-penyokong dan bersalaman dengan mereka semua. Pada lebih kurang pukul 11 malam barulah keputusan diterima dan Dr. Mahathir telah dikerumuni oleh orang-orang yang hadir termasuk orang-orang suratkhabar daripada dalam dan luar negara, tv dan lain-lain untuk mendapatkan komentar beliau. Sebuah kek yang besar iaitu hadiah daripada penyokong telah dipotong oleh Dr. Mahathir. Dr. Ghafar ada bersama-sama merayakan kejayaan mereka. Suasana pada ketika itu sangat meriah dan gembira sekali. Sudah tentu sahaja diiringi dengan tanda kesyukuran. Suasana yang mencemaskan dan kedudukan yang sangat genting itu sudah bertukar wajah. Sebelumnya, sesiapa sahaja boleh menang kerana kedua-dua pihak sama-sama kuat. Namun begitu sebagai yang kita lihat penyokong-penyokong telah memilih regu Dr. Mahathir dan Dr. Ghafar.

Kemenangan yang diperolehi oleh Dr. Mahathir membawa kepada perubahan. Selesai sahaja Perhimpunan Agung UMNO pada tahun 1987 itu istilah TEAM A dan TEAM B tidak timbul lagi, tetapi timbul pula istilah lain yang mengambil ganti iaitu dikenali sebagai ‘serpihan’. Perkataan ini terbit setelah Dr. Mahathir membuat perubahan kabinetnya selepas Perhimpunan Agung UMNO pada tahun 1987. Beberapa ‘muka lama’ telah digugurkan, di antaranya Dato’ Abdullah Ahmad Badawi, Dato’ Shahrir Abdul Samad dan Dato’ Ajib Ahmad. Mereka ini dikatakan telah menyebelahi Ku Li. Apabila Dr. Mahathir berbuat begitu, ramai orang tidak bersetuju kerana tindakan beliau itu dianggap ‘harsh’. Ku Li pula telah menghantar surat untuk berhenti. Datuk Rais Yatim pula berkata, “Saya sudah membakar jambatan.”

Ini bermakna beliau tidak mahu berjuang bersama-sama dengan pemimpin-pemimpin yang berkuasa ketika itu.

Kedua-dua orang pemimpin Melayu iaitu Ku Li dan Dato' Musa yang pernah pada suatu ketika dahulu diramalkan oleh majalah The Time sebagai sebahagian pemimpin-pemimpin dunia berkalisar dan berpotensi telah kalah. Dr. Mahathir telah mengalahkan Ku Li dengan 44 undi sementara Dato' Musa telah tewas kepada Dr. Ghafar dengan 43 undi.

Manusia hanya boleh merancang, tetapi Tuhan jugalah yang menentukan segala-galanya. Seperti yang kita lihat sekarang, Dato' Musa sudah dilantik menjadi wakil negara di Bangsa-Bangsa Bersatu seperti yang pernah dicadangkan oleh Tunku pada tahun 1987 itu sebagai satu cara mengelakkan pepecahan. Dr. Ghafar pula sedang duduk di kerusi Timbalan Perdana Menteri. Dan Ku Li, oleh kerana tidak mahu menerima nasihat dari orang-orang yang masih sayang dan mahukan kepimpinan beliau telah terkeluar dari parti UMNO yang beliau telah sama-sama perjuangkan maitlamat parti Melayu itu.



Gambar menunjukkan penulis sedang bersalaman dengan YAB Dato' Seri Dr. Mahathir Mohamad sekembali beliau dari lawatan ke luar negeri. Juga kelihatan dalam gambar ini ialah Dato' Seri Dr. Siti Hasmah Bt. Mohamad Ali, isteri Perdana Menteri dan Dato' Aziz Ismail, Ketua Setiausaha Sulit kepada Perdana Menteri. Sebagai seorang sahabat lama dan kagum akan pimpinan Dr. Mahathir, penulis sering kelihatan di lapangan terbang sama ada untuk menghantar atau menyambut ketibaan pulang pemimpin negara itu.

PERTEMUAN SAYA DENGAN KU LI

Apabila Ku Li membuat keputusan yang mengejutkan untuk meletakkan jawatan sebagai Menteri Perdagangan dan Perindustrian dan Dato' Rais Yatim pula sebagai Menteri Penerangan, maka saya tahu keadaan akan semakin kusut dan perpaduan orang-orang Melayu akan bertambah rumit.

Saya bergegas pergi ke rumah Dato' Rais Yatim untuk bertanya kepada beliau sebab-sebab beliau merajuk begitu sekali sehingga beliau sampai hati berkata, "*I have burnt my bridges*". Saya juga berhasrat untuk memujuk beliau supaya menarik balik surat perletakan jawatan beliau dan kalau beliau setuju saya sedia membawa beliau menemui

Dr. Mahathir. Malangnya, Dato' Rais tidak ada di rumah dan sungguhpun saya cuba beberapa kali lagi kemudiannya saya tidak juga berjaya. Saya mendapat tahu kemudiannya bahawa beliau dan keluarganya sudah berlepas ke luar negeri.

Sewaktu saya menulis kisah ini, terbayanglah wajah Dato' Rais di ruang mata saya. Saya berasa dukacita benar kerana beliau telah meletakkan jawatan disebabkan tidak bersetuju dengan Dr. Mahathir. Semasa beliau dalam kabinet dan menjadi Menteri Luar Negeri, beliau telah menunjukkan kewibawaan beliau. Beliau mempunyai kebolehan menyampaikan buah fikiran dengan hujah-hujah yang bermas serta jitu dalam kata-kata yang tersusun rapi. Saya tahu juga bahawa beliau telah berusaha kuat untuk meyakinkan negara-negara Komanwel untuk menghadiri mesyuarat Komanwel di Malaysia pada tahun lalu (1989). Beliau juga pernah dilantik oleh Perdana Menteri sebagai jurucakap kabinet dari masa ke semasa setelah tamat mesyuarat kabinet pada tiap-tiap hari Rabu.

Tentang Ku Li pula saya telah dapat menemuinya pada 5 Oktober, 1987 di pejabatnya di Kuala Lumpur. Sebelum saya masuk ke bilik beliau saya perhatikan ramai penyokong-penyokongnya yang menunggu di luar. Semasa saya masuk ke biliknya Ku Li sedang bersendirian. Sungguhpun beliau tahu yang saya ini mungkin memihak kepada Dr. Mahathir beliau tidak keberatan menyambut saya dengan baik dan penuh hormat. Sebenarnya saya sudah kenal lama dengan beliau semenjak dari tahun 1965 lagi. Ketika itu saya bekerja di Pejabat T. Abdullah, Mahathir & Co. sebuah syarikat perunding yang dipunyai oleh Tunku Abdullah Ibni Almarhum Tuanku Abdul Rahman dan Dr.

Mahathir. Saya bekerja di situ sebagai pembantu mereka yang pada masa itu kedua-duanya adalah Ahli Parlimen bagi Kota Setar dan Rawang. Di antara kerja-kerja yang saya lakukan adalah mewakili Tunku Abdullah di kawasan beliau apabila beliau sendiri tidak dapat hadir. Dr. Mahathir pula meminta saya menolong beliau sekali-sekala dalam urusan peribadi dan lain-lain. Semasa saya mula berkenalan dengan Ku Li beliau baharu sahaja memulakan jawatannya di Bank Bumiputra setelah dilantik oleh Tun Abdul Razak. Perkara yang tidak boleh saya lupakan ialah apabila beliau berkata kepada saya, "Saya tidak tahu langsung tentang seluk-beluk Banking. Sekarang saya terpaksa beli buku-buku bersabit dengannya untuk menyenangkan pekerjaan saya." Begitulah lebih kurang kata Ku Li kepada saya ketika itu. Saya juga pernah pergi bersama-sama beliau makan nasi beralaskan daun pisang di Brickfields kerana pada masa itu tempat makan itu sangat popular sekali. Lagipun tidak banyak tempat makan yang lain yang boleh kita pilih seperti sekarang ini.

Dalam perbualan saya dengan Ku Li di pejabatnya itu, saya telah mengingatkan beliau kepada surat saya bertarikh 10 April, 1987 di mana saya telah membuat rayuan supaya beliau menarik diri dari bertanding bagi jawatan Presiden Parti. Beliau berkata dia tidak ada menerima surat tersebut dan apabila beliau membaca salinan yang saya tunjukkan, beliau kelihatan sedih dan bertanyakan kepada siapa saya berikan surat itu. Pada pandangan saya beliau nampaknya seakan-akan kesal tidak mendapat surat saya itu kerana saya katakan orang-orang Melayu masih mahukan beliau berada dalam Kabinet dan parti kerana beliau telah

menunjukkan keupayaan beliau dalam bidang-bidang tertentu.

Sambil kami bercerita Ku Li menerima beberapa panggilan telefon dari penyokong-penyokongnya. Saya teruskan usaha saya memujuk beliau supaya pergi menemui Dr. Mahathir iaitu kawan lama beliau. Saya bersetuju menjadi 'orang suruhan' beliau untuk menyampaikan apa-apa pesan kepada Dr. Mahathir. Saya katakan kepadanya beliau masih popular dan mempunyai pengaruh yang besar. Oleh itu beliau sepatutnya berbaik semula dengan Dr. Mahathir. Dengan itu dapat mengukuhkan parti dan perpaduan orang-orang Melayu.

Ku Li enggan bertemu Dr. Mahathir melainkan mendapat panggilan sendiri dari Dr. Mahathir. Lagipun katanya, penyokong-penyokong beliau ramai dan jika beliau pergi menemui Dr. Mahathir apa kata penyokong-penyokongnya Beliau kena jaga maruah. Ku Li meminta saya memahami kedudukan beliau dan beliau menghargai usaha-usaha saya itu.

Saya sampaikan pula hasil pertemuan saya itu kepada Dr. Mahathir. Dr. Mahathir kata pintu beliau sentiasa terbuka luas. Sesiapa juga boleh berjumpa dengan beliau. Lagi pun katanya, Dato' Musa telah menemuinya beberapa kali dengan tidak payah di jemput, jadi mengapa pula Ku Li tidak mahu berbuat begitu. Saya pun berfikir ia tak ia juga, tidak sepatutnya Dr. Mahathir menelefon Ku Li kerana beliau adalah seorang Perdana Menteri. Ku Li yang sepatutnya pergi menemui Dr. Mahathir atau menelefon beliau. Saya memberitahu Ku Li tentang apa yang dikatakan kepada saya oleh Dr. Mahathir melalui surat. Tetapi sebagaimana kita maklum, mereka tidak ada membuatsebarang pertemuan

untuk menyelesaikan masalah mereka. Walau bagaimanapun kesudahannya mereka bertemu juga pada 12 Disember, 1989 di Parlimen. Disebabkan saya ingin mengetahui tentang hasil pertemuan mereka, saya juga hadir dan menyaksikan pertemuan kedua pemimpin yang pada satu ketika berkawan baik dan boleh bergurau senda. Apabila usaha- usaha saya itu gagal saya akan berusaha meminta jasa baik Tengku Rithauddeen dan Tan Sri Khir Johari supaya menemui Ku Li dengan tujuan memujuknya supaya berbaik-baik semula.



Apakah agaknya yang direnggang jauh oleh kedua pemimpin Pemuda dan Wanita ini? Sudah tentu tentang perpaduan!



Pendis dan keluarga bergambar bersama Ku Li dikala menyambut Hari Raya idulfitri.



Tunku bersama dengan Ku Li semasa perjumpaan S46.



Tunku sedang berbual-bual dengan Dato' Hussein Onn semasa menghadiri Hari Wanita ke 40.

BARU DAN LAMA

Setelah UMNO (Lama) diharamkan, orang-orang Melayu tidak lagi mempunyai parti untuk mewakili mereka. Ini adalah keadaan yang amat mencemaskan. Tunku telah menulis surat kepada Dr. Mahathir supaya beliau berbuat sesuatu dengan segera. Tunku telah mencadangkan kepada Dr. Mahathir supaya beliau terus memegang teraju kerajaan dan parti. Tetapi entah di mana silapnya tidak ada jawapan daripada Dr. Mahathir atau pihak Team A, Team B pula telah membuat permohonan untuk menu buhkan UMNO 88 tetapi ditolak oleh pendaftar. Kemudian disusuli dengan nama UMNO MALAYSIA. Itupun tidak juga mendapat kelulusan.

Sementara itu Team A telah menu buhkan UMNO (Baru). Pendaftarannya telah diluluskan pada 15 Februari,

1988 dan dengan serta merta ia memohon menjadi ahli dalam Barisan Nasional. Ketika itu selama 3 minit, Dato' Seri Ling Liang Sik memegang Pengurus BN kerana Dr. Mahathir tidak mewakili mana-mana parti ketika itu. Orang-orang Melayu mula berfikir apa akan jadi sekiranya Dr. Ling Liang Sik enggan melepaskan jawatan tersebut.

Saat-saat yang tidak boleh saya lupakan ialah ketika UMNO Baru diterima menjadi ahli BN dan Dr. Mahathir mengambil alih semula Pengurus BN, maka orang yang pertama yang menghulurkan tangan untuk mengucapkan tahniah ialah Dato'Seri Samy Velu. Masih kedengaran di telinga saya ucapan beliau, "*Welcome Dato' Seri to Barisan Nasional*".

Tentang Dato'Samy Velu, ada sesuatu yang hendak saya beritahu beliau. Orang ramai, khususnya penyokong-penyokong beliau kadang-kadang berasa kecewa dengan tindak-tanduk beliau yang seperti menentang arahan Dr. Mahathir dalam perlantikan Timbalan Menteri MIC dalam kabinet. Saya tahu bahawa Dr. Mahathir telah memberi sokongan yang kuat kepada beliau dalam beberapa perkara. Oleh itu, apa yang beliau lakukan adalah bertentangan dengan perpaduan dan setiakawan yang dikehendaki oleh BN. Dato' Samy Velu sendiri telah mengakui baru-baru ini iaitu tanpa sokongan daripada pengundi-pengundi Melayu di kawasannya beliau sudah tentu hanyut. Saya dan keluarga saya yang mengundi di Ulu Selangor telah berterusan mengundi calon Barisan Nasional dari MIC biarpun kami tidak kenal pada calon itu dan apa yang telah beliau buat untuk pengundi-pengundi di Ulu Selangor.

Sementara itu, Team B telah menubuhkan Parti Semangat 46, mengambil sempena tahun UMNO Lama

ditubuhkan di Istana Johor pada tahun 1946. Tunku dipilih untuk menjadi penasihat.

Dato' Musa pula sesudah kalah dalam pertandingannya tidak pula menunjukkan minat yang serius kepada team B seperti yang diharapkan oleh Ku Li.

Ini jelas kelihatan apabila Dato' Musa tidak mengambil bahagian untuk berkempen apabila diadakan beberapa pilihanraya kecil ekoran kematian dua atau tiga orang ahli Dewan Negeri.

Tindak tanduk Dato' Musa itu telah mengecewakan Ku Li dan rakan-rakannya. Pada satu ketika saya telah menerima lawatan dari Setiausaha Politik Ku Li dan saya telah menyatakan perasaan dukacita saya kerana Ku Li telah menolak pencalonan sebagai Naib Presiden dan terus menentang Dr. Mahathir. Saya bertanya beliau mengapa Ku Li masih mempercaya Dato' Musa padahal Dato' Musa telah menulis berpucuk surat kepada Dr. Mahathir mengatakan yang beliau (Dato' Musa) akan keluar dari Kabinet sekiranya Ku Li terus dilantik menjadi Menteri. Dato' Musa telah meninggalkan Ku Li sekali lagi setelah Ku Li kalah kepada Dr. Mahathir dan Dato' Musa tewas kepada Dr. Ghafar.

Beliau menyatakan bahawa gabungan itu adalah '*marriage of convenience*' sahaja untuk menentang Dr. Mahathir. Sebenarnya kata beliau lagi, mereka tidak percaya kepada Dato' Musa. Saya termenung kesal buat sementara kerana saya tahu sekiranya Ku Li memilih tidak bertanding sudah tentu sekarang ini beliau berada di tangga No. 2 ataupun No. 1 kerana saya ada mendengar ura-ura Dr. Mahathir hendak bersara tidak lama setelah Perhimpunan UMNO itu tetapi oleh kerana Dato' Musa menarik diri di saat-saat yang tidak disangka-sangka, maka Dr. Mahathir terpaksa

meneruskan perjuangannya demi untuk kebaikan negara, rakyat dan bangsa.

Apabila Semangat 46 ditubuhkan dan ramai ahli-ahli UMNO Lama menyertainya kedua-dua parti ini mula menentang satu sama lain dan tidak nampak keadaan akan reda.

UMNO Baru telah mengadakan Semarak di seluruh negara untuk menerangkan kepada rakyat tentang apa yang sedang berlaku dan meminta rakyat menyokong UMNO Baru kerana UMNO Baru merupakan sinambungan UMNO Lama. Parti Semangat 46 pula hendak menghidupkan UMNO Lama semula kerana mengikut mereka UMNO Baru tidak serupa dengan UMNO Lama.

Sambil UMNO Baru mengadakan kempen melalui Semarak, Parti S.46 pula mengadakan perjumpaan mereka masing-masing dengan penyokong-penyokongnya. Tetapi ada beberapa perjumpaan mereka tidak dapat diadakan kerana pihak polis tidak membenarkan mereka berbuat begitu.

Persidangan S.46 yang pertama diadakan di Federal Hotel oleh kerana Tunku geram sebab permit untuk mengadakan persidangan tersebut di Sulaiman Club Kg. Bahru di mana perjumpaan UMNO yang pertama diadakan di sana lebih kurang 41 tahun yang lalu dibatalkan di saat akhir. S.46 telah cuba pula dapatkan tempat yang lain tetapi tidak berhasil maka Tunku dapatkan sendiri Federal Hotel, Jalan Bukit Bintang. Dalam perjumpaan inilah Tunku telah dilaporkan sebagai berkata supaya UMNO dihapuskan. Ini telah menaikkan darah orang-orang UMNO. Walau bagaimanapun Tunku telah menjelaskan kemudian bahawa beliau tidak sebut hapuskan UMNO tetapi hapuskan UMNO

Baru. Malangnya pihak akhbar sudah putarbelitkan kenyataan Tunku itu dan Tunku telah dikecam dengan hebat. Tetapi itu juga kemungkinan satu '*blessing in disguise*' kerana dengan isu tersebut barulah terbuka hati UMNO untuk menemui Tunku.

Orang-orang Melayu khususnya UMNO Baru telah marah kepada Tunku kerana menghasut orang-orang Melayu membenci UMNO (Baru). Saya telah bertanya kepada Tunku sama ada benar-benar beliau berkata begitu. Katanya, apa yang sebenarnya disebut oleh beliau sudah diputarbelitkan oleh akhbar-akhbar. Apa yang beliau sebut, katanya, "Hapuskan UMNO Baru, bukan UMNO". Oleh itu, Tunku telah dikecam dengan hebat oleh berbagai-bagai pihak dan ada pula yang memaki hamun Tunku dengan kata-kata yang kesat. Ada pula pihak yang mahukan patung Tunku dekat Parlimen diturunkan.

Dalam pada itu, Ketua Pemuda UMNO Dato' Najib juga mengutuk Tunku tetapi katanya beliau akan cuba menemui Tunku untuk mendapatkan keterangan lebih lanjut. Apabila saya terbaca hasrat Ketua Pemuda itu saya cepat-cepat menulis surat kepadanya. Surat itu dikirim dengan tangan. Dalam hati saya inilah peluang bagi saya untuk masuk campur lagi kerana tiap-tiap kali saya menunaikan sembahyang fardu atau sembahyang hajat atau tahajud, saya memohon kepada Tuhan supaya menunjukkan jalan kepada saya bagaimana untuk menyatukan pemimpin-pemimpin Melayu yang sedang bersengketa.

Apabila surat saya sampai di tangan Dato' Najib saya pun dipanggil oleh Dato' Najib. Surat saya ada menawarkan diri untuk membawa beliau bertemu dengan Tunku bila-bila masa. Sebelum itu, iaitu pada 18 November, 1987 saya per-

nah menasihatkan Dato' Najib supaya menemui Tunku kerana saya kata orang-orang Melayu telah melupakan Tunku khususnya orang-orang UMNO. Saya kata elok benar jika Dato' Najib menghadap Tunku sekali sekala kerana dengan itu Tunku akan berfikir panjang sebelum masuk ke mana-mana pihak. Dato' Najib pada ketika itu enggan bertemu dengan Tunku kerana katanya Tunku pernah mengata-ngata ayahnya, Tun Abdul Razak. Saya kata itu tidak benar kerana apa yang saya tahu Tunku selalu menganggap Tun Razak sebagai anaknya dan kerapkali menasihatkannya. Dato' Najib, kata saya, tidak seharusnya mendengar kata-kata orang lain.



Gambar menunjukkan tiga orang pemimpin negara iaitu YTM Tunku Abdul Rahman Putra Al-Haj, Allahyarham Tun Hussein Onn dan Dato' Seri Dr. Mahathir Mohamad sedang berbincang sesuatu ketika berehat selepas menghadiri Hari Wanita yang ke-40 pada 15 November 1989. Nampaknya dalam gambar ini mereka tidak menunjukkan yang mereka bersengketa.



Tun Abdul Razak bin Dato' Hussein Perdana Menteri Malaysia yang kedua.

PERGERAKAN EXCO PEMUDA UMNO MENGHADAP TUNKU

Saya telah dipanggil oleh Dato' Najib pada 18 Oktober, 1989. Dato' Najib memberitahu saya tentang hasratnya hendak menghadap Tunku.

Dato' Najib telah berterus terang dengan saya menyatakan beliau tidak kenal baik dengan Tunku. Saya meyakinkan beliau bahawa Tunku adalah seorang 'gentleman' dan Tunku tentu sekali ingin berjumpa dengan anak sahabat baik beliau yang sekarang sudah menjadi Menteri. Dato' Najib telah meminta saya supaya menguruskan bagi beliau dan rombongan Pergerakan Exco - Pemuda UMNO menemui Tunku.

Saya sungguh merasa senang hati dan sukacita kerana doa saya hampir direstu oleh Allah SWT untuk permulaan menyatukan orang-orang Melayu semula.

Pada 28 Oktober, 1989 saya pergi menghadap Tunku. Saya mempersembahkan hasrat Dato' Najib itu kepada Tunku kerana Tunku pada ketika itu berada di Kuala Lumpur. Tetapi apabila saya sampai di kediamannya Tunku hendak keluar menghadiri jamuan di Shangrila. Tunku ajak saya naik keretanya pergi bersama-sama beliau. Sewaktu dalam kereta, saya menerangkan hasrat Dato' Najib itu. Beliau sudah mengatur jadual hendak balik ke Pulau Pinang esok paginya tetapi beliau tidak mahu menghamparkan Dato' Najib, iaitu anak kepada sahabat lamanya Tun Abdul Razak. Maka Tunku telah menangguhkan kepulangannya ke petang hari itu untuk memberi peluang kepada Dato' Najib menghadap. Harinya ditetapkan pada 29 Oktober 1989 jam 10.30 pagi di kediaman Tunku.

Di hari pertemuan itu saya telah datang lambat ke kediaman Tunku. Apabila saya sampai di sana saya dapati sebuah meja panjang sudah diatur dengan begitu kemas dengan kerusi-kerusi kiri kanannya. Video kamera pun sudah siap dengan recordingnya sekali. Yang kelihatan pada ketika itu ialah Dato' Hj. Suhaimi bin Dato' Kamaruddin, Encik Mazlan Harun dan Pak Yem. Saya lihat Tunku sudah berada di kerusi roda menunggu ketibaan Dato' Najib dan rombongannya.

Saya merasa resah dan bimbang melihatkan ahli-ahli S.46 juga hadir di situ kerana Dato' Najib dan rombongannya mahu berjumpa dengan Tunku seorang sahaja.

Apabila Dato' Najib tiba dan turun dari keretanya beliau ternampak Dato' Hj. Suhaimi dan Mazlan Harun.

Beliau memanggil saya serta memberitahu bahawa tidak akan masuk dan akan balik jika ahli-ahli S.46 berada di situ. Saya menjadi kelam kabut. Saya harus berbuat sesuatu untuk mengatasi keadaan secepat mungkin. Lagipun kalau diadakan juga pertemuan itu, sudah pasti tidak akan menghasilkan apa-apa. Sebaliknya akan mengeruhkan lagi keadaan.

Saya terus merapati Tunku yang sedang duduk di kerusinya. Saya berbisik kepadanya supaya dibenarkan Exco Pemuda UMNO menghadapnya dengan tidak ada wakil dari S.46. Alangkah lapangnya dada saya apabila Tunku ber-setuju. Kami semua masuk ke bilik makan di mana perjumpaan itu akan diadakan dan Dato' Najib mengajak saya duduk dekat beliau. Pertemuan yang berlangsung selama lebih kurang 2 jam itu dalam semangat muhibbah, scolah-olah anak-anak sedang berbual-bual dengan bapa yang telah lama tidak diketemui. Banyak perkara yang telah dibangkitkan tetapi saya tidak akan menuliskannya di sini. Apa yang jelas kepada saya ialah semua yang mengambil bahagian telah menunjukkan kasih sayang mereka kepada Tunku. Ada yang memeluk Tunku dan mencium tangannya dan ada juga yang cuba-cuba hendak bermanja dengannya di waktu itu. Saya lihat Tunku sangat bangga dengan lawatan Exco Pemuda itu dan sempat juga beliau bercerita tentang Tun Razak yang hendak menikah dengan Toh Puan Rahah di Johor Bahru. Semasa itu Tunku berada di hospital Bangsar dan apabila mendapat panggilan malam itu beliau 'men-curi-curi' keluar dari hospital dan terus menuju ke Johor Bahru dengan kereta malam itu juga.

Pertemuan Dato' Najib dan rombongan dengan Tunku berjalan dalam suasana yang baik dan penuh kemesraan.

Salah satu perkara yang ditimbulkan oleh Tunku ialah tentang perlantikan Ketua Pemuda dan Ketua Wanita. Tunku terang-terang berkata bahawa seelok-eloknya kedua kerusi tersebut dipilih oleh perwakilan seperti zaman beliau. Ini kata Tunku Pergerakan Pemuda dan Wanita boleh memainkan peranan yang berkesan sebagai sayap kanan kepada UMNO. Jika mereka dilantik maka kedua-dua pergerakan itu tidak boleh bergerak bebas serta memainkan peranan masing-masing dengan positif.

Sewaktu hendak balik beberapa orang Pemuda menghampiri saya menyatakan yang mereka bertuah dapat bertemu dengan Tunku dan mengatakan Tunku jauh dari 'nyanyuk'. Kata mereka Tunku masih '*very alert and sharp*' pemikirannya.

Sesudah itu Dato' Najib memberitahu saya bahawa Pergerakan Wanita UMNO juga berhasrat menemui Tunku. Sekali lagi saya duduk dengan Tunku dan beliau berkata bahawa beliau tidak ada "gaduh" dengan Wanita. Katanya, Wanita sudah banyak berbudi dan menolong beliau dan UMNO. Tunku memuji peranan Wanita UMNO. Hari pertemuan Tunku dengan Pergerakan Wanita UMNO pun ditetapkan.

Sesudah pertemuan itu diadakan saya telah menulis kepada Dato' Najib mengucapkan tahniah dan terima kasih kerana telah berjaya dengan misinya. Dalam pada itu saya juga meminta beliau supaya memujuk Dr. Mahathir pergi menghadap Tunku kerana jalan sudah terbuka dan Tunku pun telah berkata yang beliau sedia menemui Dr. Mahathir apabila disoal oleh pemberita selepas pertemuan Dato' Najib dengan Tunku.

PERGERAKAN EXCO PEMUDA UMNO MENGHADAP TUNKU

Dalam pada itu pula saya telah mengesyorkan kepada Tunku supaya menerima Dr. Mahathir jika beliau sungguh-sungguh mahu menghadapnya.



Gambar beramai-ramai Pergerakan Exco-Pemuda UMNO dengan YTM Tunku Abdul Rahman Putra Al-haj yang telah dirakamkan sesudah pertemuan Pergerakan itu dengan YTM Tunku. kelihatan dalam gambar ini juga ialah Dato' Seri Najib Bin Tun Razak yang mengetuai perjumpaan tersebut. Juga kelihatan ialah penulis yang berdiri di sebelah kiri sekali memakai kot hitam



Gambar-gambar diambil ketika Pergerakan Exco Pemuda UMNO mengunjungi YTM Tunku di kediamannya.



Gambar-gambar kenangan semasa rombongan Pergerakan Exco-Pemuda UMNO menghadap Tunku.

PERGERAKAN WANITA UMNO MENGHADAP TUNKU

Beberapa hari selepas Pergerakan EXCO Pemuda UMNO yang diketuai oleh Dato' Seri Najib menghadap Tunku, saya telah diberitahu oleh Dato' Najib di Pejabatnya bahawa Pergerakan Wanita UMNO juga ingin membuat kunjungan muhibbah kepada Tunku. Dato' Najib telah meminta saya supaya menyampaikan hasrat tersebut kepada Tunku.

Menyedari bahawa itu adalah petanda baik dan satu lagi cara untuk merapatkan orang-orang Melayu yang telah berpecah, saya dengan tidak berlengah-lengah lagi telah menghadap Tunku yang pada masa itu berada di Kuala Lumpur.

Saya telah memberitahu Tunku tentang hasrat Wanita UMNO itu yang mana saya katakan sangat berhasrat menemui Tunku kerana mereka sudah lama tidak melihat Tunku dan ada pula di antara mereka belum pernah berjumpa dengan Tunku. Saya telah juga memberitahu Tunku bahawa WANITA sangat menghormati Tunku dan masih sayang kepada Tunku sebagai seorang tua dan Bapa Kemerdekaan.

Tunku menjawab dengan baik dan saya perhatikan beliau gembira yang WANITA masih ingat kepadanya. Tunku pun berkata bahawa beliau tidak ada gaduh apa-apa dengan WANITA kerana kata beliau lagi kaum ibulah yang banyak membantunya semasa beliau menjadi Perdana Menteri dan semasa beliau hendak mendapatkan kemerdekaan Tanah Melayu. Tambah beliau lagi bahawa kaum ibu telah banyak berkorban untuk bangsa dan tanahair dan mereka lah yang telah sanggup mengadaikan barang-barang kemas mereka untuk menambah wang bagi beliau dan rombongannya pergi ke London untuk menuntut kemerdekaan bagi Tanah Melayu dari kerajaan British.

Tunku telah menetapkan hari perjumpaan tersebut yang akan diadakan di kediaman Tunku iaitu di tempat yang sama di mana perjumpaan Pergerakan Exco Pemuda UMNO diadakan beberapa hari sebelumnya. Hanya kali ini tidak ada sesiapa yang datang dari Parti Semangat 46.

Kedatangan Wanita UMNO yang diketuainya oleh Naib Ketua Dato' Napsiah Omar bersama rombongan seramai tidak kurang daripada 12 orang itu telah saya sambut di pintu kediaman Tunku. Di antara yang turut hadir ialah Tan Sri Aishah Ghani, Puan Habshah Hj Osman, Setiausaha Pergerakan Wanita, Senator Mazidah Zakaria, Ahli

Jawatankuasa Pergerakan Wanita, Puan Norma Kamaruddin, Timbalan Pengurus Tetap Pergerakan Wanita, dan Puan Asiah Ahmad, Ahli Jawatankuasa Pergerakan Wanita. Ketua Pergerakan Wanita UMNO, Datin Seri Paduka Rafidah Aziz tidak kelihatan. Saya diberitahu bahawa beliau sedang berada di luar negeri pada waktu itu.

Setelah bersalaman dengan semua anggota WANITA saya pun mengiringi mereka masuk ke dalam di mana Tunku sedang menunggu ketibaan mereka dengan perasaan riang kerana "anak-anaknya" yang telah hilang begitu lama sudah kembali untuk menemui beliau.

Tunku dan rombongan WANITA telah duduk di meja panjang di mana minuman ringan telah disediakan oleh Tunku untuk menjamu mereka. Selain dari Tunku dan rombongan wanita itu tidak ada orang lain yang hadir melainkan saya seorang. Saya telah mendengar segala perbualan Tunku dengan rombongan WANITA itu. Di sinilah saya dapat menyaksikan betapa Wanita UMNO sangat menghormati Tunku dan Tunku sangat menghormati Wanita UMNO. Perbualan itu berjalan dengan baik dan Tunku yang sememangnya terkenal dengan lawak jenakanya berkali-kali membuatkan WANITA gelak ketawa.

Dato' Napsiah Omar, Tan Sri Aishah Ghani dan Puan Habshah Hj. Osman, telah cuba memujuk Tunku supaya beliau menjadi orang tengah di antara pihak-pihak yang berpecah kerana kata mereka Tunku adalah orang yang sangat layak menjalankan tugas itu memandangkan bahawa Tunku adalah bekas Perdana Menteri yang pertama dan juga bekas Presiden UMNO lama. Tunku menghargai segala kata-kata yang diberikan kepada beliau seraya menerangkan ketidakpuasan hatinya dalam beberapa perkara seperti yang telah

diterangkan kepada Exco-Pemuda UMNO sebelumnya. Bagaimanapun Tunku tidak sekali-kali menutup jalan perundingan dan sedia memikirkan apa yang telah disarankan oleh rombongan Wanita UMNO itu. Dalam sidang akhbar yang diadakan selepas pertemuan itu, Dato' Napsiah telah menjelaskan tentang kunjungan Wanita UMNO itu dan harapan mereka. Tunku pun berkata bahawa pertemuan yang pertama itu telah membuka jalan dan beliau berharap banyak lagi perjumpaan seperti itu diadakan dari masa ke semasa untuk mencari perpaduan Melayu.

Sebelum meninggalkan Tunku rombongan Wanita UMNO telah meminta Tunku supaya hadir di Hari Wanita yang ke 40 yang akan diadakan pada 15 November, 1989 pukul 2.30 petang di PWTC. Tunku berkata bahawa beliau akan memikirkannya dan sebelum mereka beredar dari situ Dato' Napsiah bertanya sama ada boleh diadakan press interview. Saya pun bertanyakan kepada Tunku yang mana tidak berkeberatan untuk mempersetujui permintaan itu. Selepas itu mereka meninggalkan Tunku dengan perasaan puas hati yang amat sangat kerana mereka telah dapat menemui orang yang mereka sanjung tinggi dan sayangi selama ini. Selepas mereka berlepas pulang Tunku telah menyatakan kepada saya tentang perasaan gembira beliau yang amat sangat kerana beliau masih diingati dan dihormati oleh kaum ibu.

Ada pepatah lama yang berbunyi: "Tangan yang menghayun buaian itu boleh menggegarkan dunia". Setidak-tidaknya yang empunya tangan ini telah turut sama menciptakan perpaduan sesama bangsa dan agama.



Pergerakan Wanita sedang asyik mendengar penerangan dari YTM Tunku
nenghadap Tunku. Gambar bawah YTM Tunku sedang memberi ulasan
berita tentang perbincangan beliau dengan Pergerakan Wanita.



Dato' Napsiah Omar, Timbalan Pergerakan Wanita UMNO, duduk dengan begitu tertip mencium tangan YTM Tunku sebelum meninggalkan pemimpin agung itu.

DR. ABDUL GHAFAR BIN BABA

Saya sudah cuba berkali-kali hendak menemui Dr. Ghafar Baba, iaitu Timbalan Perdana Menteri tetapi tidak berhasil kerana beliau dikatakan seperti "gasing" yang sentiasa berpusing. Beliau mempunyai tenaga yang berlebihan yang entah dari mana diperolehi oleh beliau. Begitu juga Dr. Mahathir. Beliau seperti mempunyai "super-power", berkejar ke sana-sini untuk menemui rakyat dan membuat berpuluhan ucapan. Tetapi saya fikir orang politik seperti Dr. Mahathir dan Dr. Ghafar sama juga seperti Tunku. Saya katakan begitu kerana apabila tidak berkempen dan berhujah seluruh anggotanya akan menjadi lemah dan tidak bermaya tetapi apabila berpolitik, semua anggotanya bergerak seperti orang muda. Sakit-sakitpun boleh juga

berkempen, jadi kita mesti faham dari mana datangnya tenaga itu.

Saya sepatutnya menemui Dr. Ghafar pada jam 11 pagi, 25 Jun, 1989 setelah diaturkan oleh kawan lama saya, Encik Alias Mohamad iaitu Setiausaha Akhbar beliau yang tahu benar tentang perjuangan saya selama ini. Beliau memberi perangsang kepada saya supaya meneruskan usaha-usaha saya yang murni itu. Bagaimanapun, saya tidak dapat menemui Dr. Ghafar pada tarikh yang ditetapkan itu, kerana anak perempuan kesayangan beliau, Allahyarhamah Kartini meninggal dunia. Semua ini adalah kehendak Allah SWT. Akhirnya, saya dapat menemui Dr. Ghafar tetapi bukan di pejabat sebaliknya di kediaman beliau untuk mengucapkan takziah saya yang amat sangat.

Saya faham dengan perasaan beliau pada ketika itu. Beliau kehilangan seorang anak perempuan yang amat disayangi yang selalu menghiburkan beliau semasa beliau di dalam kesunyian dan runsing. Dr. Ghafar berkata beliau tahu yang saya dijangkakan patut menemui beliau pada hari itu, tetapi disebabkan kemalangan anaknya itu, beliau berkata saya boleh bercerita dengan beliau pada ketika itu juga. Saya menerangkan kepada beliau bahawa apa yang hendak saya sampaikan penting tetapi saya boleh tunggu di masa yang lebih sesuai. Akhirnya, satu pertemuan lain telah ditetapkan dan saya pun berasa yakin hasil yang baik akan muncul daripada pertemuan saya itu.

Saya sudah siapkan segala apa yang hendak saya bincangkan dengan Dr. Ghafar. Saya telah meminta kepada Setiausaha Sulitnya agar dapat beliau memberikan masa yang lebih baik kepada saya kerana saya hendak berbincang panjang juga dengan Dr. Ghafar. Di antara isu-isu yang saya

hendak bangkitkan ialah tentang sikap Tunku yang saya tahu terhadap UMNO Baru dan cara-cara yang saya fikirkan mungkin boleh menyelesaikan masalah UMNO Baru dan UMNO Lama dan seterusnya dengan harapan membawa kepada penyatuan orang-orang Melayu. Saya telah berbin-cang dengan Tunku sebelumnya dan Tunku bersetuju tentang usaha saya itu. Apabila Dr. Ghafar dilantik oleh Dr. Mahathir sebagai Timbalan Perdana Menteri pada 10hb. Mei, 1986 saya telah mengirim surat kepadanya untuk mem-beri ucapan tahniah saya. Sambil itu saya juga ada menekankan di atas kebimbangan orang-orang Melayu ten-tang Dasar Ekonomi Baru yang belum mencapai matlamat-nya. Saya telah membuat rayuan kepada beliau supaya dapat menolong penjaga-penjaga dan usahawan-usahawan bumiputra yang menghadapi masalah dalam perniagaan mereka. Ini saya sebutkan oleh kerana saya kerap kali didatangi oleh peniaga-peniaga dan usahawan-usahawan Melayu meminta jasa baik saya untuk menolong mereka di mana yang boleh lebih-lebih lagi bersabit dengan masalah mereka dengan bank-bank.

Saya masuk ke bilik Dr. Ghafar setelah dibenarkan dan memberi salam. Dr. Ghafar menyuruh saya duduk dan terus bertanyakan sama ada saya masih bekerja dengan Tunku. Saya terperanjat juga mendengarkan pertanyaannya kerana sebenarnya saya tidak pernah bekerja dengan Tunku (sungguhpun satu penghormatan kepada saya jika dapat bekerja dengan YTM). Apa-apa tugas yang saya lakukan di masa-masa lalu hanyalah sekadar secara kebetulan. Sebelum sempat saya menerangkan tujuan sebenar kedatangan saya, telefon Dr. Ghafar berbunyi dan pemanggilnya

ialah Dr. Mahathir. Dr. Ghafar meminta maaf kerana tidak dapat meneruskan perbincangan dengan saya.

Apabila Dr. Ghafar tidak terpilih menjadi Timbalan Perdana Menteri oleh Allahyarham Tun Hussein Onn dan memilih Dr. Mahathir saya ada mendengar bahawa Dr. Ghafar berasa kecil hati, bukan kerana tidak terpilih tetapi Tun Hussein tidak memberitahunya sendiri sebaliknya menyampaikan perkara itu kepada Dr. Ghafar melalui Setiausaha Akhbarnya.

Tunku sebenarnya menghormati Dr. Ghafar kerana walaupun beliau tidak mempunyai latarbelakang pelajaran akademik yang tinggi, beliau sentiasa bekerja keras dalam setiap pilihanraya demi kemenangan parti. Ini terus-terusan dilakukan oleh beliau semenjak tahun lima puluhan lagi.

Apabila Dr. Mahathir memilih Dr. Ghafar sebagai Timbalan Perdana Menteri, Tunku mengucapkan syabas dan tahniah dan menyarankan supaya beliau dipanggil dengan nama yang penuh iaitu Abdul Ghafar bin Baba dan tidak Ghafar Baba sahaja. Ini disebabkan Abdul itu, mengikut Tunku, ada mempunyai hikmat dan ertinya sendiri.

Salah satu perkara yang saya tahu Tunku sebutkan kepada Dr. Mahathir ketika mereka bertemu pada 11 November, 1989, ialah tentang kedudukan Timbalan Perdana Menteri. Perkara itu saya ketahui kerana belum ini saya ada bertanyakannya kepada Tunku iaitu apakah persoalan lain yang akan diperbincangkan olehnya dengan Dr. Mahathir selain masalah perpaduan. Tunku menjawab beliau akan bertanya siapakah yang akan menggantikan Dr. Mahathir jika sekiranya perkara yang tidak baik berlaku ke atas dirinya. Perkara ini timbul kerana setiap kali Dr. Mahathir keluar negeri, beliau tidak melantik pemangku Per-

dana Menteri seperti biasa diperlakukan oleh Dr. Mahathir ketika Dato' Musa menjadi Timbalan Perdana Menteri dahulu.

Tunku bimbang tentang apa yang akan terjadi kepada negara jika sekiranya tidak ada pemangku Perdana Menteri. Tunku menjadi bertambah-tambah bimbang kerana melihatkan Dr. Mahathir bekerja begitu kuat dan jarang sangat berehat. Lagipun Dr. Mahathir sudah menjalani pembedahan jantung. Dalam pada itu Dr. Mahathir sibuk pula dengan Sidang Komanwel dan sangat mengambil berat tentang persediaannya dengan lawatan-lawatan ke tempat-tempat di mana persidangan itu akan diadakan untuk memastikan semuanya berjalan lancar. Begitu juga yang dilakukan oleh Dr. Mahathir apabila negara hendak mengadakan persidangan G-15.

Sebulan selepas pertemuan Dr. Mahathir dengan Tunku, Dr. Mahathir membuat pengesahan dalam satu perjumpaan di Johor bahawa jika sesuatu terjadi kepada beliau, Dr. Ghafar adalah orang yang sesuai mengambil tempatnya. Saya perhatikan Dr. Ghafar telah mula diberi pendedahan oleh Dr. Mahathir dengan menghantar beliau ke United Nation dan melawat negara-negara lain untuk menarik pelabur-pelabur asing. Saya percaya beliau mampu menerajui negara jika Dr. Mahathir membuat keputusan untuk bersara cepat.

Ada sedikit sahaja yang hendak saya sentuh tentang Dr. Ghafar. Beliau terkenal sebagai "Peace Maker" (Pencipta Perdamaian). Di masa yang sudah-sudah sekiranya ada sahaja masalah pergeseran dalam parti-parti komponen BN, atau di antara parti-parti komponen, Dr. Ghafarlah yang selalu tampil ke muka untuk menyelesaiannya dan cam-purtangan beliau selalunya berhasil dan berjaya.

Tetapi yang menghairankan banyak orang ialah mengapa Dr. Ghafar tidak berbuat sesuatu apabila parti UMNO telah dilanda kemelut? Tidak ada usaha yang sungguh-sungguh dilakukannya selain meminta pihak-pihak yang bersengketa melupakan masalah-masalah lalu dan bina kehidupan baru. Dalam kemelut UMNO yang lalu beliau telah turut sama mengecam pemimpin-pemimpin Melayu termasuk Tunku. Ada pula orang yang memberitahu saya bahawa Dr. Ghafar pernah berkata sesuatu kepadanya sewaktu di padang golf. Tetapi saya tidak percaya Dr. Ghafar pernah berkata begitu kerana beliau tahu benar-benar bahawa "UMNO itu Melayu dan Melayu itu UMNO". Sememangnya ada orang-orang yang tidak senang hati dengan Dr. Ghafar dan sampai hati menuduh Dr. Ghafar dengan cerita-cerita yang bukan-bukan untuk merosakkan perhubungan beliau dengan lain-lain pemimpin.

Dr. Ghafar sudah melalui 25 pilihanraya dan menang dalam kesemua pertandingan. Dalam Pilihanraya Umum yang baru lalu Dr. Ghafar menang lagi dengan jumlah undi yang bertambah. Beliau masih juga menjadi Ahli Majlis Tertinggi UMNO. Ini bermakna beliau adalah orang yang paling lama sekali dalam MKT jika dibandingkan dengan ahli-ahli lain. Pendek kata, semua ini pertanda baik bagi Dr. Ghafar. Manalah tahu rezeki itu di tangan Tuhan, apa sahaja boleh jadi jika ia merestui sesuatu itu.



dua pemimpin di atas ini iaitu YTM Tunku Abdul Rahman Putra Al-Haj dan Timbalan Menteri, Dr Ghafar Baba, sedang ketawa riang apabila bertemu di Kementerian Luar di mana YTM Tunku telah dianugerahkan dengan pingat HONORARY COPANION IN THE ORDER OF AUSTRALIA oleh kerajaan Australia pada tahun 1986. Di belakang YTM Tunku ialah Menteri Luar Negeri, Dato' Rais Yatim dan di sebelah YTM Tunku ialah Pesurhjaya Tinggi. Beginilah keadaan pemimpin-pemimpin Melayu yang kita harapkan supaya semuanya baik-baik antara satu dengan lain.



Dato' Seri Rafidah Aziz sedang menghadiahkan Dr. Ghafar Baba sebuah cenderamata di Hari Wanita Ke 40 disaksikan oleh 3 orang Perdana Menteri.



Dr. Ghafar sedang membaca tentang anaknya Kartini meninggal dunia.

Pada hari itu sepatutnya penulis membincangkan dengan Dr. Ghafar tentang Perpaduan Melayu di pejabatnya.



Gambar yang bersejarah ini diambil seketika penulis menghadap YTM Tunku Abdul Rahman Putra Al-haj di kediamannya 'Takdir' pada 4 November '89 di Pulau Pinang. Ketika itulah penulis menyampaikan 'message' daripada YAB Dato Seri Dr. Mahathir Mohamad yang berhasrat menemui YTM Tunku untuk perpaduan orang-orang Melayu. Gambar yang diambil pada 8.30 pagi itu menunjukkan YTM Tunku sedang mendengar dengan khusyuk pesanan yang disampaikan oleh penulis.



Penulis sedang mengiringi YTM Tunku masuk ke pejabatnya di Wisma Central di Hari Keputeraan Tunku yang ke-83. Ketika itu Tunku tidak berapa sihat tetapi beliau hadir juga kerana tidak mahu mengecewakan sahabat-sahabat lamanya.



Hari Keputeraan YTM Tunku yang ke-85 telah diadakan di kediaman Tunku di Kuala Lumpur. Kelihatan dalam gambar ini penulis sedang menerangkan sesuatu kepada Tunku tentang gambar yang dihadiahkan oleh penulis. Juga kelihatan ialah Tun Omar Ong Yoke Lin dan Duta Arab ke Malaysia.

MERAIKAN HARI KEPUTERAAN TUNKU

Saya teringat kepada zaman Tunku dan juga zaman Allahyarham Tun Abdul Razak dan Allahyarham Tun Hussein Onn semasa mereka menjadi Perdana Menteri. Orang-orang Melayu khususnya ahli-ahli UMNO akan mengunjungi mereka pada harijadi mereka. Di antara orang-orang yang datang itu ada yang membawa buah tangan seperti hadiah dan lain-lain sebagai ingatan dan menunjukkan kasih sayang mereka kepada pemimpin. Dan tidak ketinggalan pula ada yang membawa pulut kuning, iaitu mengikut lazimnya adat resam orang-orang Melayu.

Tetapi disebabkan perpecahan di antara orang-orang Melayu yang telah berpecah kepada dua pihak itu, maka

amalan ini nampaknya tidak lagi diteruskan. Orang-orang Melayu dan UMNO sudah melupakan pemimpin-pemimpin mereka dan pada tiap-tiap Hari Keputeraan Tunku misalnya, Tunku akan keseorangan diri. Tetapi Tunku tidak pernah mengeluh atau menyuarakan perasaannya yang sebenar. Bagaimanapun, kita boleh mengagak bahawa di dalam hati kecilnya sudah tentu berbisik, "Mana pergi sahabat-sahabat dan penyokong-penyokong saya dahulu termasuklah orang-orang yang pernah saya sokong, tolong atau naikkan pangkat mereka ataupun yang meminta tolong supaya mereka tidak disingkirkan." Sungguh sedih apabila kita melihat seorang pemimpin teragung kita dilupakan begitu sahaja. Apakah orang-orang Melayu cepat melupakan jasa seseorang lebih-lebih lagi orang yang telah banyak berkorban untuk negara, bangsa dan agamanya? Menyedari akan perkara ini, saya telah membuat keputusan untuk meraikan Tunku pada Hari Keputeraan beliau yang ke 85 tahun di pejabat saya. Saya telah menjemput balu Allahyarham Tun Dr. Ismail, iaitu Toh Puan Norasikin serta anaknya Taufik, balu Allahyarham Dato' Suleiman bin Dato' Abdul Rahman, Datin Petom serta keluarganya.

Pada hari keputeraan Tunku yang ke 85 tahun itu saya telah menghadiahkan beliau dengan tiga pasang suit. Walaupun beliau tidak berasa sihat semasa itu beliau tidak mahu menghamparkan saya dan keluarga saya. Kami sekeluarga sungguh kasihan terhadap Tunku. Sewaktu menyambut Hari Keputeraan beliau itu kami telah menyediakan pulut kuning untuk beliau. Saya sempat memberi sepathah dua kata sebagai mengingati beliau serta memberi sanjungan terhadap perjuangan beliau serta hasrat beliau untuk menyatupadukan orang-orang Melayu. Di masa per-

jumpaan itulah Tunku berkata bahawa beliau tidak mahu campur lagi akan hal-hal UMNO apabila melihat ahli-ahli UMNO tidak mahu bersefakat.

Tun Dr. Ismail ialah Timbalan Perdana Menteri semasa Tun Abdul Razak menjadi Perdana Menteri yang kedua selepas Tunku. Kita tidak sempat melihat kepimpinan Tun Dr. Ismail, kerana beliau meninggal dunia sebelum mendapat peluang menjadi Perdana Menteri. Saya adalah salah seorang yang mula-mula tiba di kediamannya di Bukit Kenny sebaik sahaja mendapat berita yang beliau telah meninggal dunia dengan mengejut disebabkan diserang penyakit jantung. Tun Dr. Ismail adalah seorang yang disegani dihormati dan disayangi oleh orang ramai. Beliau jugalah orang yang hendak menangkap Lee Kuan Yew pada satu ketika kerana dasar-dasar "Malaysian-Malaysia" nya yang ditentang hebat oleh orang-orang Melayu.

Abang kepada Tun Dr. Ismail ialah Dato' Suleiman. Beliau sangat rapat dengan Tunku dan Tunku pula sangat sayang kepadanya. Kedua-dua adik beradik ini adalah penyokong kuat Tunku. Pada tahun 1969 sewaktu meletusnya pergaduhan kaum, Tun Dr. Ismail, walaupun telah bersara dari kerajaan di atas sebab-sebab kesihatan, telah menawarkan dirinya semula untuk masuk kabinet yang mana Tunku menerima dengan segala senang hati dan dengan tangan terbuka. Dato' Suleiman pula ialah orang yang mengalahkan Allahyarham Dato' Onn Jaafar dalam pilihanraya di Johor Bahru dengan undi yang terbanyak. Semasa itu Dato' Onn Jaafar menerajui Parti Negara sesudah meninggalkan UMNO kerana tidak berjaya menjalankan dasar "pintu terbuka" UMNO kepada bukan bumiputera.

Dato' Suleiman pula yang ketika itu menjadi Menteri Dalam Negeri tetapi disebabkan kesihatannya melarang beliau bergerak aktif dalam kerajaan waktu itu. Walau bagaimanapun oleh kerana Tunku memerlukan jasa beliau, maka Tunku telah menghantar beliau ke Canberra, Australia untuk memegang jawatan sebagai Pesuruhjaya Tinggi Malaysia di sana. Di Australialah saya mula berkenalan dengan beliau, iaitu semasa saya menuntut di sana. Sesudah tamat pengajian saya, Dato' Suleiman telah mengambil saya bekerja sebagai Pembantu Peribadi beliau. Sebelum beliau meninggal dunia beliau telah mengajak saya pergi ke Melbourne dari Canberra yang jauhnya lebih kurang 300 batu. Beliau menyuruh saya memandu kereta. Kami diiringi oleh Datin Petom serta anak angkat perempuan mereka yang sekarang ini menjadi isteri saya. Apa yang saya tidak boleh lupakan ialah Dato' Suleiman cepat marah. Tetapi beliau secepat itu pula akan meminta maaf jika beliau terasa beliau bersalah. Beliau suka duduk di belakang sewaktu saya memandu. Memahami akan sifatnya yang pemanas itu membuatkan saya selalu dalam kelam kabut apabila beliau berada di dalam kereta.

Pada suatu hari beliau terpaksa menghadiri satu jamuan makan tengahari di Melbourne. Sewaktu sedang memberi ucapan, beliau telah rebah. Saya yang ketika itu sedang berada di rumah telah berkejar ke hospital dan melihat beberapa orang doktor cuba menyelamatkan nyawa beliau tetapi tidak berhasil. Mayat Allahyarham telah dibawa ke Canberra untuk diberi penghormatan terakhir sebelum diterbangkan ke Johor Bahru. Saya ada bersama-sama memandikan mayat beliau. Allahyarham telah disemadikan di Johor Bharu, tempat kelahirannya dan makamnya tidak

jauh dari makam Dato' Onn Jaafar. Tunku turut serta memberikan penghormatan terakhir.

Kematian Dato' Suleiman dianggap sebagai satu kehilangan yang dirasai oleh negara kerana beliau turut bersama-sama dengan lain-lain pejuang Melayu berjuang untuk kemerdekaan negara. Setiap kali Tunku ke Johor Bahru sudah pasti Tunku akan singgah atau bermalam di rumah Dato' Suleiman. Disebabkan tidak cukup katil, Dato' Suleiman akan memberikan katilnya kepada Tunku dan beliau sendiri tidur di lantai bersama anak-anaknya. Pada hari keputeraan Tunku yang ke 85 tahun itu saya telah menghadiahkan beliau dengan tiga pasang suit. Walaupun beliau tidak berasa sihat semasa itu beliau tidak mahu menghampakan saya dan keluarga saya. Kami sekeluarga sungguh kasihan terhadap Tunku. Sewaktu menyambut Hari Keputeraan beliau itu kami telah menyediakan pulut kuning untuk beliau. Saya sempat memberi sepatuh dua kata sebagai mengingati beliau serta memberi sanjungan terhadap perjuangan beliau serta hasrat beliau untuk menyatupadukan orang-orang Melayu. Di masa perjumpaan itulah Tunku berkata bahawa beliau tidak mahu campur lagi akan hal-hal UMNO apabila melihat ahli-ahli UMNO tidak mahu bersefakat.

Setelah UMNO diharamkan oleh Mahkamah dan orang-orang Melayu semakin berpecah, saya telah menjemput Tunku ke rumah saya untuk menyambut Hari Keputeraan beliau yang ke-86. Saya sedar bahawa perbuatan saya itu akan disalahertikan oleh sebilangan orang-orang yang tertentu, tetapi saya berbuat begitu sebagai menghormati beliau iaitu sebagai orang tua yang kesunyian yang saya anggap sebagai bapa sendiri, bekas pemimpin orang

Melayu, Bapa Kemerdekaan dan sebagai kenalan lama saya. Tetapi apa yang saya anggap sama pentingnya ialah ketika itulah buat saya menyuarakan pendapat saya tentang perpecahan orang-orang Melayu dan untuk mengingatkan beliau kepada perbincangan saya dengan beliau di Pulau Pinang pada bulan Mac, 1987 itu di mana Tunku sendiri telah menyuarakan pandangan beliau bahawa "UMNO itu Melayu dan Melayu itu UMNO". Sebelum pertemuan dan sambutan itu diadakan saya telah memikirkan juga, selain dari orang-orang masjid, siapa-siapa lagikah yang patut saya jemput. Disebabkan saya hendak mencari perpaduan orang-orang Melayu, saya mahu menjemput orang-orang yang memihak kepada Tunku dan juga yang memihak kepada Dr. Mahathir. Sekiranya orang-orang ini dapat dipertemukan dan berbincang bagaimana orang-orang Melayu dapat bersatu semula alangkah baiknya. Tetapi setelah berfikir panjang dan memandangkan rumah saya sangat kecil untuk menjemput semua sekali datang, saya putuskan untuk memanggil sepihak-sepihak dahulu sebelum dijemput kedua-dua pihak dalam satu jemputan khas. Buat kali ini saya menjemput orang-orang yang memihak kepada Tunku yang juga adalah kenalan-kenalan saya. Mereka yang hadir ialah Puan Marina Yusof, Dato' Rais Yatim dan Dato' Harun Idris. Datin Paduka Rahman dan Ku Li tidak dapat datang kerana ada urusan lain di saat akhir.

Dalam majlis yang tidak sepertinya itu, saya telah berucap mengalud-alukan kedatangan Tunku serta mengingatkan kepada para hadirin akan jasa-jasa Tunku. Saya lihat Tunku sangat berpuas hati dan berbangga dengan apa yang saya sebutkan tentang dirinya. Selain dari memuji Tunku tentang kejayaan beliau yang sudah-sudah, saya juga men-

gambil kesempatan itu (biarpun berhadapan dengan orang-orang Semangat 46 yang kuat) untuk meminta Tunku dan lain-lain pemimpin yang ada pada malam itu supaya mencari jalan untuk bersatu semula dan melupakan perkara-perkara yang telah berlaku di masa-masa lalu. Saya telah memperingatkan mereka tentang apa yang saya lihat sebelum pertandingan memilih pemimpin-pemimpin UMNO yang berlangsung pada tahun 1987 itu. Saya memberikan pandangan saya tentang peristiwa-peristiwa yang saya lihat dan menyatakan bahawa sekiranya perkara ini berterusan saya sungguh khuatir tentang apa yang akan berlaku kepada bangsa Melayu. Saya agak tentu para hadirin terutamanya pemimpin-pemimpin Semangat 46, terkejut dengan kata-kata saya itu kerana mengambil kesempatan pada majlis Hari Keputeraan Tunku itu untuk berkempen atau menimbulkan hal-hal politik. Tetapi syukur alhamdullillah kerana ucapan saya itu disambut baik oleh Tunku dan lain-lain yang hadir.

Tunku sambil duduk telah juga berucap di majlis itu. Beliau telah menyuarakan perasaan beliau tentang apa yang sedang berlaku serta tentang kesannya kepada orang ramai dan negara. Beliau merasa amat tidak senang akan peristiwa-peristiwa itu. Beliau mengucapkan terima kasih kepada saya serta keluarga kerana masih mengingati beliau walaupun beliau sudah begitu uzur dan banyak orang sudah mula melupakan beliau dan ada yang sampai hati berkata beliau nyanyuk.

Tetapi sungguh malang. Apa yang diharap-harapkan tidak menjadi kenyataan kerana tidak lama selepas itu retak perpaduan orang-orang Melayu semakin ketara. Ini akhirnya

yang menyebabkan UMNO diharamkan oleh Mahkamah pada 4 Februari, 1988.

Segala yang telah saya tulis di atas adalah antara usaha-usaha saya untuk mencari perpaduan orang-orang Melayu biarpun saya menyedari risiko-risiko yang saya hadapi. Saya juga menyedari bahawa saya juga mempunyai kelemahan-kelemahan untuk mengatasi perkara-perkara tersebut. Namun demikian, saya tetap tabah menghadapinya dan akan terus berusaha seberapa yang boleh.



Kelihatan Dato' Seri Dr. Mahathir Mohamad dan Datin Seri Dr. Siti Hasmah bergambar bersama-sama di rumah penulis beberapa tahun yang lalu. Turut serta ialah Cik Engku Chesterina, isteri YAM Tunku Abdullah. Yang berdiri disebelah kanan sekali ialah isteri penulis.



Gambar menunjukkan penulis bersama-sama dengan sebahagian daripada rombongan Pergerakan Wanita UMNO semasa lawatan mereka



Gambar menunjukkan penulis dan isteri, Ramlah, sedang bergambar dengan YTM Tunku semasa Tunku berehat di hospital di Pulau Pinang pada Hari Keputeraan yang ke-87 pada 8 Februari, 1989. Sepatutnya Tunku berada di Kuala Lumpur pada hari tersebut untuk menyambut Hari Keputeraan beliau bersama-sama dengan pemimpin-pemimpin UMNO baru. Tetapi malang tidak berbau YTM Tunku jatuh sakit pada malam itu dan terpaksa dibawa ke hospital untuk diperiksa.

KESUNYIAN DI HARI KEPUTERAAN

Selepas diadakan pertemuan di antara pemimpin-pemimpin UMNO Baru dengan Tunku dan seterusnya Tunku bersetuju untuk menghadiri Perhimpunan Agung UMNO Baru semata-mata untuk menjalin silaturahim dan untuk mencari perpaduan orang-orang Melayu. Berbagai-bagai tohmahan telah dilemparkan kepada Tunku kerana Tunku telah membuat beberapa teguran terhadap UMNO Baru dan pemimpin-pemimpinnya. Ini adalah ekoran dari caci-caci yang ditujukan kepada Tunku oleh segolongan ahli-ahli UMNO di hari Perhimpunan Agung UMNO di mana Tunku telah menjadi tetamu agung. Tunku merasa amat tersinggung di atas kritikan-kritikan terhadap diri beliau. Saya

teruskan juga usaha saya untuk mencari jalan supaya pertemuan yang telah pun diadakan itu akan dapat menjalin semula persefahaman dan perpaduan.

Sebagai usaha ke arah itu saya telah menulis surat kepada Dato' Najib pada 10 Januari, 1990 dan juga kepada Dato' Mohamed Rahmat, kepada Datin Paduka Rafidah Aziz dan kepada Dr. Mahathir. dalam surat saya itu ada saya menyebutkan tentang hari Keputeraan Tunku yang ke 87 yang jatuh tidak beberapa hari lagi iaitu pada 8.2.89. Saya telah menyatakan bahawa itu adalah suatu masa yang amat baik dan sesuai untuk pemimpin UMNO Baru menunjukkan kepada Tunku bahawa semua yang dibuat oleh UMNO adalah jujur serta benar-benar mahu mencari persefahaman.

Saya mencadangkan supaya diadakan satu sambutan di Kuala Lumpur bagi menyambut hari Keputeraan Tunku itu. Kata saya lagi, saya merasa yakin bahawa Tunku akan merasa bangga kerana beliau diingati oleh pemimpin-pemimpin UMNO Baru. Lagipun Tunku baru sahaja beberapa bulan sebelumnya menjadi tetamu khas kepada UMNO Baru di hari Perhimpunan Agung UMNO. Saya menyatakan keyakinan saya iaitu sekiranya Tunku terus diberikan penghormatan serta diingati dalam usianya yang sudah lanjut serta uzur akan senantiasa menjadi sahabat kepada kita. Kita hendaklah memahami keadaan Tunku. Orang tua mudah tersinggung. Sekiranya kita melupakan beliau, ada sahaja pihak lain yang akan mengambil kesempatan menggunakan Tunku bagi kepentingan golongan atau partinya. Dan ada kemungkinan besar, Tunku dalam keadaannya sekarang mudah menganggap orang yang selalu menghampirinya adalah orang-orang yang baik dan sebaliknya orang-orang yang menjauahkan diri serta tidak

ambil berat terhadap dirinya akan dianggapnya orang jahat - orang yang tidak mengenang jasa kepada orang yang sudah banyak membuat jasa. Kalau difikir-fikirkan, amat mudah sahaja; kita hendaklah faham sedikit tentang ilmu jiwa - iaitu perasaan jiwa orang-orang tua. Kita hendaklah "apply psychology" sedikit.

Umpama Quran buruk. Jangan dibiarkan terletak di satu sudut. Jangan pula tidak dilihat langsung. Pengajaran di dalamnya tetap memberi munafaat.

Orang tua yang sudah banyak berjasa dengan Quran buruk tidak boleh dibandingkan sama. Tetapi sebagai tamsil ibarat amat memberikan kesan.

Dato' Najib telah bertanya kepada saya apa yang patut dibuat. Saya telah mencadangkan supaya disediakan pulut kuning seperti yang pernah dibuat oleh ahli-ahli UMNO Lama beberapa tahun sebelumnya. Saya juga telah memberitahu Setiausaha Kerja UMNO Baru Encik Yaakob Mohamed supaya beliau menyampaikan kepada Dato' Mohamed Rahmat akan cadangan saya itu.

Saya sungguh merasa lapang hati dan bangga kerana mereka telah menyambut baik cadangan saya itu dan saya akan memberitahu Tunku tentang perkara itu dengan secepat mungkin. Bagaimanapun saya telah mengetahui terlebih dahulu bahawa Tunku akan datang ke Kuala Lumpur untuk menyambut Hari Keputeraan beliau kali itu. Sebelumnya Tunku jarang menyambut Hari Keputeraannya di Kuala Lumpur kerana beliau merasa kesunyian dan lenggang jika diadakan di Kuala Lumpur disebabkan sahabat-sahabat lamanya tidak mengunjungi beliau lagi seperti satu ketika dahulu semasa beliau menjadi Perdana Menteri dan selepas beliau bersara dan badan masih kuat. Tambahan lagi

sekarang Tunku berada di pihak pembangkang jadi sahabat-sahabatnya yang pada satu ketika berada di sekeliling Tunku dan menunjukkan taat setia mereka sekarang tidak kelihatan lagi. Pelawat-pelawat yang datang pada hari Keputeraan beliau ialah ahli-ahli parti pembangkang. Ahli-ahli UMNO tidak kelihatan langsung. Apabila saya perhatikan itu saya sungguh sedih dan kecewa di atas sikap orang-orang Melayu yang lupa kepada beliau biarpun beliau berada dalam parti lain. Sepatutnya Tunku tidak boleh dilupakan di atas jasa-jasa beliau yang sudah-sudah. Dalam hati saya berfikir beginikah yang mungkin akan terjadi kepada Dr. Mahathir apabila beliau meninggalkan kerajaan nanti? Kerana sewaktu itu kemungkinan juga orangakan melupakan beliau langsung.

Sungguhpun semua rancangan telah diatur terlebih dahulu malangnya pada malam sebelum menyambut Hari Keputeraan Tunku itu Tunku telah dimasukkan ke hospital di Pulau Pinang kerana tidak sihat. Oleh itu sambutan bagi Tunku yang telah dirancangkan di Kuala Lumpur tidak dapat diteruskan. Walau bagaimanapun saya telah memberitahu dan Dato' Mohamed Rahmat supaya menghantar RTM untuk mengambil gambar Tunku di hospital. Saya merasa bangga kerana untuk perpaduan dan memberi penghormatan kepada Tunku, Dato' Mohamed Rahmat tidak mengham-pakan permintaan saya itu. Saya sendiri telah pergi ke Pulau Pinang dengan diiringi oleh isteri saya untuk menziarahi dan memberi ucapan Selamat Hari Keputeraan kepada Tunku. Sebelumnya saya juga ada meminta supaya UMNO Pulau Pinang menghantar satu rombongan ke hospital untuk mengucapkan Selamat Hari Keputeraan kepada Tunku tetapi saya berasa dukacita tidak ada seorang pun yang

datang. Yang ada ialah Tan Sri Taib Mahmud, Ketua Menteri Sarawak dan isterinya, Tengku Razaleigh, Lim Kit Siang, Mr. Pato dan lain-lain dari parti pembangkang.

Saya sungguh merasa amat dukacita kerana Tunku tidak dapat menyambut Hari Keputeraan beliau yang ke 87 di Kuala Lumpur bersama-sama dengan Pemimpin UMNO Baru seperti yang telah diatur dan rancangkan.



Tan Sri Abdul Taib Mahmud sedang melawat YTM di hospital Pulai Pinang di masa hari keputeraan YTM Tunku.



Tunku Abdul Rahman



YTM Tunku menyatakan sesuatu apabila menyambut ketibaan Queen Elizabeth dan suaminya Duke of Edinburgh.



Gambar di atas menunjukkan YTM Tunku Abdul Rahman Putra Al-Haj sedang mengatakan sesuatu kepada Ratu Elizabeth II semasa mereka berjumpa di Royal Commonwealth Club pada Oktober 20, 1989

Ketika itu baginda Ratu Elizabeth sedang melawat Malaysia sebagai tetamu khas negara dan untuk merasmikan Persidangan Komanwel yang diadakan di Kuala Lumpur pada bulan itu.

YTM Tunku telah memberitahu penulis bahawa baginda Ratu Elizabeth sendiri telah menyatakan hasratnya untuk menemui beliau. Pada mulanya Baginda Queen itu hendak mengunjungi Tunku di kediaman Tunku di Jalan Tunku di Kuala Lumpur tetapi Tunku merasakan lebih elok diadakan pertemuan itu di Royal Commonwealth Club. Tunku telah berkenalan dengan Baginda Queen semenjak tahun 1954 lagi dan semenjak itu mereka berdua kerap kali mengutus surat dan Tunku tidak lupa menghantar bunga kesukaan Baginda Queen iaitu bunga Orkid di hari lahirnya.

Gambar ini diambil sendiri oleh penulis ketika penulis menemui Baginda Queen itu.

MENGENANG BEBERAPA PEMIMPIN

Tun Dr. Ismail ialah Timbalan Perdana Menteri semasa Tun Abdul Razak menjadi perdana Menteri yang kedua, selepas Tunku. Tun Abdul Razak atau lebih dikenali dengan panggilan Tun sahaja itu adalah seorang pemimpin yang tidak tahu penat lelah. Beliau gemar bergaul dengan orang-orang kampung, bergaul dan bertanya tentang masalah-masalah mereka. Disebabkan beliau mementingkan pembangunan di kampung-kampung, beliau telah diberi gelaran Bapa Pembangunan.

Jika tidak kenal dengan beliau, orang akan mengatakan yang beliau sangat serius orangnya. Beliau pemikir orangnya. Tetapi Tun adalah seorang yang baik dan

mempunyai watak tersendiri. Apabila beliau jatuh sakit dan berubat di London banyak orang tidak tahu yang penyakit beliau itu sangat bahaya. Menurut seorang yang kenal baik dengan beliau, beliau tahu yang beliau hanya menunggu masa sahaja tetapi beliau tidak mahu menyusahkan orang lain sebelum beliau meninggalkan kita. Saya juga mendapat tahu bahawa Ku Li adalah diantara sehabatnya yang terakhir sekali menemui beliau di London.

Kematian beliau itu telah disambut dengan begitu sedih di negara kita. Tidak siapapun menyangka yang beliau akan pergi dengan begitu cepat kerana negara masih lagi memerlukan kepimpinan beliau. Saya berada bersama di Lapangan Terbang Subang untuk bersama-sama menyambut ketibaan jenazahnya dari London. Pada ketika itu Lapangan Terbang itu penuh sesak dengan orang ramai yang hendak memberi penghormatan yang terakhir. Saya bernasib baik dapat masuk terus ke tarmac bersama-sama dengan pemimpin-pemimpin negara iaitu Tun Hussein Onn, Dr. Mahathir dan lain-lain. DYMM Sultan Pahang pun ada berangkat sama. Semua yang ada di situ menunjukkan perasaan yang amat pilu kerana sudah kehilangan seorang pemimpin negara yang disayangi. Ketika jenazahnya diusung dari kapal terbang untuk dimasukkan ke kereta jenazah saya perhatikan ramai betul yang menitiskan air mata. DYMM Sultan Pahang telah memeluk Tun Hussein Onn dan telah menangis terisak-isak kerana Baginda Tuanku sangat sayang kepada Tun apatah lagi beliau anak Pahang Darul Makmur. Di hadapan saya semasa berjalan itu ialah Dr. Mahathir, Perdana Menteri kita sekarang. Beliau juga menangis terisak-isak kerana beliau sangat menghormati Tun. Apabila jenazahnya sampai di kediamannya, saya terus pergi ber-

jumpa dengan Dato' Seri Najib di biliknya di atas untuk memberi ucapan takziah saya.

Saya teringat benar kepada Allahyarham Tun kerana tiap-tiap hari jadi beliau, saya tidak akan ketinggalan mengunjungi beliau untuk bersama-sama mengucapkan selamat hari jadi. Tetapi pada hari jadinya yang ke-50 saya tidak dapat hadir. Saya mengirim sepucuk surat yang tidak sampai setengah muka pun, hanya untuk pengingati hari jadi beliau itu. Saya tidak menghantar apa-apa buah tanganpun. Alangkah terperanjat saya apabila menerima surat daripada Tun bertarikh 20 Mac 1972 yang ditulis dengan tangan beliau sendiri mengucapkan terima kasihnya kepada ingatan saya itu. Saya tidak menyangka langsung yang beliau ada masa menulis walhal beliau sibuk dengan urusan-urusan yang lain. Itulah Tun Abdul Razak, Perdana Menteri Malaysia yang berhati mulia.

Tentang Tun Dr Ismail pula, kita tidak sempat melihat kepimpinan beliau kerana beliau meniggal dunia sebelum mendapat peluang menjadi Perdana Menteri. Beliau sangat digeruni oleh orang kerana airmukanya yang jarang senyum. Beliau juga pemanas orangnya. Saya tidak kenal rapat dengan beliau selain dari mengenali beliau sebagai pemimpin UMNO yang elah banyak berjuang bersama-sama dengan Tunku. Mengikut buku yang ditulis oleh Tunku tentang diri Tun Dr Ismail beliau pernah mengugut hendak berhenti dari kabinet kerana tidak setuju dengan satu keputusan Tunku. Beliau pergi ke kediaman Tunku untuk memberi surat perletakan jawatan. Tunku bersembunyi dan memberi tahu pekerja yang Tunku tidak ada di rumah. Tun beredar dari situ tetapi timbul semula pada petangnya hendak menemui Tunku untuk memberitahu yang beliau ingin

hendak meletakkan jawatan. Tunku lagi sekali menyorok. Tun Dr. Ismail pun terus balik dengan perasaan hampa. Beberapa hari kemudian apabila bertemu dengan Tunku beliau tidak menyebut tentang hal itu lagi kerana beliau telah sejuk hatinya.

Tun Dr. Ismail adalah seorang yang dihormati dan disayangi oleh orang ramai. Beliau jugalah orang yang hendak menangkap Lee Kuan Yew kerana dasar-dasar "Malaysian-Malaysian"nya yang ditentang hebat oleh orang-orang Melayu.

Saya adalah salah seorang yang mula-mula tiba di kediamannya di Bukit Benny sebaik sahaja mendapat berita yang beliau telah meninggal dunia dengan mengejut disebabkan diserang penyakit jantung.

Abang kepada Tun Dr. Ismail ialah Dato' Suleiman. Beliau sangat rapat juga dengan Tunku dan Tunku pula sangat sayang kepadanya. Kedua-dua adik beradik ini adalah penyokong kuat Tunku. Dato' Suleiman pula ialah orang yang telah mengalahkan Allahyarham Dato' Onn Jaafar dalam pilihanraya di Johor Bahru dengan undi yang terbanyak. Semasa itu Dato' Onn Jaafar menerajui Parti Negara sesudah meninggalkan UMNO kerajaan tidak berjaya menjalankan dasar "pintu terbuka" UMNO kepada bukan bumiputera.

Dato' Suleiman pula, oleh kerana kesihatannya melarang beliau bergerak aktif dalam kerajaan waktu itu tetapi oleh kerana Tunku memerlukan jasa beliau, maka Tunku telah menghantar beliau ke Australia untuk memegang jawatan sebagai Pesuruhjawa Tinggi Malaysia di sana. Di Australialah saya mula berkenalan dengan beliau, iaitu semasa saya menuntut di sana. Sesudah tamat pengajian

saya, Dato' Suleiman telah mengambil saya sebagai Pembantu Peribadi beliau. Sebelum beliau menginggalkan dunia beliau telah mengajak saya pergi ke Melbourne dari Canberra yang jauhnya lebih kurang 900 batu. Beliau menyuruh saya memandu kereta. Kami diiringi oleh Datin Petom serta anak angkat perempuan mereka yang sekarang ini menjadi isteri saya. Apa yang saya tidak boleh lupakan ialah Dato' Suleiman juga seorang yang pemarah. Tetapi beliau secepat itu pula akan meminta maaf jika beliau terasa beliau bersalah. Beliau adalah seorang yang baik hati dan pemurah dan saya banyak terhutang budi kepadanya. Datin Peton pula telah membimbing saya menjadi seorang yang bertanggungjawab. Beliau suka duduk di belakang kereta sebagai 'back seat driver' sewaktu saya memandu. Memahami akan sifatnya yang cepat panas itu membuat saya selalu dalam kelam kabut apabila beliau berada di dalam kereta.

Pada suatu hari beliau terpaksa menghadiri satu jamuan makan tengahari. Sewaktu sedang memberi ucapan, beliau telah rebah. Saya yang ketika itu sedang berada di rumah telah berkejar ke hospital dan melihat beberapa orang doktor cuba menyelamatkan nyawa beliau tetapi tidak berhasil. Jenazah Allahyarham telah dibawa ke Canberra untuk diberi penghormatan terakhir sebelum diterbangkan ke Johor Bahru di mana jenazahnya disemadikan berdekatan dengan kubur Allahyarham Dato' Onn Jaafar. Saya ada bersama-sama memandikan mayat beliau. Allahyarham telah disemadikan di Johor Bahru, tempat kelahirannya dengan dihadiri oleh semua rakan seperjuangannya termasuk Tunku.

Pemergian Dato' Suleiman dianggap sebagai satu kehilangan yang dirasai oleh negara kerana beliau turut bersama-sama dengan lain-lain pejuang Melayu berjuang untuk kemerdekaan negara. Setiap kali Tunku ke Johor Bahru sudah pasti Tunku akan singgah atau bermalam di rumah Dato' Suleiman. Disebabkan tidak cukup katil, Dato' Suleiman sanggup memberikan katilnya kepada Tunku dan beliau sendiri tidur di lantai bersama-sama anak-anaknya.



Gambar ini diambil pada 26 Mac 1987, di rumah 'Takdir' iaitu kediaman YTM Tunku Abdul Rahman Putra Al-haj di Pulau Pinang. Gambar menunjukkan penulis sedang berbincang dan merayu kepada YTM Tunku agar beliau campurtangan untuk mengelakkan pertarungan di antara YAB Dato Seri Dr. Mahathir Mohamad dengan YBM Tengku Razaleigh Hamzah bagi Parti Presiden UMNO.



Gambar di atas menunjukkan betapa sedihnya Tuanku Sultan Pahang yang pada ketika itu menjadi Yang diPertuan Agong tatkala menyambut jenazah Allahyarham Tun Abdul Razak di Lapangan Terbang Subang. Tuanku tetap menangis dan memeluk Tun Hussein Onn yang menjadi Perdana Menteri ketika itu. Kemergian Tun Abdul Razak adalah satu kehilangan yang amat besar kepada negara, bangsa dan agama.

PERTEMUAN TUNKU DENGAN DR. MAHATHIR

Sesudah selesai dan berjaya mengadakan pertemuan di antara Pergerakan Exco Pemuda UMNO (baru) dan Tunku pada 20 Oktober 1989 itu, maka tujuan saya yang penting sekali ialah agar dapat saya menemukan Dr. Mahathir dengan Tunku secepat mungkin.

Saya yakin benar iaitu Tunkulah orang yang boleh menyatupadukan dan menyelesaikan masalah orang-orang Melayu dengan memainkan peranan sebagai orang tengah. Saya juga berasa yakin iaitu jika Tunku telah berjaya menarik dan menyatukan 40 negara Islam untuk menjadi ahli Secretariat Islam di Jeddah semasa Tunku menjadi Setiausaha Agung Secretariat tersebut, takkanlah Tunku

tidak boleh menyatupadukan anak-anaknya sendiri yang bersengketa.

Peluangpun telah terbuka luas dan hanya yang menjadi persoalan ialah bagaimana hendak mendapatkan kedua-dua pemimpin itu bersetuju untuk bertemu. Sayapun telah mendapat ilham dan meminta salah seorang dari ahli Exco Pemuda UMNO untuk bertanya kepada Tunku sama ada beliau bersetuju menemui Dr. Mahathir. Dengan desakan orang-orang Melayu yang memerlukan perpaduan, Tunku telah menyatakan kesediaannya semata-mata berusaha ke arah perpaduan.

Tidak lama selepas itu saya telah mendapat telefon dari pejabat Dato' Najib kerana beliau mahu menemui saya. Sayapun pergi dengan hati yang berdebar, apakah perkembangan baru yang akan diberitahu oleh Dato' Najib kepada saya. Dalam hati kecil saya sentiasa berdoa agar berita yang Dr. Mahathir sanggup menghadapi Tunku akan menjadi kenyataan. Sebelum itupun saya telah membisikkan kepada Dato' Najib supaya berbincang dengan Dr. Mahathir agar beliau juga sedia membuat pertemuan tersebut. Saya berasa sungguh lega dan bersyukur ke hadrat Illahi kerana segala hajat saya sudah dikabulkan apabila Dato' Najib memberitahu saya yang Dr. Mahathir ingin menghadap Tunku dengan secepat mungkin. Dato' Najib meminta saya menyampaikan hasrat Dr. Mahathir kepada Tunku. Selepas mengucapkan terima kasih dan berjanji akan berbuat apa sahaja untuk memastikan pertemuan itu dapat diadakan kerana peluang keemasan ini mungkin tidak akan berulang lagi.

Dengan tidak berlengah-lengah lagi, saya terus bertolak ke pejabat dan terus menelefon Tunku di Pulau Pinang.

Saya telah memberitahu Tunku tentang mesej yang penting itu dari Dr. Mahathir supaya disampaikan kepada Tunku. Tunku meminta saya datang petang itu tetapi saya tidak dapat berbuat demikian kerana tidak ada tempat kosong dalam kapalterbang. Tunku meminta saya supaya sampai pada pagi hari esoknya supaya dapat bersama sarapan pagi dengannya. Lagi sekali saya lihat Tunku mahukan perpaduan kerana beliau ingin tahu apa yang Dr. Mahathir hendak sampaikan kepadanya. Tunku sekali lagi memberi penghormatan kepada saya untuk menghadap beliau. Peristiwanya ada kaitan dengan perpaduan orang-orang Melayu, keamanan negara dan bangsa.

Saya bertolak pagi-pagi lagi dari rumah menuju ke Subang. Pada mulanya saya telah mengerjakan berbagai solat supaya diterangkan hati saya dan memberi petunjuk kepada saya untuk menghadapi Tunku dan meminta beliau menerima hasrat Dr. Mahathir yang saya percaya dibuat dengan hati yang ikhlas dan jujur.

Saya sampai di kediaman Tunku Takdir tepat pada pukul 8.30 pagi. Di Lapangan Terbang Pulau Pinang, saya mendapati kereta Tunku sedang menunggu untuk membawa saya ke kediaman Tunku. Tidak sempat saya ke hotel untuk memperkemaskan diri saya kerana saya tidak mahu lambat kerana saya tahu benar Tunku adalah seorang yang sangat mementingkan janjitemu yang tepat ataupun "*a stickler for punctuality*". Sewaktu saya tiba saya lihat Tunku sudah duduk di meja makan bersama seorang kawannya yang saya tidak kenal. Tunku telah memperkenalkan saya kepada sahabatnya itu sebagai menantu kepada Dato' Suleiman bin Dato' Abdul Rahman. Elok saya terangkan di sini bahawa isteri saya ialah anak angkat kepada Dato' Suleiman. Isteri

saya semasa kecil pernah menemani Dato' Suleiman berkempen dalam pilihanraya semasa zaman Tunku dengan menaiki lori yang dihias dengan sepanduk-sepanduk parti Alliance atau Parti Perikatan pada masa itu.

Sesudah menyedari bahawa ada yang penting yang hendak saya cakapkan kepada Tunku, maka sahabat Tunku itu pun beredar dari situ. Saya bertanya khabar kepada Tunku dan tentang kesihatannya.

Saya telah faham akan kebiasaan Tunku sehingga sekarang biarpun beliau tidak sihat, beliau akan bangun pagi-pagi hari untuk sembahyang subuh dan selepas itu beliau akan tidur semula sebelum sarapan pagi. Jadi semasa saya menghadap beliau pada pagi itu saya mendapati Tunku masih memakai gown tidur. Sesudah beliau habis sarapan, beliau pun pasang tape dan meminta saya menyatakan apakah pesan yang saya bawa dari Dr. Mahathir.

Sayapun menyampaikan pesanan Dr. Mahathir dengan seberapa baik yang boleh dan memberikan pandangan saya. Sesudah bercerita lebih kurang 2 jam, Tunku berkata bahawa beliau rasa berat hendak menerima kerana beliau adalah Penasihat kepada Parti Semangat 46.

Saya menjelaskan kepada Tunku iaitu saya menghormati kedudukan Tunku itu, tetapi saya menekan bahawa demi perpaduan orang-orang Melayu yang mana Tunku sendiri telah pernah tekankan kepada saya di pertemuan saya dengan beliau pada bulan April 1987 di meja yang saya, iaitu tentang apa yang akan terjadi jika berlaku percakaran di antara orang-orang Melayu. Saya nyatakan dan merayu, iaitu Tunku lah yang boleh berbuat sesuatu kerana Tunku masih dihormati sebagai orang tua. Lagipun, jika tidak ada 'communication' di antara S. 46 dan UMNO (Baru),

bagaimanakah perdamaian boleh dicapai? Saya juga menerangkan iaitu S. 46 dan UMNO (Baru) adalah dari rumpun yang sama, kesemuanya adalah orang Melayu yang sama-sama berjuang sebelum UMNO lama diharamkan. Tunku termenung buat seketika waktu memikirkan tentang apa yang saya suarakan. Kemudian Tunku menyatakan kesudiannya untuk menemui Dr. Mahathir. Tetapi untuk mendapatkan kedudukan yang jelas, Tunku meminta Dato' Najib menghadap beliau sewaktu Tunku berada di Kuala Lumpur.

Sebelumnya saya telah kerap kali bercakap dengan Dato' Najib melalui telefon tentang perbincangan saya dengan Tunku dan perbincangan saya itu akan disampaikan kepada Dr. Mahathir.

Selepas perbincangan itu, Tunku pun pergi berehat dan saya pun pergi ke hotel iaitu hotel yang sama di mana saya telah menginap apabila hendak menemui Tunku pada bulan April 1987 lalu. Saya kembali ke Kuala Lumpur pada malam itu juga dan terus menelefon Dato' Najib menerangkan tentang perkembangan dan permintaan Tunku agar beliau mengadap Tunku. Pertemuan Tunku dan Dato' Najib diadakan pada 6 November, 1989 untuk memutuskan hari pertemuan di antara Tunku dan Dr. Mahathir. Dalam pertemuan itu, hanya Tunku, Dato' Najib dan saya yang hadir. Dato' Najib sekali lagi memberitahu Tunku akan hasrat Dr. Mahathir itu maka di kala itu pulalah masa dan harinya ditetapkan untuk kedua Pemimpin Agung itu akan bertemu muka. Hanya tempat pertemuan yang penting itu belum dapat ditentukan pada waktu itu.

Bagaimanapun Dato' Najib memberitahu saya yang beliau ingin mengadakan perjumpaan tersebut di kediaman-

nya dengan membawa Dr. Mahathir ke sana dan Tunku pula akan juga di bawa ke sana.

Tetapi kemudian rancangan itu ditukar. Saya tidak tahu mengapa dan saya tidak kisah sangat di mana ia akan diadakan asalkan pertemuan itu dapat dijalankan dengan segera. Tunku pula menyatakan kepada saya yang beliau mahu pergi menemui Dri. Mahathir di pejabat atau di kediamannya di Sri Perdana. Katanya adalah lebih "molek" dan kedudukan Dr. Mahathir sebagai Perdana Menteri mesti dihormati.

Saya sampaikan hasrat ini melalui Dato' Najib untuk disampaikan kepada Dr. Mahathir. Dr. Mahathir pula tidak kurang mempunyai perasaan yang baik, terhadap orang tua lebih-lebih lagi seperti Tunku yang sudah uzur. Dr. Mahathir tidak membenarkan Tunku datang menemuinya tetapi sebaliknya beliau akan pergi mengadap Tunku di kediamannya. Saya pun memberitahu Tunku tentang perubahan itu. Tunku mengucapkan terima kasih kerana Dr. Mahathir sudi berbuat demikian yang katanya adalah melanggar "protocol".

Selain dari itu, Tunku telah bertanyakan apakah pakaian yang akan dipakai oleh Dr. Mahathir pada hari tersebut. Jika Dr. Mahathir pakai baju Melayu, Tunku juga akan berbuat demikian. Tunku juga hendak tahu apakah kegemaran Dr. Mahathir untuk minum pagi kerana Tunku tidak mahu 'spoil his lunch' dengan makanan yang berat-berat. Selidik punya selidik didapati Dr. Mahathir suka makan goreng pisang, maka Tunku pun mengarahkan supaya disediakan goreng pisang. Dalam pada itu, isteri saya pula telah menyediakan karipap dan lain-lain kuih untuk Dr. Mahathir.

Pada malam tersebut saya telah memanggil beberapa orang masjid untuk membaca doa agar pertemuan di antara Dr. Mahathir dan Tunku itu akan mendapat kejayaan seperti yang diharapkan oleh orang-orang Melayu kerana pertemuan itu sangat penting untuk menjalin silatulrahim di antara kedua pemimpin agung Melayu itu yang sama-sama berasal dari negeri Kedah. Begitulah harapan saya dan harapan orang-orang Melayu.

Pertemuan Dr. Mahathir dengan Tunku telah diadakan pada 11 November 1989 pada pukul 11.20 pagi. Dr. Mahathir tiba lambat sedikit kerana beliau terpaksa menghadiri pelancaran Amanah Saham Bumiputra di Pusat Perdagangan Dunia Putra.

Yang menggelikan hati juga ialah apabila Dr. Mahathir tidak sampai tepat pada pukul 11 pagi, pemberita meramalkan beliau akan tiba pada pukul 11.11 minit pagi menjadikan semuanya seperti 11 November 1989 pada pukul 11.11 minit pagi. Orang-orang suratkhabar pun memang suka membuat ramalan pelik-pelik.

Perjumpaan itu pada mulanya adalah sulit kerana Dr. Mahathir dan Tunku tidak mahu menghebuhan-hebuhankan pertemuan kedua mereka. Tetapi memanglah kerja pemberita mencari berita. Dan disiarkan oleh akhbarnya. Akhbar Utusan Malaysia telah menyiaran di muka depan tentang pertemuan itu. Yang peliknya, ia menyebut Tunku akan menemui Dr. Mahathir dan bukan sebaliknya. Tunku kurang senang dengan berita yang tidak benar itu dan dengar khabarnya Dr. Mahathir juga demikian.

Sebelum diadakan pertemuan yang bersejarah itu saya telah memberitahu Dr. Mahathir melalui surat tentang keadaan Tunku dan meminta Dr. Mahathir bersabar dan

janganlah bangkitkan apa-apa perkara yang berat atau bercakap dengan serius tetapi buatlah pertemuan tersebut seperti kita pergi berkunjung ke rumah seorang sahabat kita dan berbual-bual sambil lewa.

Dalam pada itu juga saya telah membisikkan kepada Tunku iaitu kedatangan Dr. Mahathir untuk menghubungkan silatulrahim dan meminta Tunku juga bersabar dan tidak meminta apa-apa pada kali ini. Tunku memberitahu saya supaya saya "jangan susah" kerana katanya beliau bukan hendak cari gaduh tetapi mencari perpaduan Melayu.

Hari yang ditunggu-tunggu akhirnya tiba. Saya dan Tuan Syed Hussein, iaitu menantu Tunku ada menunggu bersama-sama kedatangan Dr. Mahathir. Apabila keretanya sampai Dr. Mahathir keluar dan bersalaman dengan Tuan Syed Hussein. Apabila sampai giliran saya bersalaman saya terus memeluk Dr. Mahathir kerana kegembiraan dan air-mata saya pun mengalir di pipi. Saya bersyukur kepada Allah kerana apa yang saya usahakan selama ini berhasil juga dan saya seperti percaya dan tidak percaya sahaja menyaksikan semua ini berlaku di depan mata saya.

Saya temankan Dr. Mahathir ke pejabat Tunku yang terletak di belakang rumah Tunku di mana sudah sedia menunggu orang-orang akhbar dan tv.

Saya lihat Dr. Mahathir selamba sahaja dan tersenyum sewaktu sampai. Sambil berjalan itu saya tanyakan sama ada beliau membenarkan atau tidak orang merakamkan dengan video tentang pertemuan itu. Dr. Mahathir kata itu tidak mengapa.

Pertemuan mereka mengambil masa lebih kurang 40 minit dan tidak ada orang lain bersama mereka. Orang-orang

akbar dan tv telah diminta berada di luar setelah mereka membuat rakaman awal tadi.

Dato' Najib, Dato' Napsiah Omar dan saya menunggu di luar. Dato' Napsiah Omar nampaknya resah kerana takut mereka berdua akan bergaduh. Saya cuba mententeramkan beliau supaya jangan bimbang. Sewaktu mereka keluar kedua-duanya sedang ketawa riang.

Setelah Dr. Mahathir dan lain-lain beredar dari situ saya telah bertanya Tunku tentang apakah yang telah dibualkan sehingga mereka berdua ketawa riang. Katanya, tidak banyak hanya memberitahu Dr. Mahathir tentang kemahuan S.46, bertanyakan tentang siapakah yang bakal menggantikan atau mengambil tempat Dr. Mahathir nanti. Tunku telah memberitahu Dr. Mahathir iaitu jika ada apa-apa yang penting Dr. Mahathir bolehlah menelefonnya bila-bila masapun. Pada akhir pertemuan mereka Tunku telah menasihatkan Dr. Mahathir supaya membuat pertemuan dengan Ku Li.



Gambar ini diambil sejurus sebelum Dr. Mahathir datang menghadap YTM Tunku Abdul Rahman Putra Al-Haj di pejabat Tunku. Ketika inilah penulis membisikkan kepada YTM Tunku supaya beliau akan menyambut Dr. Mahathir sebagai anak menemui bapa dan tidak akan membangkitkan perkara-perkara yang hangat. Tunku berkata kepada penulis, "Tak pa Idris, saya bukan nak gaduh dengan dia. Saya hanya nak bincang



Gambar menunjukkan YAB Dato' Seri Dr. Mahathir Mohamad keluar dari kereta dan dipeluk oleh penulis ketika beliau tiba untuk menemui YTM Tunku di kediaman Tunku di Kuala Lumpur pada 11 November 1989. Disebabkan penulis begitu gembira dengan kesudian Dr. Mahathir itu menghadap YTM Tunku untuk perpaduan Melayu maka penulis telah memeluk Dr. Mahathir.

Gambar juga menunjukkan menantu YTM Tunku, Tuan Syed Hussein sedang menyambut dan mempersilakan Dr. Mahathir.



Dato' Seri Dr. Mahathir diiringi oleh penulis dan Tuan Syed Hussein, anak menantu YTM Tunku, menuju ke Pejabat Tunku di mana perundingan mereka diadakan. Dr. Mahathir kelihatan sedang senyum dan relex sahaja sungguhpun itulah pertama kali kedua pemimpin itu akan bertemu untuk membincangkan PERPADUAN melalui PERDAMAJAN.

PERTEMUAN DI ANTARA DR. MAHATHIR DENGAN KU LI

Selain dari pertemuan Dr. Mahathir dengan Tunku yang bersejarah itu pertemuan di antara Dr. Mahathir dengan Ku Li juga sangat-sangat ditunggu-tunggu oleh semua. Ini disebabkan kedua pemimpin ini berada di kem yang bertentangan - satu mengetuai parti UMNO Baru dan yang satu lagi menjadi Presiden Semangat 46.

Sebelum pertemuan itu, kedua-dua pemimpin tersebut termasuk penyokong masing-masing telah menghentam satu sama lain dan dalam mereka berbuat begitu mereka tidak sedar yang mereka sudah tidak dapat menahan perasaan masing-masing kerana geram kepada tohmah-tohmah yang

telah dilemparkan kepada semua pihak yang terlibat. Apabila ia berlaku maka dengan tidak mereka sedari ataupun sedari telah menyentuh tentang hal-hal peribadi masing-masing. Inilah yang tidak sedap kita dengar apatah lagi yang berlaga itu pada satu ketika adalah berkawan baik dan pernah duduk dalam satu kabinet dan bersama-sama pula merancang dasar kerajaan.

Sebagaimana yang saya terangkan dalam tulisan saya terdahulu dari ini, segala usaha telah dijalankan untuk menemukan kedua pemimpin ini. Saya sendiri telah berusaha dengan begitu bersungguh-sungguh beberapa kali kerana saya tahu dengan tidak adanya Dato' Musa lagi dalam kerajaan, orang yang paling sesuai untuk menggantikan Dato' Musa ialah Ku Li. Ku Li telah menunjukkan kredibilitinya semasa beliau berada dalam PETRONAS dan PNB, sebagai Menteri Kewangan dan lain-lain. Beliau telah dikenali di dalam dan di luar negeri dan sebagai anak Raja beliau juga mempunyai kelebihannya sendiri. Saya juga tahu bahawa Dr. Mahathir masih sayang dan mahukan sangat Ku Li supaya berada dalam Kerajaan untuk membantu beliau menghadapi cabaran yang akan dilalui. Tetapi malang sungguh Ku Li tidak mahu beralih. Jawatan yang ditawarkan kepada beliau oleh Dr. Mahathir dalam kabinet sebagai Menteri tak berportfolio pun tidak diterima.

Ku Li orangnya bijak, pintar dan pandai juga. Tetapi bijak, pintar dan pandai Ku Li tidak kena tempat. Kita lihat sahaja bagaimana kebijaksanaan Ku Li. Saya ada mendengar orang-orang Kelantan menyebutkan tentang betapa hebatnya Ku Li.

Begini. Ku Li lah orang yang bertanggungjawab merebut Kelantan dari tangan PAS dan memberikan kepada

UMNO. Tetapi apabila Ku Li tidak sehaluan lagi dengan UMNO. Ku Li telah merebut kembali Kelantan dari tangan UMNO dan memberikan kepada PAS semula.

Saya teringat kembali iaitu semasa saya sedang mengusahakan pertemuan di antara kedua pemimpin itu, saya sudah merancang untuk mendapatkan satu bangalow di Port Dickson di mana mereka berdua boleh bertemu dengan tidak diketahui oleh sesiapa, Dato' Abu Hassan Omar pula telah menawarkan kediamannya sebagai tempat pertemuan itu jika berhasil usaha saya itu. Begitulah usaha yang telah dijalankan tetapi apalah nak dikatakan, semuanya sudah menjadi bubur. Ku Li telah terlepas peluang untuk menjadi Timbalan Perdana Menteri dan Perdana Menteri seterusnya. Sungguhpun begitu Ku Li sudah cuba dengan sedaya upayanya tetapi nasib beliau belum ada dan pada Pilihanraya yang lalu ramai pemimpin S.46 telah tewas. Kita mesti merasa sedih kerana pemimpin ini berkeupayaan dan mempunyai kebijaksanaan tersendiri tetapi disebabkan berlainan fahaman dan pendapat beliau terkeluar dan yang rugi bukan sahaja bagi dirinya tetapi juga negara dan bangsa turut rugi kerana tidak mendapat perkhidmatannya lagi. Ku Li bersama Dato' Musa pernah dikatakan sebagai seorang pemimpin dunia yang berpotensi oleh TIME MAGAZINE beberapa tahun dahulu.

Sungguhpun Tunku berada dalam parti S.46 sebagai Penasihat, Tunku tidak pernah melarang pemimpin-pemimpin S.46 berbincang dengan UMNO Baru untuk kebaikan negara, bangsa dan agama. Tetapi apabila semua usaha yang dijalankan untuk menemukan mereka gagal juga, Tunku telah mengambil kesempatan untuk menasihatkan Dr. Mahathir dalam pertemuan mereka berdua itu supaya Dr.

Mahathir membuat perjumpaan dengan Ku Li untuk mencari persefahaman dan perpaduan. Ekoran dari saranan Tunku itu, maka satu perjumpaan di antara Dr. Mahathir dan Ku Li pun diatur. Sesudah beberapa minggu yang penuh dengan spekulasi, maka kesudahannya mereka bertemu juga di Bangunan Parlimen pada 12 Disember, 1989.

Oleh sebab saya juga hendak mengikuti hasil pertemuan kedua pemimpin yang telah sekian lama tidak bertegur sapa itu, saya pun tidak mahu ketinggalan. Saya bergegas ke Bangunan Parlimen pada hari yang disebutkan itu dan disebabkan saya mempunyai ramai juga kenalan, maka saya telah dibenarkan naik ke atas di mana Ku Li akan menemui Dr. Mahathir. Ramai sungguh orang-orang akhbar dan mass media yang menunggu ketibaan Ku Li kerana mereka semua hendak tahu apakah hasil pertemuan itu nanti. Apabila Ku Li tiba dan keluar dari lif beliau terlihat saya. Beliau senyum sahaja melihat saya. Beberapa jam sebelum itu saya telah menghantar satu surat ke rumahnya meminta beliau mengambil kesempatan itu untuk berbaik-baik semula dengan Dr. Mahathir kerana saya katakan beliau mempunyai peluang yang baik untuk naik ke atas, tetapi janganlah meminta Dr. Mahathir membuat apa-apa perjanjian yang susah baginya melakukan. Ketika surat saya itu tiba di kediaman Ku Li, beliau sedang mengadakan mesyuarat dengan rakan-rakannya bersabit dengan pertemuan yang akan diadakan dengan Dr. Mahathir.

Saya lihat Ku Li senyum sahaja apabila sampai. Beliau dipersilakan masuk ke bilik di mana Dr. Mahathir dan Tok Mat sudah menunggu. Ku Li pula diiringi oleh Dato' Suhaimi Kamaruddin. Apabila Dr. Mahathir berhadapan dengan Ku Li mereka bersalaman sungguhpun pada

mulanya saya mengharapkan sangat supaya mereka berpelukan sebagai tanda kasih di antara satu dengan lain dan sudah lama pula tidak bersua. Saya dengar Dr. Mahathir berkata kepada Ku Li yang Ku Li sudah gemuk sedikit. Ku Li mengakui dan itulah sebabnya beliau terpaksa memakai suit yang baru dibuat. Saya telah mengambil banyak gambar tentang pertemuan mereka itu kerana itu adalah satu perjumpaan yang bersejarah yang tidak kurang pentingnya dengan pertemuan Dr. Mahathir dengan Tunku sebelumnya. Saya tidak tahu apa yang mereka berempat bincangkan dalam bilik itu kerana perbincangan dijalankan secara "closed-door meeting".

Perjumpaan tersebut mengambil masa lebih kurang 40 minit dan selepas itu mereka keluar. Ku Li lagi sekali menoleh dan menegur saya sebelum memasuki lif. Beberapa minit selepas itu Dr. Mahathir mengadakan "press conference" dan saya dapat mendengar ulusan yang diberi oleh Dr. Mahathir berkenaan dengan pertemuan beliau dengan Tunku. Saya lihat Dr. Mahathir tidak begitu riang apabila beliau tiba untuk menghadapi orang-orang surat khabar. Hati saya berkata sudah tentu pertemuan itu tidak membawa apa-apa kejayaan. Tekaan saya itu betul kerana mengikut Dr. Mahathir ada beberapa perkara yang diminta oleh Ku Li sebagai syarat untuk berdamai yang mana tidak dapat diterima oleh Dr. Mahathir dan terpaksa dibawa ke Majlis Kerja Tertinggi UMNO. Sungguhpun ada harapan untuk mereka bertemu semula sebagai yang diharap-harapkan tetapi semakin hari jarak kekeluargaan itu semakin ketara. Sehingga lah ke hari penamaan calon dan seterusnya pilihanraya baru-baru ini.

Dalam pada itu, teringat saya kepada satu insiden di mana Dr. Mahathir telah dijadualkan melawat Kelantan untuk bertemu dengan ahli-ahli dan penyokong-penyokong UMNO di sana. Disebabkan Tengku Razaleigh masa itu menjadi salah seorang ahli jawatankuasa maka beliau juga terpaksa berada di sana untuk menyambut ketibaan Dr. Mahathir.

Orang ramai telah membuat berbagai-bagai spekulasi dan seraya dengan itu mempunyai harapan yang tinggi supaya kedua-dua pemimpin ini akan dapat juga bertemu muka di Kelantan.

Memandangkan kepada peluang yang begitu baik bagi kedua-dua pemimpin itu bertemu, saya telah mengirim surat kepada Ku Li menasihatkan beliau supaya mengambil peluang keemasan itu untuk berbincang secara empat mata dengan Dr. Mahathir. Saya telah membuat rayuan saya itu dengan bersungguh-sungguh dengan harapan sengketa antara mereka berdua akan dapat diselesaikan dengan pertemuan tersebut.

Saya juga tidak ketinggalan menulis surat kepada Dr. Mahathir dan menerangkan kepada beliau agar beliau dapat meluangkan masa untuk bercakap dengan Ku Li semasa beliau di Kelantan.

Tetapi sebagai yang kita semua maklum, kita ada melihat melalui kaca tv dan akhbar-akhbar yang kedua-dua pemimpin itu ada bersalaman tetapi setakat itu sahaja. Orang ramai telah merasa hampa kerana tidak ada perundingan langsung diadakan sewaktu itu. Beberapa hari kemudiannya saya telah sempat bertanya kepada Ku Li mengapa tidak diadakan perundingan dengan Dr. Mahathir ketika beliau bertemu dengannya. Ku Li menerangkan kepada saya

bahawa Dr. Mahathir hanya bersalaman dengan beliau dan tidak berkata apa-apa. Sedangkan Ku Li pula mengharapkan Dr. Mahathir membisikkan sesuatu kepadanya. Oleh hal yang demikian Ku Li pun tidak membuat apa-apa usaha lagi untuk menemui Dr. Mahathir. Sambil itu, saya juga sempat bertanya kepada Dr. Mahathir tetang hal yang sama. Saya diberitahu bahawa Dr. Mahathir mengharapkan permintaan tersebut datang daripada Ku Li tetapi Ku Li tidak ada menyatakan apa-apa semasa bersalaman. Oleh itu Dr. Mahathir juga tidak dapat berbuat apa-apa. Maka ekoran dari itu dan lain-lain sebab, berpanjangan dan makin luaslah ruang perbezaan kedua-dua pemimpin itu.



Penulis bergambar bersama-sama ADC dan pengawal-pengawal Dr. Mahathir pada hari pencalonan 11 Oktober, 1990. Berdiri dari kanan ialah Encik Mohammad Ali, Encik Ismail Manaf, Encik Saad Latif, penulis, Encik Adnan Hamid, Encik Yusof Ibrahim, Encik Roslan Othman dan Tuan Haji Sharani dari Shapadu Holdings. Gambar ini dirakamkan oleh anak penulis di Titi Gajah, iaitu di rumah kediaman Dato' Seri Dr. Mahathir Mohamad.

PERTEMUAN DATO' MOHAMED RAHMAT DENGAN TUNKU

Dalam beberapa hari sesudah Pergerakan Pemuda UMNO dan Pergerakan Wanita UMNO menghadap Tunku, saya telah mendapat satu panggilan telefon daripada Setiausaha Kerja UMNO, Encik Yaakob Mohamad, yang bertanya kepada saya sama ada satu pertemuan boleh diaturkan bagi Dato' Mohamed Rahmat menghadap Tunku.

Saya bertanya tentang tujuan pertemuan itu kerana saya yakin Tunku akan bertanya kepada saya. Saya diberitahu bahawa Dato' Mohamed Rahmat mahu membuat kunjungan muhibah selain daripada menghantar kad jemputan rasmi kepada Tunku untuk menghadiri Perhimpunan

Agung UMNO yang akan diadakan pada 17hb November, 1989. Sebelumnya saya telah memberitahu Tunku tentang jemputan dari Presiden Parti UMNO yang mengharapkan sangat di atas kehadiran Tunku pada hari tersebut.

Saya telah memberitahu Encik Yaakob yang saya kena beritahu Tunku yang pada ketika itu berada di Pulau Pinang. Tetapi sebelum itu saya bertanya sama ada Dato' Mohamed sanggup merendahkan diri meminta maaf kepada Tunku di masa pertemuan tersebut kerana apa yang saya tahu Tunku merasa terkilan sedikit kerana Tunku dapat tahu yang Dato' Mohamed Rahmat pernah mengata-ngatakan Tunku. Permintaan saya itu telah diterima maka apabila saya beritahu Tunku tentang hasrat Dato' Mohamed Rahmat itu beliau pun berkata, "Apa hai yang Dato' Mohamed nak jumpa saya. Dia tak ada dosa dengan saya." Apabila saya terangkan baharulah Tunku bersetuju dan memberitahu saya bahawa beliau akan sampai di Kuala Lumpur dari Pulau Pinang pada 10/11/89 pukul 6.30 petang dan Dato' boleh menghadap pada pukul 8 malam selepas Tunku melakukan solat Maghrib.

Pada pukul 8 malam tepat Dato' Mohamed Rahmat tiba di muka pintu serta diiringi oleh Encik Yaakob Mohamad. Apabila Dato' Mohamed melihat saya di muka pintu beliau bertanya, "Semenjak bila you bekerja dengan Tunku." Katanya kepada saya. Saya tak ingat apa yang saya jawab kepada Dato' Mohamed kerana saya terpaksa membawanya terus menemui Tunku yang sedang menunggu di ruang tamu.

Pertemuan di antara Dato' Mohamed Rahmat dan Tunku adalah juga seperti orang yang telah berpisah lama. Mereka bertanya khabar di antara satu dengan lain dan Dato'

Mohamed telah mengingatkan Tunku semula kepada apa yang berlaku bertahun-tahun yang lalu di mana kata Dato' Mohamed Tunkulah orangnya yang menolong beliau untuk masuk dalam Kerajaan. Banyak jasa-jasa Tunku juga yang Dato' Mohamed sebutkan.

Tunku adalah sebagai seorang bapa kepada Dato' Mohamed Rahmat dan Tunku melayan Tok Mat dengan baik. Dalam pada itu Dato' Mohamed menyampaikan kad jemputan rasmi dari Presiden Parti UMNO untuk Tunku menghadiri hari Perhimpunan Agungnya yang pertama semenjak UMNO lama diisytiharkan haram.



Gambar ini diambil di pejabat YTM Tunku Abdul Rahman Putra Al-Haj yang bersebelahan dengan rumah kediaman Tunku. Gambar ini diambil sebelum perbincangan mereka dimulakan. Barangkali Dr. Mahathir sedang bertanyakan kepada Tunku, "di sinakah pejabat Tunku dan tempat Tunku bekerja?"

Hadir bersama ketika itu ialah Dato' Seri Najib B Tun Abdul Razak, Ketua Pergerakan Pemuda dan Dato' Napsiah Omar, Timbalan Ketua Pergerakan Wanita UMNO. Berdiri disebelah Dato' Najib ialah penulis dan di sebelah Dato' Napsiah ialah Dato' Yaakob, sahabat kepada Tunku.



Tok Mat menyambut ketibaan Ku Li semasa Ku Li mengunjungi untuk membincangkan Perpaduan Melayu.



Gambar merunjukkan YAB Dato Seri Dr Mahathir Mohamad sedang berbual-bual dan bertanya khabar antara satu dengan lain sejurus YBM Tengku Razaleigh tiba mengunjungi Dato Seri Dr Mahathir di pejabat Perdana Menteri di Bangunan Parlimen pada 12 Disember '89. Ketibaan Tengku Razaleigh dan Dato Aziz Suhaimi Kamaruddin telah disambut oleh Dato' Mohamed Rahmat.

Selain dari bertanya khabar Dr. Mahathir juga menyatakan kepada Ku Li bahawa dia nampaknya gemuk sedikit. Ku Li kata itu sebabnya beliau terpaksa pakai suit baru hari

UCAPAN PRESIDEN UMNO

Masa yang ditunggu-tunggu selalunya dalam Perhimpunan Agung UMNO ialah ucapan Presiden UMNO kerana di sivilah boleh ahli-ahli UMNO mengambil kesimpulan tentang corak perbincangan yang akan dibahaskan dan sebagainya. Dan UMNO sebagai satu parti yang terbesar dalam BN yang memerintah negara sudah tentu menjadi tumpuan perhatian rakyat jelata dan negara-negara lain yang ada hubungan dengan Malaysia.

Perhimpunan Agung UMNO tahun 1989 adalah satu perhimpunan yang bersejarah kerana itu adalah kali pertama UMNO Baru dihadiri oleh tetamu khas iaitu YTM Tunku Abdul Rahman Putra Al-haj Presiden UMNO lama dan Bapa Kemerdekaan dan sekarang menjadi Penasihat kepada parti Semangat 46.

Dr. Mahathir sebagai Presiden Parti UMNO Baru telah membuat satu ucapan yang panjang lebar yang menyentuh semua aspek parti dan kegiatan-kegiatannya. Disebabkan ahli-ahli mahu tahu apa yang hendak dinyatakan oleh Dr. Mahathir tentang kehadiran Tunku pada hari itu maka tumpuan sudah semestinya diberikan kepada tetamu khas itu. Di sini sukalah saya memetik sebahagian dari ucapan Dr. Mahathir yang panjang lebar itu:

“Beban yang kita terpaksa pikul kerana orang yang mengheret kita ke mahkamah amatlah berat. Sepatutnya kita tidak memaafkan mereka. Tetapi kita sanggup membendung perasaan kita. Walaupun berkali-kali kita dikecam dan berbagai-bagai tuduhan dibuat, kita bersabar. Yang utama bagi kita ialah perpaduan semula orang Melayu dalam UMNO. Justeru itu kita telah membuka dengan seluas-luasnya pintu UMNO. Kita terima semua mereka yang ingin menyertai pertubuhan kita dengan tidak mengambilkira latarbelakang dan peranan mereka dalam menyeret UMNO ke mahkamah. Ramai daripada mereka yang dahulu tidak bersetuju dengan UMNO di bawah kepimpinannya sekarang, telah kita terima dengan hati terbuka dan kita akan terus menerima dan berusaha supaya mereka merujuk semula kepada UMNO.

“Baru-baru ini kita terperanjat dengan kenyataan yang dikatakan dibuat oleh Bapa Kemerdekaan dan Bapa Malaysia, Yang Teramat Mulia Tunku Abdul Rahman. Walaupun pada mulanya ramai pemimpin dan ahli UMNO berasa amat marah tetapi kita berjaya membendung rasa kecil hati kita. Sebaliknya kita bertengang dan mengambil jalan yang lebih matang iaitu dengan cara berbincang dari hati ke hati dengan Yang Teramat Mulia Tunku sendiri.

"Pemuda yang biasanya lekas marah telah mengambil langkah pertama di bawah pimpinan Ketua Pemuda, Yang Berhormat Dato' Najib Tun Razak. Mereka berjaya bertemu dengan Yang Teramat Mulia Tunku dan berbincang dengan beliau dalam suasana muhibah. Walaupun perjumpaan itu tidak dapat menyelesaikan masalah yang dihadapi oleh UMNO dan orang Melayu, ia berjaya meneroka satu pendekatan yang lebih waras. pemuda juga berjaya menjelaskan pendirian Pemuda dan UMNO dan Tunku pula dapat menyampaikan niat dan cita-cita beliau kepada Pemuda, berhubung dengan perpaduan orang Melayu dan peranan yang harus dimainkan oleh UMNO.

"Pihak Majlis Tertinggi telah mendengar laporan Ketua Pemuda dan bersetuju supaya Wanita UMNO juga turut berjumpa dengan Yang Teramat Mulia Tunku. Seperti mana kita semua maklum, perjumpaan Wanita dengan Tunku juga diadakan dalam suasana muhibah.

Pada 11hb. November pula, saya telah diterima bertemu Yang Teramat Mulia Tunku, yang saya hormati sebagai bekas Presiden UMNO, sebagai bekas Perdana Menteri Malaysia yang pertama, sebagai Bapa Kemerdekaan dan Bapa Malaysia. Sudah tentu saya menghormati Tunku sebagai orang yang lebih tua daripada saya, kerana ini adalah adat bangsa Melayu, lebih-lebih lagi Tunku adalah daripada keluarga Di-Raja negeri saya.

"Saya berpeluang mendengar pandangan Tunku berkenaan dengan perpaduan orang Melayu dan berkenaan kedudukan dan hak kaum-kaum di Malaysia. Saya juga berpeluang menjelaskan sedikit sebanyak berkenaan dengan kedudukan UMNO sekarang dan bagaimana Parlimen tidak

berkuasa membatalkan hukuman yang telah dibuat oleh mahkamah.

"Pertemuan yang diadakan itu membuka peluang untuk perbincangan-perbincangan di masa hadapan dalam usaha mententeramkan lagi keadaan politik di Malaysia, khususnya di kalangan orang Melayu. Saya yakin bahawa Yang Teramat Mulia Tunku dapat memainkan peranan sebagai orang tengah yang tidak memihak kepada mana-mana pihak, tetapi hanya kepada keseluruhan orang Melayu dan negara Malaysia. InsyaAllah perjuangan UMNO untuk menyatupadukan orang Melayu akan berhasil dengan pertolongan Bapa Kemerdekaan dan Bapa Malaysia, Tunku Abdul Rahman Putra Al-Haj.

Sesudah Dr. Mahathir membuat ucapan beliau telah diberi satu tepukan yang gemuruh oleh para hadirin yang penuh sesak hendak mendengar ucapan Dr. Mahathir itu. Saya lihat Tunku tunduk sahaja dan saya percaya beliau merasa sedih dan juga bangga sekali kerana beliau telah diberi penghormatan yang begitu tinggi oleh pemimpin-pemimpin UMNO. Ucapan Dr. Mahathir itu sungguh tepat dan kena pula pada tempatnya dan saya sendiri merasa amat bangga kerana layanan yang begitu baik diberikan kepada Tunku sebagai Bapa Kemerdekaan. Apabila saya menaiki kereta hendak pulang dengan Tunku, beliau telah menyatakan bagaimana besar hati beliau di atas sambutan yang ditunjukkan kepada beliau oleh ahli-ahli UMNO. Mendengarkan ulasan Tunku itu saya pun berasa senang hati bersama kerana UMNO telah menunjukkan satu perpaduan yang begitu erat dan telah menerima Tunku sebagai tetamu khas. Hati kecil saya berkata bahawa sudah tentu selepas itu orang-orang Melayu akan dapat bercantum semula!

Beberapa hari sebelum Perhimpunan Agung UMNO itu diadakan saya merasa takut juga jika UMNO Baru akan mengambil kesempatan itu untuk menghentam Tunku dan partinya. Manalah tahu kita manusia boleh membuat silap dengan tidak disedari ataupun disedari. Kepada umat Melayu khususnya kehadiran Tunku pada hari tersebut mempunyai erti yang penting dan kepada saya pula itu jugalah kemuncak kepada pertemuan-pertemuan yang lain yang telah diadakan sebelumnya. Jika ia tidak berjaya sudah tentu semua orang termasuk bukan Melayu juga akan merasa dukacita.

Dengan itu saya telah memberitahu Dato' Najib supaya memberitahu kepada Dr. Mahathir tentang kebimbangan saya itu. Saya diberitahu kemudiannya bahawa Dato' Najib telah menyampaikan perasaan saya itu kepada Dr. Mahathir. Dalam pada itu saya juga telah menulis kepada Dr. Mahathir dan meminta beliau "*to give credit where it is due*" kerana dengan itu dapatlah kita merapatkan lagi silatulrahim dan perpaduan yang kita semua idam-idamkan. Syukur alhamdullilah seperti yang kita lihat di atas tentang ucapan Dr. Mahathir itu menunjukkan beliau sememangnya ingin mencari perpaduan dan dalam pada itu beliau sangat murah hati dengan puji-pujian terhadap diri Tunku. Ramai orang yang menitiskan airmata apabila Dr. Mahathir membuat ucapan seperti itu dan saya difahamkan Tunku juga menitiskan airmata apabila beliau diingati oleh seorang yang pada satu masa dahulu menjadi musuhnya.

Semasa dalam Perhimpunan itu pemimpin-pemimpin UMNO telah berdiri menyanyikan lagu SETIA dan lain-lain, Tunku turut berdiri bersama-sama sungguhpun kakinya lemah dan susah hendak berdiri betul. Tetapi Tunku adalah

seorang ‘gentleman’ yang tidak mahu dianggap sebagai tidak sopan lebih-lebih lagi beliau adalah seorang tetamu khas. Semasa berada di bilik rihat untuk minum pagi bersama-sama pemimpin-pemimpin UMNO Lama dan Baru, Tunku telah dikerumuni oleh kaum ibu yang hendak bergambar dengannya. Mereka berebut-rebut hendak bergambar dengan Tunku, Tun Hussein Onn dan Dr. Mahathir. Tunku juga sempat bersua muka dengan rakan-rakan seperjuangannya seperti Dato’ Bahaman Shamsuddin dan Tan Seri Kadir Yusof. Kedua-duanya adalah sahabat lama Tunku. Dato’ Bahaman pernah menjadi Menteri di bawah Kerajaan Tunku pada tahun 60 puluhan sebagai Menteri Kesihatan dan Menteri Kehakiman.

Saya juga berada di bilik itu bersama dengan pembantu khas Tunku iaitu En. Ahmad untuk menemani Tunku memandangkan keadaan beliau yang tidak boleh melihat dengan terang. Saya merasa kekok berada di dalam bilik tersebut kerana ianya adalah untuk WIP sahaja, tetapi saya terpaksa berada di situ kalau-kalau Tunku mahukan sesuatu daripada saya. Semasa saya sedang berdiri memerhatikan apa yang berlaku di hadapan saya terasa ada orang menepuk belakang saya dan apabila saya menoleh saya dapati orang yang menepuk saya itu ialah Dr. Mahathir. Beliau mempelawa saya minum bersama dan disebabkan saya terkejut dengan kedatangan beliau dari belakang saya tidak sempat mengucapkan terima kasih kepada beliau.

Tok Mat pula sempat mengucapkan terima kasih kepada saya kerana telah berusaha mengaturkan itu semua. Beliau juga berkata yang UMNO tidak akan lupa kepada jasa dan apa juar yang saya lakukan. Tetapi kepada saya itu adalah satu kewajipan saya sebagai seorang Islam - merapat-

kan orang-orang Islam yang berpecah dan sungguhpun risikonya sangat tinggi saya teruskan juga usaha saya itu dan lainnya saya berserah kepada Allah swt.

Saya menyedari juga iaitu apa yang mendorong saya berbuat demikian adalah dorongan dari Allah Yang Maha Kuasa.

Tunku dan saya beredar dari situ untuk pulang. Dr. Mahathir dan pemimpin-pemimpin lain menghantar Tunku ke kereta. Mereka bersalaman dengan Tunku dan ada yang mencium tangan Tunku sebagai tanda kesyukuran dan kesayangan mereka. Dalam sibuk-sibuk itu Datuk Napsiah sempat juga meminta saya bercakap kepada Tunku supaya Tunku masuk UMNO Baru. Saya beritahu sahaja Tunku yang Datuk Napsiah hendak bercakap dengannya dan Napsiah pun membisikkan sesuatu kepada Tunku semasa Tunku sudah berada dalam kereta.

Saya pun bersalaman dengan Dr. Mahathir sebelum masuk ke kereta dengan Tunku menuju ke kediaman beliau. Dalam kereta Tunku memberitahu saya bagaimana riangnya perasaan beliau kerana telah disambut dengan begitu mesra dan meriah. Saya merasa begitu lega sekali dan hati kecil saya berkata, "tidak ada masalah lagi bagi Tunku menjadi orang tengah untuk menyatukan orang-orang Melayu di bawah satu payung."

Keesokan harinya Tunku terbang ke Jeddah untuk menemui Raja Fahd untuk mendapatkan wang bagi kerja-kerja yang dijalankan oleh PERKIM. Saya pergi menghantar beliau ke Lapangan Terbang Subang di mana Executive -jet Kerajaan sedangmenunggu untuk menerbangkan Tunku ke Jeddah. Saya lihat ada satu rombongan Semangat 46 yang

telah datang untuk mengucapkan selamat jalan kepada Tunku.

Suka saya menerangkan di sini iaitu Tunku sepatutnya terbang ke Jeddah pada hari bertepatan dengan hari diadakan Perhimpunan Agung UMNO. Tetapi saya telah diminta oleh pemimpin UMNO supaya memujuk Tunku untuk hadir di Perhimpunan Agung itu sebagai tetamu khas Dr. Mahathir dan UMNO. Menyedari bahawa kehadiran Tunku sangat penting kepada UMNO dan saya mahu melihat perpaduan terjalin dengan segera maka saya telah merayu kepada Tunku agar menerima jemputan UMNO Baru itu. Lagi pula sekiranya Tunku tidak hadir Tun Hussein Onn juga tidak berhasrat untuk hadir Tunku berjanji untuk memikirkannya.

Sebelum Tunku terbang ke Jeddah keesokan harinya, saya telah menerima telefon dari Dato' Najib memberitahu saya bahawa Dr. Mahathir telah menawarkan bangunan Executive-jet Kerajaan untuk membawa Tunku ke destinasi dan jet tersebut akan menunggu Tunku sehingga Tunku selesai dengan urusan Tunku di sana.

Saya telah memberitahu Tunku tentang tawaran tersebut semasa Tunku sedang makan tengah hari di rumahnya. Mula-mula Tunku tidak percaya serta berkata mengapa UMNO cuba berbaik sangat dengannya, dan sambil bergurau Tunku bertanya, "*Is it safe to take the offer?*" Saya meyakinkan Tunku bahawa tawaran yang dibuat oleh Dr. Mahathir itu adalah ikhlas kerana Dr. Mahathir sedar benar tentang keadaan Tunku. Lagi pun adalah lebih baik Tunku tiba dengan kapal terang Kerajaan kerana ini menunjukkan Kerajaan ada bersama Tunku dalam kegiatan Tunku dalam

PERKIM. Saya minta Tunku menerima tawaran tersebut. Tunku mengucapkan terima kasih kepada ingatan Dr. Mahathir itu dan terus menerima tawaran tersebut, dan dengan itu Tunku bersetuju untuk hadir di Hari Perhimpunan Agung UMNO pada hari yang Tunku sepatutnya berangkat ke Jeddah.

Saya difahamkan juga iaitu untuk menjalin perpaduan Dr. Mahathir juga telah bersetuju memberi sumbangan kepada PERKIM sebanyak satu juta ringgit untuk membiayai perbelanjaan PERKIM.



Kelihatan gambar ini di mana kedua pemimpin agung itu sama-sama tersenyum riang, percayakah orang yang mereka benar-benar bermusuhan?



TOHMAHAN

Malang tidak berbau. Lain yang diharapkan, lain pula yang terjadi; lain yang dipinta, lain pula yang dapat.

Hantu syaitan selalu sahaja mengganggu atau berbisik-bisik ke telinga dan hati manusia. Ini caranya mereka bekerja untuk memporak-perandakan keadaan atau supaya manusia-manusia itu tidak hidup aman sesama mereka. Saya bukan hendak jadi tok lebai, jauh sekali Tok Lebai Malang! Cuma dalam Al Quran saya pernah terbaca akan peringatan-peringatan yang berulangkali diberitahu kepada manusia oleh Penciptanya.

Hal yang sebenarnya yang saya hendak cuba jelaskan di sini ialah bagaimana boleh keruh semula air yang sudah kelihatan jernih sedangkan segala debu dan lumpur, habuk

dan kotoran sudah mula mendap ke bawah. Harap-harap mendapan itu boleh menjadi kerana supaya boleh dikaut dan dibuang. Tetapi tidak sempat!

Pada hari kedua Perhimpunan Agung UMNO itu ada beberapa orang wakil yang bangkit dan menyentuh serta mengata-ngatakan Tunku tentang saham beliau dalam Utusan Melayu.

Mereka telah meminta Tunku supaya memulangkan semula saham tersebut kepada UMNO yang kata mereka berjumlah lebih kurang 1 juta ringgit dan telah naik nilai 10 juta ringgit sekarang. Mereka juga ada menyentuh tentang kelemahan-kelemahan peribadi Tunku.

Sekembalinya Tunku dari Jeddah beberapa hari kemudiannya beliau pun telah mendapat tahu tentang kritikan-kritikan yang dibuat terhadap dirinya tanpa kehadiran beliau; iaitu di belakang beliau. Ini adalah tikaman yang paling bisa.

Tunku telah naik radang dan menuduh UMNO tidak jujur dan ikhlas. Ini disebabkan Tunku telah menjadi tetamu khas dan terhormat kepada UMNO dan beliau telah mendapat pujian yang begitu murah sekali oleh Dr. Mahathir pada hari pertama Perhimpunan Agung UMNO itu tetapi sehari kemudiannya beliau ditomah pula dengan kata-kata yang tidak sopan dan berasas.

Tunku telah menyatakan apa yang sebenarnya tentang saham itu iaitu Utusan Melayu ada menulis surat kepadanya menyatakan bahawa ada saham kepunyaan Tunku sebanyak 123,000 ringgit dalam Utusan Melayu dan ingin tahu apakah yang akan dibuat oleh Tunku tentang saham-sahamnya itu. Tunku sebenarnya sudah lupa kepada saham-saham tersebut. Walaubagaimanapun Tunku menjawab dengan

meminta supaya saham-saham tersebut dikembalikan kepada beliau. Kemudian Tunku telah mendapat jawapan yang memberitahu Tunku bahawa saham-saham tersebut telah dihantar kepada setiausaha sulit Dr. Mahathir. Tunku pun menulis surat kepada setiausaha sulit Dr. Mahathir tetapi tidak mendapat jawapan, sehingga perkara itu dibangkitkan oleh wakil-wakil tertentu di Perhimpunan Agung UMNO itu.

Saya telah menerangkan kepada Tunku apa yang telah berlaku sebenarnya tetapi Tunku kata mengapa tidak ada seorang pun yang bangkit untuk menerangkan kedudukan yang sebenarnya ataupun dilarang sesiapa yang bangkit untuk menyentuh tentang diri beliau. Di sinilah Tunku berasa amat kesal kerana tidak ada seorang pun yang bangkit membela beliau, seolah-olah apa yang dikatakan oleh mereka itu benar belaka. Tunku berkata beliau takut nanti ada orang-orang kampung fikir bahawa beliau ini tidak jujur kerana tidak mahu memulangkan saham-saham yang tersebut yang kononnya bukan kepunyaan beliau. Tunku tidak mengatakan yang beliau kecewa dengan saya di atas apa yang berlaku itu barangkali Tunku tidak sampai hati untuk memarahi saya. Sungguhpun begitu Tunku kerap kali bangkitkan perkara itu. Saya pun berasa sungguh sedih kerana segala usaha suci saya selama ini tercemar oleh lidah dan mulut yang tidak boleh dikawal.

Malangnya pada ketika perwakilan mengutuk Tunku, saya tidak berada di sana sungguhpun pada mulanya saya berhasrat mengikuti Tunku dan rombongan ke Jeddah menaiki Eksekutif Jet kerajaan yang dipinjamkan oleh Dr. Mahathir kepada Tunku, tetapi saya telah terlambat memasukkan nama saya bersama-sama dengan nama-nama

yang menemani Tunku dalam rombongannya itu. Jika sekiranya saya berada dan mendengar semasa perwakilan UMNO itu menyentuh tentang Tunku sudah tentu saya akan memberi satu isyarat kepada Dr. Mahathir atau Dato Mohamat Rahmat ataupun Dato Najib supaya memberitahu Tuan Pengerusi tetap agar perkara itu tidak disentuh langsung kerana takut akan mengeroahkan keadaan semula. Lagipun sebelumnya Tunku telah menjadi tetamu khas UMNO dan keduanya, Tunku tidak berada di situ untuk mendengar dan ketiganya Dr. Mahathir pada hari pertama telah memuji Tunku. Lagipun saya difahamkan Dr. Mahathir telah memberi arahan kepada perwakilan supaya tidak menyentuh tentang diri Tunku. Inilah satu kesilapan yang besar yang membuatkan saya bingung kerana saya tahu Tunku akan mencari saya untuk mendapatkan penjelasan mengapa perkara itu boleh berbangkit. Tambahan lagi pula saya telah bersusah payah untuk ‘memujuk’ Tunku untuk menemui pemimpin-pemimpin UMNO dan untuk hadir di hari Wanita yang ke-40 dan dihari Perhimpunan UMNO. Saya berani menyatakan di sini iaitu jika tidak disebabkan insiden tersebut, saya yakin benar Tunku akan berlembut dan memikirkan dengan mendalam tentang saranan Dr. Mahathir kepada Tunku supaya menjadi orang tengah.

Mungkin anggapan saya ini tidak tepat tetapi memandangkan keadaan begitu membuat saya terfikir panjang bahawa boleh jadi ada pihak-pihak yang tidak merestui Dr. Mahathir dan Tunku berbaik semula. Jika anggapan saya ini benar, maka saya berasa amat kecewa diatas tindak tanduk mereka kerana cuba hendak menyekat perpaduan dan seterusnya merenggangkan kedua pemimpin agung itu dari

perpadu dan berbaik-baik semula untuk kebaikan orang-orang Melayu.

Saya bertanyakan tentang masalah itu kepada Dato' Seri Anwar, Dato' Najib dan Dato' Napsiah kerana saya katakan saya sudah menjadi sasaran Tunku sungguhpun Tunku bukanlah seorang yang suka menunjukkan kemarahan beliau jika tidak ada bukti. Saya diberitahu bahawa sebenarnya Dr. Mahathir sudah menasihatkan perwakilan supaya jangan sekali-kali menyentuh tentang diri Tunku untuk menghormati dan menjaga keharmonian. Tetapi nampaknya mereka mengata-ngata juga tentang Tunku dan tidak mengendahkan kepada perpaduan yang sudah mula wujud. Mereka seolah-olah tidak mahu melihat Dr. Mahathir berbaik semula dengan Tunku. Saya telah meminta pemimpin-pemimpin UMNO supaya meminta maaf kepada Tunku dengan seberapa segera tetapi dukacita benar tidak siapapun yang mahu berbuat demikian.

Alasan yang diberikan oleh mereka ialah Tunku masih mengutuk UMNO dan pemimpin-pemimpin UMNO. Tetapi saya katakan, selagi UMNO tidak meminta maaf bagaimanakah Tunku boleh mempercayai UMNO lagi.

Saya ingin membuat post-morten tentang perkara ini. Adalah tidak tepat jika ada pihak-pihak yang mengatakan Tunku tidak inginkan perpaduan jika kita mengambil kira tentang apa yang telah Tunku lakukan untuk berbaik-baik dengan pemimpin UMNO Baru biarpun beliau sebagai penasihat parti Semangat 46 dilarang oleh S.46. Di antara perkara-perkara yang telah dilakukan oleh Tunku ialah:-

- telah bersetuju memberi peluang kepada Pergerakan Pemuda UMNO yang diketuai oleh Dato' Najib Tun Razak menghadap beliau

- telah bersetuju menemui Pergerakan Wanita UMNO yang diketui oleh Dato' Napsiah Omar.....
- telah bersetuju menemui Dato' Mohamed Rahmat di atas permintaan Dato' Mohamed sendiri
- telah sedia menghadiri Hari Wanita UMNO yang ke 40
- telah juga menerima jemputan UMNO Baru untuk menghadiri Perhimpunan Agung UMNO yang lalu sungguhpun Tunku telah membuat persiapan untuk terbang ke Jeddah untuk menemui King Fahd
- telah bersetuju untuk menemui Dato' Seri Dr. Mahathir pada 11.11.89 biarpun perjumpaan tersebut tidak disenangi oleh S.46, tetapi di atas sebab-sebab perpaduan yang lebih penting kepada beliau maka beliau tidak menghiraukan bangkangan dari S.46 itu kerana Tunku sedia faham iaitu sekiranya tidak ada dialog atau komunikasi bagaimanakah kedua-dua pihak akan dapat mencari jalan penyelesaian untuk mencipta perpaduan.

Tidak syak lagi kepada kita semua bahawa Tunku telah menuai segala permintaan dari UMNO tetapi sebagaimana yang saya katakan di atas tadi mungkin ada pihak-pihak yang tidak suka melihat Dato' Seri Dr. Mahathir dan Tunku berbaik-baik semula dan mereka ini sengaja mencari jalan untuk merengangkan mereka. Tetapi mereka lupa bahawa Tunku dan Dato' Seri Dr. Mahathir adalah senegeri dan bagaimanapun nampaknya mereka tidak sehaluan, tetapi mereka masih hormat menghormati dan sayang menyayangi di antara satu dengan yang lain.

Pada satu ketika saya mempunyai penuh harapan serta keyakinan bahawa Tunku boleh diminta untuk menjadi

orang tengah untuk membawa Ku Li berbaik-baik semula dengan Dr. Mahathir. Tetapi malang sungguh kerana segala usaha-usaha saya yang saya mulakan semenjak tahun 1987 itu telah digagalkan oleh pihak-pihak yang tidak bertanggungjawab.

Semenjak kejadian itu berlaku keadaan makin bertambah buruk. Semangat 46 telah membuat understanding dengan PAS, HAMIM dan lain-lain parti Islam untuk menentang UMNO dan BN.

Semangat 46 juga bekerjasama dengan DAP, PBS dari Sabah. Kerjasama Semangat 46 dengan DAP itu telah menyulitkan parti itu memenangi Pilihanraya baru-baru ini. Tunku pernah menyatakan kepada saya tentang keimbangan beliau terhadap parti lawan seperti DAP, PAS dan lain-lain. Dr. Mahathir telah menjelajah di seluruh negara dan membuat ucapan yang tidak berhenti-henti. Beliau telah pergi ke seluruh ceruk Malaysia untuk memberi ucapan. Di mana-mana beliau pergi beliau disambut dengan begitu hangat sekali.

Di sinilah kita lihat betapa hebatnya Dr. Mahathir. Bila ada krisis beliau selalu "come off top". Beliau adalah laksana pemimpin dalam perang. Dia pandai, bijak dan pintar (kata orang-orang yang pro 'M'). Dia licik, licin dan lihai' (kata orang-orang yang anti 'M'). Tetapi dalam hati kecil semua orang yang pernah mengkritik Dr. Mahathir, mereka mahukan beliau "to be around for just another five or ten years more before somebody capable can take over." Habislah harapan orang-orang yang tidak sabar menunggu giliran. Apakah akan ada 'intrigue', kita harap tidak ada lagi dan kita berharap Perhimpunan Agung UMNO hujung

bulan ini (30 November 1990) semuanya akan berlangsung dengan baik.

Saya telah memberitahu Tunku tentang tawaran ini semasa Tunku sedang makan tengah hari di rumahnya. Mula-mula Tunku tidak percaya serta berkata mengapa UMNO cuba baik sangat dengannya, dan sambil bergurau Tunku bertanya sama ada selamat tak menaiki jet tersebut. Saya memberitahu Tunku bahawa tawaran yang dibuat oleh Dr. Mahathir adalah jujur dan ikhlas hatinya kerana Dr. Mahathir sedar keadaan Tunku. Lagipun adalah lebih baik Tunku tiba dengan kapal terbang Kerajaan kerana ini menunjukkan kerajaan ada bersama Tunku dalam kegiatan Tunku dalam PERKIM. Saya minta Tunku menerima tawaran tersebut. Tunku berterima kasih dengan ingatan Dr. Mahathir itu dan menerima tawaran tersebut. Seraya dengan itu Tunku telah bersetuju untuk hadir di Hari Perhimpunan Agung UMNO pada hari yang Tunku sepatutnya terbang ke Jeddah.

Saya difahamkan juga iaitu untuk menjalin perpaduan Dr. Mahathir juga telah bersetuju memberi sumbangan kepada PERKIM sebanyak 1 juta untuk membiayai perbelanjaan PERKIM.



gambar Executive-Jet kerajaan yang ditawarkan oleh Dr. Mahathir untuk mem-
Tunku ke Jeddah. Di hari itu juga Tunku ditohmah dalam "Perhimpunan Agung
2".



YTM Tunku dan Dr. Mahathir disertai oleh Dato Paduka Dr. Siti Hasmah dan Tun Suhaila sedang ketawa riang di Hari Wanita yang ke-40.

PENJELASAN DATO' MOHAMED RAHMAT

Setelah beberapa lama cuba menghubungi Dato' Mohamed Rahmat, maka akhirnya pada 24 September 1990 berjaya juga saya menemui beliau. Itu pun bermula apabila Duta Iraq meminta pertolongan saya membuat satu temu janji baginya dengan Pak Mat. Saya kenal dengan Duta Iraq itu yang mana negaranya sekarang sedang menghadapi tekanan yang begitu kuat dari Amerika Syarikat dan Great Britain supaya undur dari Wilayah Kuwait yang telah ditakluki dan menjadikan salah satu wilayah negara Iraq sendiri. Apa yang tidak boleh saya lupakan adalah sewaktu Iraq memasuki Kuwait pada 2 Ogos '90 saya sedang berada di London dan telah mengikuti segala yang berlaku di

Kuwait melalui kaca TV di sana. Saya juga berhasrat hendak menemui Dr. Mahathir untuk membincangkan apa yang patut dibuat sebagai lanjutan dari pertemuan beliau dengan Tunku pada bulan November, 1989. Tetapi malangnya saya diberitahu bahawa Dr. Mahathir sedang sibuk dan ramai orang yang datang menemuinya ketika itu.

Dalam perbincangan saya dengan Pak Mat saya telah sempat menerangkan kepada beliau tentang pandangan Tunku terhadap UMNO. Saya telah katakan dengan terus terang bahawa Tunku merasai kecil hati kerana beliau telah dikecam hebat oleh beberapa orang wakil dalam Perhimpunan Agung UMNO dan perbuatan itu telah membuatkan Tunku mengatakan UMNO itu tidak jujur. Saya telah menerangkan kepada Pak Mat tentang saham Tunku yang menjadi tajuk am hebh disebutkan dalam Perhimpunan Agung itu.

Pak Mat faham dengan perasaan Tunku itu dan telah menjelaskan kepada saya bahawa saham itu adalah di atas nama nominee, oleh itu UMNO tidak dapat memulangkannya kepada Tunku. Berdasarkan kepada penerangan Pak Mat itu maka saya meminta beliau menghadap Tunku untuk menjelaskan perkara yang sebenar. Lagipun saya katakan bahawa Tunku bukanlah seorang yang tidak boleh dibawa berunding. Beliau setuju dengan cadangan saya itu hanya Pak Mat muh mendapatkan 'green light' daripada Dr. Mahathir.

Saya pun merasa sangat lega kerana kesudahannya berjaya juga saya meminta salah seorang dari pemimpin UMNO pergi menghadap Tunku menerangkan kedudukan yang sebenar dan meminta maaf kerana beliau telah dicaci oleh beberapa wakil UMNO.

Tetapi seperti biasa, sebutkan di dalam salah satu tajuk buku ini manusia hanya boleh merancang, Tuhan menentukan segala-galanya. Man proposes but God disposes. Tidak lama selepas pertemuan saya itu Dr. Mahathir telah mengistiharkan Hari Penamaan Calon bagi Pilihanraya Umum pada 12 November, 1990. Jadi dengan perkembangan itu maka pertemuan yang saya aturkan itu tidak jadi diadakan. Dan sehingga ke hari ini pihak UMNO belum lagi dapat menjelaskan perkara tersebut kepada Tunku yang sebelumnya adalah menjadi Tetamu Khas kepada UMNO dalam Perhimpunan Agung 1988 itu.



Gambar ini diambil pada 10 November 1989 ketika Dato' Mohamed Rahmat, Setiausaha Agung UMNO dan Encik Yaakob Mohamad, Setiausaha Kerja UMNO datang menghadap YTM Tunku Abdul Rahman Putra Al-Haj. Kedatangan Dato' Mohamed Rahmat itu adalah kunjungan muhibah dan mengucapkan terima kasih kepada YTM Tunku di atas segala pertolongan Tunku kepada beliau di masa yang sudah-sudah. Dalam waktu yang sama, Dato Mohamed Rahmat telah menyampaikan surat jemputan daripada Presiden Parti UMNO, Dato' Seri Dr. Mahathir Mohamad, menjemput YTM Tunku datang ke Perhimpunan Agung UMNO baru. Turut bersama dalam gambar ini dan mendengar perbualan kedua-dua pemimpin itu ialah penulis sendiri.

LAWATAN DR. MAHATHIR KE SUNGAI CHOH

Apabila saya mendapat tahu bahawa Dr. Mahathir akan melawat kampung kelahiran saya, Sungai Choh, yang pernah menjadi tumpuan orang-orang Melayu untuk mendapatkan tangkal dan aazimat atau ubat kebal sebagai mempertahankan diri daripada keganasan Bintang Tiga pada tahun 50-an, saya berasa amat bangga sekali. Pada ingatan saya, itu adalah kali pertama seorang Perdana Menteri melawat kampung di mana saya dibesarkan dan mula belajar berniaga. Ketika itu saya berniaga di tepi jalan di atas tanah yang beralaskan kertas dengan menjual barang-barang keperluan untuk ribuan manusia yang datang berkereta dan menaiki bas seluruh pelusuk tanahair untuk

bertemu dengan Tuan Guru, Haji Abas. Barang-barang keperluan itu ialah limau nipis, kemenyan, air sejuk dalam botol dan parang panjang. Sehingga kini saya tidak boleh melupakan pengalaman dan pendedahan yang telah banayak memberi perangsang kepada saya untuk terus bermiaga. Elok juga saya sebutkan di sini, disebabkan saya berasal dari keluarga yang tidak berada, maka saya pernah pergi ke sekolah berjalan kaki pergi dan balik tidak berkasut sejaoh 6 batu sehari.

Pada musim cuti sekolah, saya mengikuti ibu bapa saya menoreh getah. Saya juga tidak boleh lupa kepada satu insiden yang menakutkan di mana ibu saudara saya serta anak lelakinya diheret ke hutan di subuh hari oleh Bintang Tiga dan dibunuh dengan kejamnya kerana disyaki menyebelahi orang kulit putih. Sepatutnya, mereka juga mahu memberkas bapa saya tetapi hari mulai siang. Maka selamatlah kami daripada mangsa pembunuhan pihak Bintang Tiga yang tidak berperikemanusiaan.

Dr. Mahathir memberi ucapannya di balai orang ramai yang secara kebetulan berdekatan dengan rumah Tok Guru yang saya sebutkan tadi. Ketika Dr. Mahathir hendak melakukan lawatan rasmi ke Singapura, iaitu sehari sebelum beliau membuat lawatan ke kampung saya, saya telah menemui beliau di Lapangan Terbang, Sg. Besi, untuk bertanyakan sama ada beliau sudi singgah ke rumah abang saya, Haji Mohd Nor yang juga menjadi Dato' Empat Kampung Sungai Choh yang juga berhampiran dengan dewan orang ramai itu. Dr. Mahathir menyatakan beliau mungkin tidak boleh berbuat demikian kerana aturcara beliau yang sangat ketat. Saya memahami kedudukan Dr. Mahathir itu. Jemputan saya itu adalah ikhlas untuk merapatkan lagi tali

silatulrahim di antara orang-orang kampung saya dengan Dr. Mahathir. Lagi pun Dr. Mahathir adalah seorang sahabat lama yang sudah saya kenali semenjak tahun 1964 lagi.

Menyedari bahawa hari lahir Dr. Mahathir akan jatuh pada 20 Disember, iaitu keesokan harinya, saya telah menyediakan hadiah sebagai cenderamata untuk beliau sebagaimana saya lakukan pada tahun-tahun sebelumnya. Sepatutnya hadiah itu diberikan kepada Dr. Mahathir ketika beliau melawat rumah abang saya. Oleh kerana beliau tidak dapat datang, saya berikan hadiah itu sebelum beliau menaiki helikopter. Hadiah saya itu adalah berupa dua helai baju batik sutera yang dijahit oleh kedia jahit saya sendiri di Wisma Central.

Dua hari selepas itu saya menghadiri jamuan yang dianjurkan oleh Dewan Perniagaan Melayu Wilayah Persekutuan. Saya amat berbangga sekali kerana ketika ini Dr. Mahathir telah memakai salah sebuah baju yang telah saya hadiahkan.

Namun, yang memeranjatkan negara dan rakyat, tidak lama selepas menghadiri jamuan itu, Dr. Mahathir telah dimasukkan ke hospital pada 17 Januari, 1989 kerana diserang penyakit jantung sehingga beliau selamat menjalani pembedahan. Ketika Dr. Mahathir berada di hospital pelbagai-bagai spekulasi telah ditimbulkan oleh pelbagai pihak seperti siapa yang akan menggantikan beliau jika beliau tidak berkeupayaan bekerja semula. Namun, Dr. Mahathir bukan orang yang mudah mengalah. Beberapa hari selepas Dr. Mahathir keluar hospital, beliau telah mula berjalan-jalan di perkarangan kediamannya. Beliau kemudiannya memeranjatkan orang ramai apabila membuat keputusan

berjalan kaki pulang ke rumah dari pejabat yang jauhnya kira-kira 3 batu. Inilah Dr. Mahathir yang saya kenali. Ketika beliau berada di hospital, saya telah membuat lawatan beberapa kali untuk bertanyakan tentang kesihatannya dan juga sebagai pemimpin agung Melayu yang telah menunjukkan kepada rakyat bahawa beliau tidak mahu membuang masa biarpun baharu sahaja mula hendak baik dari pembedahan yang berbahaya itu. Ternyata, Allah S.W.T. masih sayang kepada beliau. Dr. Mahathir menunjukkan yang beliau sudah 'slow down' dalam kegiatan-kegiatannya. Sebaliknya Perdana Menteri itu semakin sihat dan cergas sehingga ada kalanya turut 'metikul' rumah ketika menghadiri Hari Semarak. Melihatkan itu semua, kita pula yang akan menjadi risau kerana sepatutnya beliau mengelakkan kegiatan-kegiatan seumpama itu. Oleh ketika negara sangat-sangat memerlukan kepimpinannya, saya telah menulis surat kepadanya menasihatkan supaya beliau cuba elakkan kegiatan seperti itu.

Apa yang jelas sesudah Dr. Mahathir menjalani pembedahan itu, beliau tidak lagi 'aggressive' dalam tindak-tanduknya. Beliau nampaknya sudah 'mellow down' dan ini bukan sahaja dalam pandangan saya tetapi juga pandangan orang ramai yang telah membandingkan beliau sebelum jatuh sakit. Ini adalah satu petunjuk yang baik kerana apabila kita berkeras kita akan ditentang.



Gambar ini menunjukkan penulis sedang menghadiahkan satu bungkus
terisi 2 helai baju sebagai hadiah Hari Jadi YAB Dato' Seri Dr. Mahathir
Mohamad yang ke 61 pada 20 Dis. '88. Gambar ini diambil ketika Dr. Mahathir
melawat kampung penulis di Sg. Choh, Ulu Selangor. Tidak berapa lama
sesudah gambar ini diambil Dr. Mahathir dimasukkan ke hospital untuk pem-



Siapa kata Dr. Mahathir tidak sayangkan Tunku? Cuba lihat bagaimana mesranya mereka bersama

DR. MAHATHIR MASIH SAYANGKAN TUNKU

Di sebalik orang yang dikatakan stubborn, dictator dan lain-lain kata julukan, Dr. Mahathir sebenarnya adalah seorang yang bertimbangrasa dan pengasih lebih-lebih lagi kepada orang yang lebih tua darinya.

Ini dapat saya perhatikan melalui tv dan suratkhabar di Hari Pertabalan Yang Di-Pertuan Agong Yang baru lalu.

Tunku pada hari itu menjadi tetamu khas kepada DYMM Yang Di-Pertuan Agong. Dengan itu Tunku telah diberi penghormatan yang tinggi dengan duduk sebaris bersama-sama dengan keluarga Yang Di-Pertuan Agong.

Tunku menyatakan kepada saya bahawa sebenarnya beliau tidak berhasrat hendak pergi disebabkan kesihatan

beliau yang tidak begitu memuaskan dan Tunku tidak mahu menyusahkan sesiapa, tetapi Tunku telah diundang sendiri oleh Yang Di-Pertuan Agong yang menjunjung kasih terhadap Tunku.

Tunku pada hari yang mulia dan penuh bersejarah itu telah memakai uniform putih yang pernah beliau pakai semasa beliau menjadi Perdana Menteri. Segak sungguh rupa Tunku dengan pakaian itu yang dilengkапkan dengan songkok hitam. Tetapi yang mendukccita sedikit ialah beliau tidak boleh melihat kerana mata kanan Tunku tidak boleh melihat langsung dan mata kirinya pula baru sahaja lepas dibedah yang mana Kerajaan telah membayai pembedahan-nya di Amerika Syarikat. Mata ini juga tidak boleh melihat dengan terang. Tunku juga tidak boleh bergerak atau berdiri kuat.

Sebelum dilangsungkan Pertabalan tersebut semua Raja-Raja akan masuk mengikut giliran masing-masing dan tiap kali seorang Raja masuk semua yang hadir akan berdiri sebagai memberi penghormatan kepada mereka. Apabila Tunku mendengar seruan untuk berdiri maka Tunku pun cuba berdiri beberapa kali sungguhpun beliau lemah hendak berdiri. Semua kejadian ini diperhatikan oleh tetamu-tetamu yang hadir termasuk Dr. Mahathir. Saya agak Dr. Mahathir tidak sampai hati melihatkan Tunku begitu maka beliau telah berjalan ke tempat Tunku dan membisikan kepada Tunku supaya tidak payah bangkit apabila tetamu-tetamu yang lain bangkit. Sesiapa yang melihat kejadian tersebut melalu kaca tv sudah tentu sama-sama merasai "the noble Act" itu yang dilakukan sendiri oleh Perdana Menteri. Tunku tidak menyedari pada ketika itu siapa sebenarnya orang yang menasihatkan beliau supaya tidak payah berdiri tiap-tiap

kali. Tunku kata beliau hanya menyedari tentang hal itu kemudiannya dan Tunku mengucapkan terima kasih kepada Dr. Mahathir kerana mengingati beliau.

Tentang Hari Pertabalan itu Tunku berkata yang beliau teringat benar kepada masa beliau menjadi Perdana Menteri dan apabila Dr. Mahathir membacakan warkah taat setia kepada DYMM Yang Di-Pertuan Agong, Tunku merasai seolah-olah beliau yang berbuat begitu kerana Tunku sendiri telah berada di bawah beberapa Yang Di-Pertuan Agong sebelum Tunku bersara. Tunku juga teringat iaitu sebelum diadakan Pertabalan beliau akan bekerja siang malam untuk memastikan segala-galanya berjalan dengan teratur dan baik. Disebabkan ketika itu Kerajaan tidak semewah sekarang ini beliau terpaksa membuatkan Pertabalan dengan sebaik-baiknya dan penuh meriah. Tetapi disebabkan banyak kerja-kerja yang mesti dilakukan ada pegawai yang jatuh pengsan kerana sangat letih.



Bukan sahaja Dr. Mahathir sayangkan Tunku tetapi Dato' Seri Dr. Hasmah juga menunjukkan kasih sayang terhadap Tunku.

LAWATAN SAYA KE KEDAH

Setelah hari Pencalunan diistiharkan oleh Perdana Menteri, maka semakin sibuklah ahli-ahli politik menjelajah seluruh negeri untuk mendapatkan pengaruh serta undi daripada rakyat.

Sebelum itu Dr.Mahathir telah membayangkan bahawa pilihanraya akan tiba pada bila-bila masa sahaja. Beliau telah menasihatkan anggota parti supaya bersiap sedia untuk menghadapi hari yang ditunggu-tunggu itu. Selain Dr.Mahathir, Dr. Ghafar dan lain-lain menteri juga sibuk dengan perancangan mereka masing-masing untuk memastikan parti BN akan berkuasa semula untuk 5 tahun lagi. Tetapi yang paling sibuk saya lihat ialah Dr. Mahathir sendiri dengan beliau pergi menjelajah ke semua negeri

untuk berkempen sebagai persiapan yang terakhir. Beliau membuat banyak ucapan di banyak bandar dan kampung. Dr. Mahathir adalah tergolong sebagai seorang pemidato yang baik, tidak menjemu dan dapat memikat hati pendengar dengan kata-kata yang lancar dan tersusun. Daya tenaga kerja yang ditunjukkan dan dibuktikan oleh beliau membuat Dato' Ling Liang Sik berkata bahawa beliau tidak pernah melihat seorang Perdana Menteri di mana-mana pun yang bekerja sebegitu kuat dan membuat ucapan yang begitu banyak. Beliau hairan di mana Dr. Mahathir mendapatkan tenaga untuk berbuat begitu.

Pada saya Dr. Mahathir adalah seorang "workaholic". Sikap itulah yang menjadikan Perdana Menteri itu kuat bekerja. Ada pemimpin yang mempunyai sifat "ic" yang lain, seperti "alcoholic" atau "semi-alcoholic". Tidak kisahlah, asalkan dia buat apa yang dia suka "behind closed-doors". Namun sikap "workaholic" Dr. Mahathir sungguh mengagumkan. Sekiranya semua orang-orang Melayu mempunyai sifat seperti beliau, bangsa Melayu boleh maju dalam masa yang singkat.

"Hello, Encik Idris, jangan kerja kuat-kuat," kata seorang kenalan Cina saya. Dia ini selalu datang ke pejabat saya untuk "business chat".

"Lu kerja berapa jam satu hari?" tanya saya bergurau.

"Empat belas jam satu hari sajaaa," katanya. Tentang kata "saja" itu sengaja disebutnya panjang-panjang.

"Saya enam belas jam satu hari sajaaa," kata saya selamba.

"Hai ya, kalau semua "M" macam you, habislah orang "Cin"," katanya.

Bagi pembangkang pula mereka juga tidak ketinggalan membuat segala persiapan untuk memenangi seberapa banyak kerusi. Pelbagai-bagai cara telah dijalankan untuk memenangi pertandingan. Namun, "Money Politics" tidak dapat dielakkan kerana ini sudah menjadi semacam satu "trend baru". Dr. Mahathir dan kerajaan yang dipimpinnya boleh menasihatkan ahli-ahli supaya jangan menggunakan wang untuk memenangi kerusi. Biarkan pengundi memilih siapa yang mereka mahu untuk mewakili mereka. Politik wang secara begini akan memecah-belahkan lagi perpaduan orang-orang Melayu. Ia juga akan merugikan, lebih-lebih lagi jika wakil-wakil rakyat yang berjaya itu sebenarnya tidak layak dan ada orang yang lain lebih layak.

Saya telah terbang ke Alor Setar dengan ditemani oleh anak lelaki saya Rizal Shah, dengan tujuan menemui Dr.Mahathir di kediamannya di Titi Gajah. Tujuan saya ialah untuk mengucapkan selamat berjaya kepada beliau. Kami menginap di Hotel Grand Continental yang berhampiran dengan Klinik Maha yang dahulunya kepunyaan Dr. Mahathir. Saya tidak pasti pula sama ada klinik itu masih menjadi milik beliau.

Pada keesokan harinya saya dan anak saya bernaib baik kerana dapat menumpang kereta seorang sahabat iaitu Haji Shahrani, tuanpunya syarikat Shahpadu Holdings yang juga penyokong kuat Dr.Mahathir. Beliau juga mahu ke rumah Dr.Mahathir. Itu adalah kali kedua saya berkunjung ke kediaman Dr. Mahathir. Sampai di kediamannya, saya dapati bahawa beliau dan Datin Dr.Siti Hasmah sedang bersiap-sedia untuk pergi ke rumah UMNO. Saya segera menunggu Dr.Mahathir di pintu rumahnya itu untuk men-

ghulurkan tangan mahu bersalaman dengan beliau serta mengucapkan selamat berjaya. Saya adalah orang yang pertama yang berbuat begitu sebaik sahaja beliau keluar rumah untuk pergi ke tempat penamaan calon. Kepada Dr. Mahathir saya fikir perkara yang saya lakukan itu tidak luar biasa kerana saya kerap kali berbuat begitu kepadanya menunjukkan kesetiaan sebagai sahabat yang kagum akan kewibawaan beliau. Ketika beliau dipilih sebagai pengurus Anti-Dadah di Vienna, Austria, misalnya, pada 17 Jun, 1987, saya telah menghantar teleks mengucapkan tahniah di atas kejayaan beliau itu. Dr. Mahathir juga telah beberapa kali mengucapkan tahniah kepada saya jika saya berjaya dalam satu-satu bidang yang saya buat. Begitulah Dr. Mahathir yang saya kenali. Beliau tidak akan ragu-ragu memberi tahniah jika orang itu benar-benar "*deserving of the credit*".

Selepas selesai di sana, saya dan anak saya telah mengambil teksi untuk pergi pula ke Sungai Petani di mana Dato' Paduka Daim Zainuddin, iaitu Menteri Kewangan Malaysia sedang menunggu giliran pencalonan beliau. Itu adalah kali pertama saya pernah berada di situ. Saya sempat menemui Dato' Paduka Daim untuk bersalaman dan mengucapkan selamat berjaya kepada beliau. Pada suatu ketika dahulu saya berpendapat bahawa Dato' Daim "sombong" orangnya tetapi setelah saya dapat berkenalan dengan beliau dari dekat saya mendapati beliau seorang yang baik dan sanggup mendengar masalah-masalah yang dihadapi oleh orang-orang Melayu, lebih-lebih lagi kepada mereka yang ada kaitan dalam dunia perniagaan. Saya juga pernah bercakap dengan beliau tentang pentingnya perpaduan orang-orang Melayu di ketika ini di mana pencapaian ekonomi orang Melayu sangat tidak memuaskan. Bagaimanapun beliau adalah

seorang yang tidak suka bercakap banyak. Semenjak beliau memegang jawatan Menteri Kewangan beliau nampaknya sudah berjaya membawa ekonomi Malaysia ke tahap yang stabil. Hanya orang ramai selalu bertanya kerana yang menjadi persoalan besar kepada mereka ialah mengapakah sangat tinggi perbezaan pertukaran wang kita jika dibandingkan dengan wang Singapura? Kita berharap Dato' Paduka Daim akan membuat satu pengumuman yang menguntungkan rakyat pada HARI BELANJAWAN nanti.



Gambar menunjukkan penulis sedang bersalaman dengan Dato' Seri Dr. Mahathir Mohamad di hadapan pintu masuk kediamannya di Titi Gajah, Alor Star, Kedah. Penulis adalah orang yang pertama bersalaman dan mengucapkan selamat berjaya kepada beliau di pagi hari pencalonan beliau. Selain daripada mengucapkan selamat tujuan penulis adalah juga untuk merapatkan lagi silatulrahim. Gambar ini diambil oleh anak penulis, Rizal yang ada ikut bersama.

BANK BUMIPUTRA MENGHAMPAKAN PERPADUAN

Perpaduan bukan sahaja mesti wujud antara orang-orang politik yang 100% melibatkan diri di arena politik. Bahkan perpaduan juga mesti diwujudkan di kalangan orang politik yang menjalankan perniagaan. Jika tidak, percakaran dalam politik akan terbawa-bawa ke arena perniagaan. Ini membuatkan "business" tidak berjalan lancar.

Beberapa tahun dahulu saya telah dinasihatkan oleh Tunku supaya saya masuk politik. Ini beliau sarankan kepada saya kerana barangkali beliau mendapati saya berminat dalam politik. Saya terpaksa berterus terang dengan Tunku iaitu saya tidak ada wang untuk berbuat demikian.

Apatah lagi sekarang ini seseorang itu mesti mempunyai wang ringgit yang banyak kalau hendak bergiat dalam politik, jika tidak lupakan sahajalah hasrat itu.

Seperti yang telah saya sebutkan, perpaduan itu penting di mana juga untuk menjayakan sesuatu. Dalam hal ini, sudah beberapa tahun lamanya Bank Bumiputra menjadi ejekan oleh orang-orang Melayu kerana dasarnya yang begitu keterlaluan sehingga ramai usahawan-usahawan bumiputra telah gulung tikar dibuatnya. Ini termasuk yang berdosa dan yang tidak berdosa. Ramai orang telah menyalahkan pemimpin-pemimpin kita kerana tidak memilih orang yang benar-benar boleh mentadbirkan bank tersebut kerana orang-orang Melayu kebanyakannya bergantung kepada bank tersebut untuk mendapatkan kemudahan dan sebagainya. Dan bukan sebagai "algojo". Bank ini tidak diwujudkan untuk menjalankan dasar itu. Bermacam-macam kata kesat telah dilemparkan kepada Bank Bumiputra kerana dasarnya yang tidak "berperikemanusiaan" itu. Kini, kebanyakan pelanggan-pelanggan dan usahawan-usahawan bumiputra adalah juga ahli parti UMNO dan penyokong-penyokong UMNO. Ramai yang marah-marah kepada pucuk pimpinan parti kerana tidak berbuat sesuatu untuk membetulkan keadaan yang tidak memberi galakan kepada usahawan-usahawan Melayu. Peminjam-peminjam yang berhutang dan hanya mampu membuat pembayaran mengikut keupayaan mereka dengan cara beransur-ansur tidak diterima oleh bank, walhal Bank Negara tidak menyekat pembayaran seperti itu dan bank lain juga boleh menerima cara ini asalkan ada usaha untuk membayar semula. Saya pernah menegur dasar yang dipraktikkan oleh bank yang mengecewa serta merendahkan

teguran saya itu tidak diterima dengan tulus ikhlas. Saya telah menulis surat kepada Dr. Mahathir dan juga membuat pertemuan dengan beliau untuk memberitahu beliau tentang kegelisahan orang-orang Melayu tentang keghairahan bank tersebut untuk menuntut hutang daripada orang-orang Melayu. Saya juga telah membawa perkara ini ke pengetahuan beberapa pemimpin lain supaya mencari jalan membetulkan keadaan ini supaya orang-orang Melayu terus menyokong bank itu dan seterusnya UMNO. Syukur Alhamdullilah akhirnya kerajaan telah sedar akan kepincangan dan perasaan pemimpin-pemimpin dan usahawan-usahawan Melayu. Maka kerana itulah agaknya "orang lama" telah dilantik mempengerusikan bank itu pada 16 April 1990.

Saya sedar semenjak Dato' Hanafiah Hussain menerajui bank itu, beliau telah membawa beberapa perubahan positif yang menggembirakan bukan sahaja kepada katitangan bank itu malah juga orang-orang Melayu amnya. Saya tidak terperanjat dengan perlantikan beliau itu kerana pemilihan itu memang tepat dan sesuai sekali dengan masanya. Dato' Hanafiah adalah salah seorang yang bertanggungjawab di atas penubuhan bank tersebut setelah pihak kerajaan mengetahui bahawa orang-orang Melayu pada ketika itu tidak mudah mendapatkan pinjaman daripada bank-bank lain. Beliau ialah seorang Chartered Akauntan bertauliah dan adalah anak Melayu pertama lulus bidang itu daripada Universiti Manchester, England. Beliau juga mempunyai 'integrity' yang tinggi. Saya gembira kerana nama Bank Bumiputra sudah harum semula dan tidak kedinginan lagi kata-kata kesat yang dilemparkan kepada bank itu. Bagaimanapun, mungkin masih ada pihak yang masih tidak puashati lagi dengan pengurusan bank itu. Namun,

seperti yang kita sedia maklum memang tidak mudah memuaskan hati semua pihak. Hanya saya berharap dan berdoa, orang Melayu akan terus menyokong Bank Bumiputra yang harus mempunyai pengurusan yang amat baik sekali di bawah pimpinan Dato' Hanafiah. Dato' Hanafiah dapat menumpukan sepenuh masanya kepada kegiatan dan pengurusan bank itu kerana beliau tidak terlibat dengan syarikat-syarikat lain. Khabarnya, beliau amat gembira kerana dapat berkhidmat dengan bank itu di mana beliau boleh membantu orang-orang Melayu yang masih jauh ketinggalan di bidang perniagaan dan pengurusan.

Untuk mengetahui lebih lanjut tentang Bank Bumiputra, tunggulah buku saya yang akan terbit tidak lama lagi. Buku ini akan diberi tajuk "Bank Bumiputra Dahulu Dan Sekarang".

Buku ini mesti dibaca oleh setiap orang yang terlibat dalam perniagaan, sama ada peniaga kecil-kecilan atau seorang usahawan besar yang berjaya bahkan mereka yang berminat mengetahui peranan Bank Bumiputra dahulu dan sekarang ini, harus membaca buku ini.



majlis kesyukuran diadakan di rumah penulis untuk meraikan perlantikan Dato' Hanafiah Hussein sebagai Pengurus Executive Bank Bumiputra. Kelihatan dalam gambar ini Dato' hanafiah Hussein duduk di sebelah kiri penulis dan di sebelahnya pula Tuan Haji Isa bin Ali yang membacakan doa.



Dato' Muza Hilmi bergambar bersama David Rockefeller, Pengurusi Chase Manhattan Bank di New York semasa Dato' Muza membuat lawatan sebagai Menteri Perusahaan Utama. Juga kelihatan Tan Sri Jamil Jan, pengurusi HICOM sekarang dan di sebelahnya ialah penulis yang pada ketika itu berharus di Bank tersebut dan dapat bersama menguruskan pertemuan di antara David Rockefeller dan Dato' Muza.

PERANAN AKHBAR-AKHBAR DAN MEDIA MASSA DALAM MENCARI PERPADUAN

Akhbar-akhbar dan media massa memainkan peranan yang sangat penting dalam kehidupan manusia sehari-hari. Selain dari menyebarkan berita-berita dari dalam negeri ia juga dapat memberi berita dari luar negeri yang patut diketahui oleh orang ramai supaya kita sedar apa yang berlaku di sekeliling kita.

Kepada kebanyakan kita akhbar itu adalah sebagai 'makanan' kepada kehidupan kita hari-hari. Jika seseorang itu sudah biasa dengan akhbar mereka tidak boleh dipisahkan dan jika dipisahkan mereka boleh naik 'gila' kerana tidak dapat makan pada hari tersebut.

Tetapi apa yang tidak kurang pentingnya ialah akhbar boleh membawa kebaikan dan boleh juga membawa kerosakan. Dalam pada itu, akhbar untuk melakukan penjualan surat khabar mereka lebih-lebih lagi jika ada persaingan yang hebat, mereka akan memuatkan cerita-cerita dan gambar-gambar yang menarik. Tajuk-tajuk cerita boleh diubah supaya ianya lebih menarik.

Tidaklah hairan jika akhbar melaporkan cerita atau berita yang benar, tetapi sangatlah mendukacitakan apabila akhbar-akhbar mengambil kesempatan dengan memutarbelitkan cerita yang sebenar kepada yang tidak benar. Kepada pihak musuh cara ini adalah baik kerana mereka akan mendapat 'faedah' atau sokongan dari pihak yang disokong tetapi apa akan jadi kepada pihak yang menjadi sasaran?

Di negara ini misalnya banyak kejadian yang telah berlaku boleh dielakan jika pihak akhbar memainkan peranan mereka yang impartial.

Saya suka memberi beberapa contoh iaitu pada masa perpecahan orang-orang Melayu bermula, sepatutnya mereka ini memainkan peranan yang positif untuk menyatupadukan orang-orang Melayu dengan tidak membangkitkan perkara-perkara yang tidak diingini berlaku. Mereka sedia maklum apa yang patut dilakukan supaya tidak ada perasaan benci membenci antara satu pihak dengan pihak yang lain.

Apabila akhbar-akhbar suka mengapi-apikan satu-satu isu itu, sudah tentu ia dibalas dengan kata-kata yang tidak akan membela. Jika kita perhatikan beberapa tahun yang lalu, kata-kata pemimpin-pemimpin negara termasuk pemimpin-pemimpin dari pihak pembangkang telah sengaja

ditukar dari makna asal. Perbuatan seperti ini bukan sahaja membesarakan 'retak' yang sudah sedia ada, tetapi memecahkannya sekali. Misalnya, Tunku telah dimaki hamun oleh pihak tertentu kerana menasihatkan orang-orang Melayu membunuh UMNO. Berbagai-bagai reaksi ditujukan kepada Tunku tetapi apa yang Tunku sebutkan ialah menyeru orang-orang Melayu membunuh UMNO (Baru).

Pada saat orang-orang Melayu mahukan perpaduan di mana akhbar-akhbar yang sepatutnya menunjukkan tauladan yang baik telah sengaja memutar-belitkan berita yang tidak membawa kepada perpaduan. Perkara-perkara yang kecil diperbesarkan dan dengan itu membuatkan orang marah kepadanya. Tetapi jika mereka menyedari yang perpaduan itu sangat penting bagi orang-orang yang tidak bersehaluan, maka mereka sepatutnya lebih bertanggungjawab. Yang buruk itu boleh diperbaiki bunyinya supaya sedap dibaca oleh itu mungkin orang-orang yang tidak bersehaluan tidak boleh berbaik-baik semula.

Akhbar Utusan Malaysia Jumaat 16 November, 1990 telah menyiaran berita kecil bertajuk: TUNKU TIDAK DIJEMPUT. Tunku telah menyatakan bahawa beliau telah bersara dari politik dan tidak mahu ambil kisah lagi tentang UMNO sekarang. Yang demikian apa perlu lagi disebut-sebut. Harus diingat, Dato' Mohamed Rahmat pernah bertemu Tunku dan mengucapkan terima kasih kepada Tunku di atas pertolongan Tunku kepada beliau di masa-masa lampau.

Jadi, siapa yang gatal tangan atau gatal mulut?



Penulis serta anak lelakinya, Rafiq dan anak perempuannya, Nor Idrila, sedang bergambar dengan Dato' Seri Anwar Ibrahim di kediamannya di Petaling Jaya semasa mengunjungi beliau di Hari Raya Aidil Fitri. Dato' Seri Anwar Ibrahim dikenali di atas perjuangan beliau untuk meningkatkan penyertaan bumiputra di sektor perniagaan dan perusahaan.

DATO' SERI ANWAR IBRAHIM

Selain pertemuan dan perbincangan dengan Dr. Mahathir, Tunku, Dr. Ghafar Baba dan Dato' Seri Najib, saya juga menemui Dato Seri Anwar Ibrahim. Tokoh muda ini telah saya kenali semenjak tahun 1969. Kami pernah bersama-sama menghadiri persidangan 'World Assembly of Youth' di Liege, Belgium, tahun 1969 dan Manchester, England tahun 1972. Rombongan itu turut disertai oleh Datin Paduka Hajah Rahmah Osman yang kini menjadi Ketua Wanita Semangat 46.

Dalam perbincangan saya dengan beliau di rumahnya, saya telah menyatakan kebimbangan mengenai perkembangan orang Melayu yang semakin berpecah-belah. Saya juga telah menyentuh pandangan kebanyakan orang Melayu terhadap beliau yang dikatakan "Green-Eyed Boy of P.M."

Dato' Seri Anwar kemudiannya menjelaskan bahawa segala anggapan itu adalah tidak benar. Katanya, dia tidaklah begitu 'ambitious' seperti anggapan kebanyakan orang. Malah, katanya tempat yang diduduki inipun adalah dengan kehendak perwakilan yang mengundinya. Toh mahan sesetengah pihak menyatakan beliau berkeinginan menjadi Perdana Menteri ketika itu juga tidak benar kerana beliau masih muda dan ramai lagi pemimpin yang lebih berpengalaman serta lama berjuang dalam UMNO.

Menurut Dato' Seri Anwar lagi, beliau tidak mahu dianggap mahu cepat naik dan menyakitkan hati sahabat-sahabat lain dalam parti. Walaupun telah lama mengenalinya, saya mengakui tidak pernah melawat pemimpin ini ketika berada di penjara. Oleh itu, pada kesempatan pertemuan itu saya telah meminta maaf kepadanya kerana kegagalan saya mengunjunginya dan bertanya khabar ketika beliau ditahan di bawah ISA.

Bagi saya Dato' Seri Anwar adalah pemimpin muda yang sentiasa ikhlas dan jujur dalam perjuangan, lebih-lebih lagi untuk membela nasib bangsa Melayu. Beliau juga mudah memberi kerjasama kepada sesiapa yang memerlukan nasihat dan pertolongannya. Saya sendiri pernah mendapat kerjasama daripada beliau ketika menghadapi beberapa masalah. Pemimpin muda ini juga pernah menasihatkan saya agar menulis kepadanya jika mempunyai sebarang cadangan yang harus dibincangkan dengan Dr. Mahathir.

Seperti sebelumnya, saya turut menasihat Dato' Seri Anwar menghadap Tunku. Saya memang amat bernasib baik kerana cadangan saya itu dipersetujuinya. Kesediaan beliau itu telah saya khabarkan kepada Tunku dan turut diper-

setujuinya. Lebih-lebih lagi, Tunku sebenarnya berbangga dengan kejayaan Dato' Seri Anwar yang telah dilantik sebagai Pengerusi UNESCO. Bagi Tunku kejayaan itu bukan sahaja untuk diri pemimpin muda itu tetapi juga kepada negara.

Tunku juga turut menyenaraikan Dato' Seri Anwar antara pemimpin pelapis yang diharapkan menerajui kerajaan pada masa depan. Hanya yang Tunku bimbangkan, sama ada Dato' Seri Anwar masih lagi berpegang teguh kepada fahaman yang pernah dianutinya ketika bersama ABIM.



Gambar menunjukkan penulis bersalaman dengan YBM Tengku Rithaudeen, bekas Menteri Pertahanan semasa mengunjungi beliau di kediamannya di Hari Raya Aidil Fitri baru-baru ini. Ketika YBM Tengku Razaleigh hamzah bertarung dengan Datuk Seri Dr. Mahathir Mohamad untuk Parti Presiden UMNO pada tahun 1987, penulis telah berbincang dengan Tengku Rithaudeen dan meminta beliau memainkan apa-apa jua peranan untuk mengelakkan pertandingan tersebut.



Dato' Seri Rafidah Aziz, Ketua Pergerakan Wanita UMNO sedang bercakap dengan Dato' Shoib Ahmad ketika merwnggu ketibaan YTM Tunku Abdul Rahman pada Perhimpunan Agung UMNO tahun lalu.



Gambar ini menunjukkan Dato' Seri Mahathir Mohamad sedang membelak satu gambar yang dihadiahkan kepada beliau oleh penulis. Gambar itu menunjukkan Dato' Seri Dr. Mahathir bersama-sama dengan YTM Turku Abdul Rahman Puira Al-Haj, Tun Hussein Onn dan Dato' Musa Hitam sedang ketawa riang. Sudah tentu gambar itu memberi kenangan manis kepada Dr. Mahathir kerena di ketika itulah beliau dengan secara terbuka meminta maaf daripada YTM Turku di atas apa-apa juga kesalahan dan kesilapan beliau yang sudah-sudah.

DATO' ABDULLAH AHMAD BADAWI

Pada 12 Disember 1987, saya telah mengunjungi Dato' Abdullah Ahmad Badawi di rumahnya di Bangsar baru, iaitu sejurus beliau terkeluar dari kabinet Dr. Mahathir. Saya difahamkan penyingkiran beliau kerana pembabitannya dalam kem Dato' Musa Hitam.

Saya telah menawarkan diri untuk melakukan sesuatu bagi merapatkan semula hubungan beliau dengan Dr. Mahathir. Apa yang menarik mengenai perbualan saya dengan tokoh dari Pulau Pinang itu, beliau mengakui sebenarnya tidak pernah menyebelahi sesiapa seperti yang dianggapkan oleh banyak pihak. Sebaliknya, katanya beliau telah banyak membantu dan bekerjasama dengan Dr.

Mahathir sama ada masalah politik atau negara ketika berada dalam kerajaan dahulu. Malah, hubungan mereka juga rapat dan Dr. Mahathir sendiri telah memberi kepercayaan dalam banyak perkara untuk beliau selesaikan. Soal beliau tidak menyokong atau menentang kepimpinan Dr. Mahathir tidak timbul sama sekali. Beliau kesal dengan tohmahan menyatakan beliau anti Dr. Mahathir.

Ketika itu juga Dr. Mahathir sedang membuat persiapan untuk melakukan kunjungan ke Filipina. Saya telah sempat menulis surat kepada beliau dan memberitahu pertemuan dan perbincangan saya dengan Dato' Abdullah. Sungguhpun saya tidak begitu dekat dengannya, saya tahu beliau telah banyak berjasa kepada UMNO dan negara. Ketokohan beliau ketika memimpin beberapa kementerian terutama Kementerian Pertahanan dan Kementerian Pendidikan (dahulunya Kementerian Pelajaran amat terserlah. Mengenai pembabitannya dalam Team 'B' sewaktu Perhimpunan Agung UMNO 1987 bukanlah menggambarkan penentangan beliau sepenuhnya terhadap kepimpinan Dr. Mahathir. Hanya beliau sendiri yang dapat memberi jawapannya.

Mengenai 'permusuhan' beliau dengan Dato' Seri Anwar seperti yang didakwa oleh sesetengah pihak, saya anggap itu adalah khabar-khabar angin yang sehingga kini belum dapat dibuktikan. Bagi saya, jika benarlah khabar-khabar angin itu keadaan ini amatlah mendukcitan dan tidak menguntungkan mana-mana pihak. Kenapa saya berkata demikian? Bagi saya, kedua-dua pemimpin ini mempunyai kewibawaan dan ketokohan tersendiri dan sama hebat. Alangkah untungnya bangsa Melayu dan negara jika kepimpinan Dato' Abdullah dan Dato' Seri Anwar dapat

dirangkumkan ke dalam satu kemunufakatan. Soal dua pemimpin tertinggi dari satu negeri untuk menerajui kepimpinan negara pada masa akan datang, sebenarnya bukanlah mustahil lebih-lebih lagi demi perpaduan Melayu. Asalkan Melayu dan mempunyai kepimpinan yang menguntungkan bangsanya apalah salahnya disokong walaupun tidak satu negeri.



Penulis sedang berbual dengan Pak Lah di Lapangan Terbang Sg. Besi seketika menunggu ketibaan jenazah allahyarham Tun Hussein Onn dari Amerika Syarikat.



Gambar ini diambil di pejabat YTM Tunku Abdul Rahman Putra Al-haj yang bersebelahan dengan rumah kediaman Tunku. Gambar ini diambil sebelum perbincangan mereka dijalankan. Barangkali Dr. Mahathir sedang bertanyakan kepada Tunku, "di sinakah pejabat Tunku dan tempat Tunku bekerja?"



Pergerakan Exco Pemuda UMNO dan YTM serta penulis bersama mendoaakan agar pertemuan itu mendapat kejayaan. Gambar bawah bergambar ramai - ramai bersama Tunku.

DATO' SERI NAJIB TUN ABDUL RAZAK

Dr. Mahathir pernah berkata Kepimpinan Umno tidak boleh dijadikan pusaka turun menurun seperti raja menyerahkan tahta kepada anaknya. Dato' Seri Rafidah Aziz juga ketika diwawancara dalam rancangan Nona, TV3, berkata kepimpinan tidak boleh diwarisikan kepada anak-anak, melainkan dengan kehendak dan usaha mereka sendiri.

Bagaimanapun, dalam senerio kepimpinan UMNO kini, tidak dapat dinafikan ramai anak-anak tokoh UMNO mewarisi kepimpinan ayah masing-masing. Hampir semua Menteri Besar, Ketua Menteri, Menteri Muda dan Setiausaha Parlimen adalah anak pemimpin-pemimpin UMNO. Dato'

Seri Anwar, Dato' Abdullah Ahmad Badawi, Haji Suhaimi, Tan Sri Rahim Thamby Chik, Dato Mohamad Isa dan Hajah Sharifah Dora, semuanya anak pejuang UMNO. Dr. Mahathir tidak dapat berbuat apa-apa dengan fenomena yang menjadi tradisi ini. Pun, begitu apa salahnya jika pewaris itu memang layak dan wajar. Apalah yang hendak digaduhkan jika pewaris itu memang berkebolehan dan apabila sampai ketikanya nanti lebih berkemampuan daripada bapa masing-masing.

Begitu juga dengan Dato' Seri Najib yang berbapakan seorang pemimpin agung dan sehingga kini masih menjadi sebutan seluruh rakyat Malaysia terutama bangsa Melayu. Pergilah ke mana-mana pasti kita akan dapat menyaksikan kemajuan-kemajuan dan pembangunan hasil kepimpinan Al-lahyarham ketika menerajui kepimpinan negara ini.

Apabila melalui Bangi dan Shah Alam, kita akan melihat bangunan UKM dan ITM yang tersergam gagah. Di sitolah anak-anak Melayu yang dahulunya ketinggalan di bidang pendidikan dan professional dididik dari masa ke semasa. Itu adalah sebahagian jasa dan peninggalan Al-lahyarham yang terbesar kepada survival bangsa Melayu yang dilakukannya melalui Dasar Ekonoli Baru (DEB). Bukan ini saja jasa Allahyarham. Terlalu banyak untuk dijelaskan di sini. Namun, nama besar Allahyarham itu pasti akan harum sehingga bila-bila. Keunggulan Allahyarham itulah yang sebenarnya menyukarkan kedudukan Dato' Seri Najib pada peringkat awal kemunculannya dalam UMNO.

Beliau sering ditohmah 'cepat naik' dan mudah mendapat tempat kerana orang UMNO masih sayangkan Al-lahyarham Tun Abdul Razak. Apa sahaja yang dilakukan oleh Dato' Seri Najib pasti akan cuba diperbanding-ban-

dingkan dengan kebolehan Allahyarham. Begitu juga ketika mula-mula menjadi Timbalan Menteri, harapan yang diberikan kepada beliau terlalu tinggi hingga melebihi harapan kepada Menteri Penuh. Orang selalu mengharapkan Dato' Seri Najib mesti lebih baik daripada ayahnya. Maka, sudah pastilah beliau terpaksa sentiasa berhati-hati. Ini kerana, jika tersalah langkah atau melakukan kesilapan, orang akan mencelanya sebagai perosak nama baik Tun Abdul Razak.

Anggapan dan harapan begitu tentu tidak mudah dipikul oleh Dato' Seri Najib. Jika saya berada di tempatnya, tentu saya dapat merasakan sukarnya melalui keadaan sedemikian.

Namun, ibarat buah kelapa, jika memang sudah elok isinya daripada pokok mana ia datang, pasti lemak santannya dan enak dibuat gulai.

Dato Seri Najib akhirnya dapat membuktikan beliau memang mampu menjadi pemimpin dan bukan hanya menumpang nama bapa. In kerana nama bapa sahaja bukan boleh dijadikan tiket untuk membawa kemakmuran dan pembangunan di negeri Pahang. Ketika beliau dilantik sebagai Menteri Besar, kita tentu masih dapat mengingati bagaimana Dato Seri Najib memerentah Pahang.

Menjadi Menteri Besar bukan mudah. Ia memerlukan kebijaksanaan dan kegigihan yang bukan kepala. Setakat menumpang nama seseorang, sesebuah negeri itu tidak mungkin di bangunkan. Lebih-lebih lagi Pahang adalah negeri yang terbesar di Semenanjung dan mempunyai banyak daerah. Adalah dianggarkan satu-satu daerah di negeri itu hampir sama besar dengan saiz Negeri Sembilan. Ini bermakna, Pahang memerlukan lebih ramai menteri besar

untuk menguruskannya. Namun, terbukti Dato Seri Najib mampu melakukannya berseorangan. Jika sudah begitu tidak benarlah nama ayah yang meletakkan kedudukan Dato Seri Najib ketika mentadbir Pahang dahulu.

Bagi saya Dato Seri Najib membina imej politiknya secara individu. Apa yang dilakukan di beberapa kementerian seperti Pendidikan (Timbalan), Kewangan (Timbalan) dan Belia dan Sukan (Menteri Penuh) selama ini membuktikan adalah usahanya sendiri.

Lihat bagaimana meriahnya dunia sukan tanahair ketika beliau menerajui kementerian tersebut. Malah, boleh dikatakn pada zaman beliaulah nasib ahli sukan negara semakin terbela. Ada pihak menyatakan Dato Najiblah yang memberi imej lumayan dan kaya kepada beberapa ahli sukan negara.

Sukan tanahair juga semakin maju dengan usaha beliau mewujudkan pelbagai program, antaranya Anugerah Cemerlang Sukan Negara dan Kem Bakat untuk ahli-ahli sukan muda Dato Seri Najib juga dikatakan sangat komited pada tugasnya di kementerian itu. Beliau adalah Menteri paling rapat dengan ahli-ahli sukan dan tidak keberatan makan nasi bungkus dengan mereka.

Lihat sahaja dalam pelbagai kejohanan sukan yang melibatkan ahli- ahli sukan negara sama ada di sini atau luar negara. Beliau sering kelihatan di gelanggang untuk sama-sama memberi perangsang dan semangat kepada peserta-peserta.

Kita juga tentu masih dapat mengingati detik manis ketika Malaysia berjaya mendapat tempat kedua dalam Sukan Sea Ke-15 tahun 1989 dengan mengutip 67 pingat emas. Kerana kejayaan itu rakyat telah menerima ‘bonus’

dari pada Dr. Mahathir iaitu cuti umum selama sehari. Rakyat seperti dipukau dengan kejayaan itu dan seolah-olah lupa pada masalah-masalah lain yang sedang menghimpit negara. Ini kerana kejayaan itu adalah kejayaan semua rakyat Malaysia tidak mengira agama, bangsa dan fahaman politik. Malah, ada yang berseloroh menyatakan 'mood' rakyat sedang dalam, keadaan yang baik dan jika diadakan pilihan-rayu umum ketika itu, Barisan Nasional akan menang dengan mudah.

Begitulah Dato Seri Najib yang saya kenali. Wajahnya yang saling tidak tumpah dengan ayahnya itu kini menapak selangkah lagi dengan perlantikan beliau sebagai Menteri di Kementerian Pertahanan. Walaupun sukan negara kehilangan beliau, kementerian baru yang didudukinya kini akan lebih memberi pendedahan kepada beliau untuk muncul sebagai pemimpin harapan UMNO dan negara akan datang. Walaupun jawatan Pemuda UMNO yang di sandangkan kini adalah di atas perlantikan Presiden Parti, Dato Seri Najib tetap berjaya mewakili kematangan kepimpinan generasi muda yang bakal membentuk negara di masa hadapan.

Sementara itu dalam perbualan-perbualan saya dengan Tunku lebih-lebih lagi sesudah Pergerakan Pemuda menemui Tunku, Tunku pernah menyatakan kepada saya bahawa Dato Najib mempunyai masa hadapan yang cemerlang sebagai pemimpin pelapis. Hanya yang menjadi halangan ialah beliau masih muda dan memerlukan pendedahan yang lebih luas. Tunku menganggap Dato Najib sebagai anaknya lebih-lebih lagi ayahanda Dato Najib, Tun Abdul Razak adalah sahabat seperjuangannya.

Dalam pada itu juga saya suka merakamkan terima kasih saya kepada beliau kerana beliau yang mula-mula menyatakan hasrat beliau hendak menghadap Tunku dan untuk merapatkan pemimpin-pemimpin yang tidak bersefahaman. Beliau patut diberi pujian kerana dengan ketiadaan beliau kemungkinan saya tidak dapat menemukan pemimpin-pemimpin UMNO baru dengan Tunku.



'Seri Najib, YTM Tunku dan penulis di rumah Tunku beberapa hari
lalu Dato' Seri Dr. Mahathir menemui Tunku.



Dato' Seri Najib sedang tunduk mencium tangan YTM Tunku seketika Dato' seri Najib tiba menghadap Tunku.

HARI WANITA KE 40

Hari Wanita yang ke 40 telah berlangsung di Pusat Dagangan Dunia Putra (PWTC) pada 15hb. November, 1989. Tunku Abdul Rahman Putra Al-haj telah hadir bersama sebagai tetamu khas Pergerakan Wanita UMNO. Undangan kepada Tunku telah disampaikan oleh Timbalan Pergerakan Wanita UMNO Dato' Napsiah Omar bagi pihak Dato' Seri Rafidah Aziz iaitu Ketua Pergerakan Wanita UMNO. Pada mulanya Tunku berasa keberatan untuk hadir kerana Tunku sedar perbuatan itu tidak akan direstui oleh Semangat 46 kerana saya tahu Tunku telah banyak sangat mengalah dan memenuhi undangan dari UMNO baru. Biarpun begitu Tunku berlainan pendapat kerana pertamatamanya beliau tidak ada bergaduh apa-apa dengan Wanita" kerana katanya, "Wanitalah yang memainkan peranan yang

begitu berkesan semasa negara bekerja kuat untuk mencapai kemerdekaan dari Kerajaan British. Mereka jugalah yang sanggup menjual dan menggadai harta-harta atau barang kemas mereka untuk menjayakan perjuangan UMNO.” Pendapat Tunku lagi, sekiranya “tidak adanya perhubungan dengan UMNO baru sudah tentu sukar bagi kedua pihak yang bertelagah mencari jalan untuk berdamai.” Kerana itulah Tunku membuat keputusan untuk tidak mengecewakan kaum wanita yang telah menunjukkan kasih-sayang mereka terhadap Tunku sewaktu Pergerakan Exco Wanita UMNO mengunjungi Tunku di kediamannya.

Sambutan yang diberikan oleh wanita kepada Tunku di PWTC itu sungguh meriah. Tunku telah diberi sambutan permaidani merah dan bunga manggar. Saya perhatikan semua yang hadir ingin sangat melihat wajah Tunku seolah-olah sudah lama sangat mereka tidak melihat wajah Tunku, memanggil-manggil nama Tunku dari jauh kerana tidak berpeluang bercakap dari dekat. Sambutan begitu meriah dan tempat tersebut penuh sesak dengan ahli-ahli UMNO dan para jemputan. Tunku tersenyum sahaja dan sekali-sekali akan bertanya di mana beliau berada kerana mata Tunku tidak berapa baik. Bagaimanapun beliau berasa sangat gembira kerana tidak dilupakan. Kalaulah Tunku boleh melihat dengan baik dan terang alangkah gembiranya beliau kerana sudah lama beliau tidak melihat sambutan yang begitu besar dan meriah yang disulam dengan lagu-lagu patriotik untuk menaikkan semangat Melayu supaya sayang kepada bangsa dan negaranya.

Selain dari Tunku, Presiden Parti UMNO Baru Dato' Seri Dr. Mahathir Mohamad juga hadir bersama termasuk pemimpin-pemimpin Wanita yang telah bersara dari politik.

Tunku telah diberi penghormatan yang setimpal sebagai bekas Presiden UMNO Lama dengan duduk di atas pentas bersama-sama dengan Dr. Mahathir dan Tun Hussein Onn. Sungguhpun Tunku, begitu lemah dan susah hendak berdiri tetapi beliau cuba juga bangkit untuk menghormati tuan rumah dan Wanita UMNO.

Dato' Seri Rafidah Aziz sebagai ketua Pergerakan Wanita UMNO telah memberi ucapan yang bernas dengan mengingatkan ahli-ahli tentang peranan wanita di masa hadapan. Dato' Seri Rafidah juga telah mengalu-alukan kedatangan dan kehadiran Tunku di Hari Wanita yang ke-40 itu. Peristiwa itu telah memberi satu erti yang amat penting kepada WANITA. Di hari itu juga Pergerakan Wanita UMNO telah menghadiahkan cenderamata kepada pemimpin-pemimpin UMNO yang lampau seperti Tan Sri Fatimah Hashim, Tun Hussein Onn, Toh Puan Rahah, Toh Puan Suhaila dan juga kepada Tunku. Malam Hari Wanita yang ke-40 itu telah diserikan dengan berbagai-bagai aturcara yang telah mendapat sambutan yang hangat sekali. Tunku sendiri telah menyatakan kepada saya tentang perasaan beliau yang terharu dan itu telah membawa nostalgia kepada beliau semasa beliau aktif dalam politik dan menjelajah ke seluruh negara untuk menemui rakyat.

Saya gembira kerana Pergerakan Wanita UMNO telah mengambil keputusan yang bijak dengan mengundang Tunku ke Hari Wanita yang ke-40 itu kerana dengan keputusan itu telah menunjukkan kepada umum yang wanita UMNO juga mahukan perpaduan. Semenjak UMNO Lama diharamkan ramai pemimpin-pemimpin wanita yang berkaliber telah meninggalkan Pergerakan Wanita UMNO. Ini disebabkan berlainan pendapat dan telah merugikan

WANITA kerana pergerakan WANITA adalah dianggap sebagai sayap kanan kepada UMNO seperti juga Pergerakan Pemuda UMNO. Sewaktu pergerakan Pemuda dan Wanita UMNO menemui Tunku satu-satunya topik yang dikatakan oleh Tunku ialah tentang pemilihan Ketua Pemuda dan Ketua Wanita. Tunku berpendapat bahawa kedua-dua jawatan itu ada baiknya dipilih oleh perwakilan dan tidak dilantik. Secara ini dapatlah kedua-dua pergerakan memberi sambutan yang positif kepada UMNO tetapi jika mereka ini dilantik mereka tidak mungkin begitu berani untuk menyuarakan pendapat-pendapat mereka kepada pucuk pimpinan parti. Sementara itu saya difahamkan iaitu Pergerakan Pemuda dan Pergerakan Wanita ada mengirim surat kepada Tunku merakamkan terima kasih mereka kerana Tunku sudi berbincang dengan mereka untuk mencari jalan berdamai dan bersatu semula kerana perpecahan hanya akan merugikan orang-orang Melayu sendiri. Saya berharap dan yakin ini adalah juga harapan orang-orang Melayu keseluruhannya, agar Pergerakan Wanita dan Pemuda dapat mengambil peranan yang lebih aktif dan gigih lagi untuk menyatukan orang-orang Melayu dengan tidak meneruskan caci-mencaci atau mencari kesalahan pihak pembangkang kerana ini hanya akan merenggangkan lagi silaturrahim di antara pihak-pihak yang bersengketa dan membawa kepada jalan yang buntu. Saya juga merayu kepada pihak yang menentang UMNO supaya sama-sama mencari jalan untuk bersatu semula kerana mereka adalah dari rumpun yang sama. Saya percaya Dato' Rafidah Aziz sebagai Ketua Pergerakan Wanita dan Majlis Tertinggi UMNO akan menyuarakan pandangan dan pendapat beliau tentang pentingnya perpaduan yang mesti bermula dengan perpaduan

orang-orang Melayu sendiri. Saya menaruh kepercayaan kepada Dato' Seri Rafidah dalam hal ini kerana kewibawaan beliau yang telah ditunjukkan selama ini.



Gambar menunjukkan Dato' Napsiah Omar sedang cuba menolong YTM Tunku Abdul Rahman sesudah tamat berlangsungnya HARI WANITA yang ke-40 sambil diperhatikan oleh YAB Dato' Seri Dr. Mahathir Mohamad.

USAHA SAYA YANG TERAKHIR

Dalam usaha saya menyatukan semula pihak-pihak yang berpecah sesudah Pilihanraya Umum diadakan baru-baru ini, saya telah menulis surat kepada Tok Mat untuk memberi tahniah dan syabas kerana kemenangan dan perlantikan semula beliau sebagai Menteri Penerangan.

Beberapa hari sesudah pilihanraya, negara kita telah didatangi oleh tetamu khas dari Afrika Selatan. Beliau adalah Nelson Mandela, seorang pejuang kulit hitam yang menentang dasar Apartheid di negaranya dengan begitu lantang sehingga beliau dipenjara selama 33 tahun. Sungguhpun, beliau merengkok dalam tahanan selama lebih suku abad (sekarang beliau berumur 72 tahun) semangat beliau untuk membebaskan bangsanya daripada dasar Apartheid tidak pernah luntur. Ketika beliau dipenjara juga sokongan kaum-

nya yang berada di luar tidak pernah berkurangan. Ketika Afrika Selatan mendapat Presiden baru F.W. de Klerk, yang agak bersikap sedikit liberal ke atas dasar Apartheid, Mandela dibebaskan daripada tahanan. Lawatan-lawatan Mandela ke negara-negara yang anti-apartheid adalah untuk mendapatkan sokongan moral dan material yang berterusan daripada negara-negara tersebut termasuk Malaysia.

Barang kali, ramai di antara pembaca yang tidak tahu atau tidak ingat langsung tentang cerita bagaimana negara kita terlibat dan menjadi penyokong yang terkuat sekali menentang dasar Apartheid itu - ketika itu dan juga sekarang ini.

Penglibatan Malaysia (ketika itu Malaya) bermula pada tahun 1961 ketika negara kita baru sahaja diterima masuk ke dalam Negara-negara Komonwel. Ketika itu, YTM Tunku Abdul Rahman Putra menjadi Perdana Menteri. Beberapa hari sebelum Persidangan itu dimulakan di London, satu pembunuhan beramai-ramai berlaku di Sharpevilel, Afrika Selatan di mana orang kulit putih telah menembak ramai orang-orang kulit hitam. Apabila Tunku mendapat tahu tentang pembunuhan yang kejam itu, Tunku telah membawa isu tersebut ke Persidangan itu sungguhpun ianya tidak ada dalam agenda mesyuarat. Tunku telah membuat bantahan yang sekeras-kerasnya tentang Pembunuhan itu dan juga mengenai dasar Apartheid negara itu. Apabila Menteri Luar Negara itu enggan bertolak ansur, maka Tunku dengan beraninya mendesak supaya Afrika Selatan disingkir daripada menjadi anggota Negara-negara Komonwel dan seterusnya Tunku keluar dari bilik persidangan. Tindakan Tunku itu telah memeranjatkan wakil-wakil negara yang menghadiri persidangan tersebut. Berita mengenai

keberanian Tunku itu telah dimuatkan sebagai tajuk berita utama di beberapa akhbar terbesar di banyak negara, setelah berita itu dicium oleh pemberita-pemberita. Bermula daripada peristiwa itulah, Malaya mula terkenal di seluruh dunia lebih-lebih lagi negara-negara yang mempunyai penduduk kulit hitam. Dengan tindakan Tunku yang berani dan tegas itu beliau mula disegani dan dihormati. Ekoran daripada tindakan Tunku itu juga, Afrika Selatan telah dipecat daripada menjadi anggota Negara-negara Komenwel.

Kunjungan Mandela ke negara ini baru-baru ini, segara mengingatkan saya betapa eloknya jika pemimpin kulit hitam itu menghadap Tunku sebagai 'courtesy call'. Sudah tentu Mandela tidak akan menolak peluang itu dan Tunku juga saya percaya akan berterima kasih kepada pucuk pimpinan UMNO kerana beliau masih diingati dan memberi peluang untuk Mandela menemuinya. Ini kerana Tunkulah orang yang pertama membawa dasar Apartheid ke pengetahuan dunia. Saya pasti sudah tentu Tunku sedar bahawa dasar Apartheid itu kini sudah longgar dan semakin terancam. Tunku juga tentunya berasa senang hati kerana dapat mendengar atau melihat perubahan yang sedang dilakukan untuk menjayakan perjuangan itu ketika beliau masih ada.

Saya tidak mendapat apa-apa jawapan kepada cadangan saya itu. Barangkali Mandela mempunyai agenda yang ketat kerana beliau berada di sini hanya beberapa hari sahaja. Walau bagaimanapun kita mesti berpuas hati kerana Mandela sebenarnya tidak lupa jasa-jasa Tunku dan Dr. Mahathir kepada negara beliau. Mandela telah membuat kenyataan kepada akhbar-akhbar tentang terhutang budi kepada negara kita, Tunku dan Dr. Mahathir kerana penglibatan dan

sokongan ke atas perjuangan beliau itu. Ketika beliau berucap di Stadium Negara, di mana saya juga ada bersama. Mandela lagi sekali menyatakan penghargaan negaranya kepada negara kita dan kedua-dua tokoh itu, Dr. Mahathir juga dalam ucapannya telah memuji peranan Tunku pada masa lalu bersabit dengan Apartheid. Inilah yang kita harap-harapkan untuk menuju kepada perpaduan.

Saya sangat gembira mendengar ucapan Dr. Mahathir yang memuji-muji Tunku di hadapan beribu-ribu orang yang datang pada hari itu. Ucapan Dr. Mahathir itu disambut dengan tepukan gemuroh, menunjukkan mereka juga merestui Dr. Mahathir dan Tunku berbaik-baik semula. Lagipun, pilihanraya sudah selesai. Parti UMNO dan Barisan Nasional sudah mendapat kemenangan selain negeri Kelantan. Tunku juga telah menyatakan yang beliau tidak mahu lagi terlibat dalam pilihanraya atau politik. Oleh itu, biarlah kita lupakan apa yang telah berlaku walaupun Tunku berada di pihak parti pembangkang.

Tambahan pula, Dr. Mahathir telah dapat meneruskan perjuangan Tunku memerangi Apartheid secara begitu tegas dan bersungguh-sungguh. Mungkin orang sudah lupa kepada perjuangan Tunku kerana beliau telah mengundurkan diri begitu lama daripada Kerajaan. Namun Perdana Menteri kita, Dr. Mahathir yang terkenal dengan kelantangan dan ketegasan beliau mengeluarkan pendapat akan mudah saja menarik orang kepada idea-ideanya.

Saya sungguh kagum dengan perjuangan Mandela untuk membebaskan negaranya daripada dasar Apartheid yang menekan bangsanya sungguhpun orang kulit hitam lebih ramai penduduknya jika dibandingkan dengan orang

kulit putih. Kekaguman saya ini sama seperti kekaguman saya terhadap Tunku yang telah membebaskan negara kita daripada penjajahan British dan Dr. Mahathir kerana kelantangan beliau menonjolkan keupayaan negara kita di mata dunia.

Saya sungguh bernasib baik kerana dapat menemui Mandela ketika beliau melawat ke Kementerian Luar Negeri. Dato' Abu Hassan Omar dengan baik hati telah memperkenalkan saya kepada pemimpin kulit hitam itu.


HAPPY BIRTHDAY
TO
DR. TULIE



Penulis bergambar bersama-sama dengan keluarga beliau apabila keluar-ganya mengadakan satu jamuan untuk menyambut hari jadi penulis baru-baru ini.



Gambar menunjukkan penulis bersama-sama dengan YTM Tunku Abdul Rahman di Sanatorium Wiedemann, Munich, seketika Tunku berada di sana untuk mendapatkan rawatan beberapa tahun dahulu.



APA ORANG LAIN KATA TENTANG USAHA-USAHA SAYA

Apabila terbuka rahsia bahawa saya telah berjaya membawa kedua pemimpin agung Melayu iaitu YTM Tunku Abdul Rahman Putra Al-Haj dan Dato' Seri Dr. Mahathir Mohamad maka saya dapat ada reaksi orang ramai yang tidak menggalakkan atau berbeza. Bukan sekali-kali saya hendak mereka berterima kasih kepada apa yang telah dibuat tetapi apa yang penting ialah kedua-dua pemimpin itu telah dapat ditemukan sesudah saya berusaha semenjak tahun 1987 lagi. Untuk tujuan itu, selain daripada bertemu muka dengan kedua pemimpin tersebut, saya telah menulis berpuluhan surat supaya berdamai dan maaf ber-

maafan dan lupakan apa yang telah lalu. Saya dengan hati yang ikhlas dan dengan tidak merasa takut atau khuatir telah memberi sebab-sebab mengapa mereka berdua mesti pentingkan perpaduan, lebih-lebih lagi saya dapat percaya mereka tidak begitu serious seperti yang disebut-sebut dalam surat khabar dan orang ramai. Sebenarnya ia berpuncak dari surat yang tersibar yang ditulis oleh Dr. Mahathir kepada Tunku sesudah pergaduhan kaum pada 13 Mei, 1969. Tetapi Dato' Seri Dr. Mahathir telah merendahkan dirinya dengan meminta maaf dari Tunku di satu perhimpunan MCA di Kuala Lumpur. Selepas itu kedua pemimpin Melayu itu telah berbaik-baik tetapi persahabatan mereka menjadi kabur semula apabila Tunku nampak menyebelahi Tengku Razaleigh apabila Tengku Razaleigh kalah kepada Dato' Musa dalam pertandingan untuk mendapatkan kerusi nombor dua dalam parti UMNO lama. Sungguhpun begitu disebabkan Tunku tidak mahu perpecahan berlaku di antara orang-orang Melayu dan yang akan membawa kepada kehancuran UMNO, maka Tunku sanggup menerima rayuan saya supaya menolong Dr. Mahathir dengan meminta Tengku Razaleigh supaya menarik diri dari bertanding jawatan Presiden Parti pada April 27, 1987.

Ada beberapa orang pemimpin UMNO Baru yang telah mengucapkan tahniah kepada saya di atas kejayaan saya itu. Ada pula yang tidak kisah langsung dan ada pula yang tidak percaya kepada apa yang saya lakukan, ada juga yang merasa iri hati kerana mereka cuba buat tetapi tak berjaya dan lain-lain reaksi lagi yang dapat saya perhatikan.

Tetapi apa yang mengusik hati saya ialah apabila ada beberapa sahabat saya berbangsa Cina yang telah datang ke pejabat saya dan meminta buku lawatan bagi mereka

menulis dalam buku tersebut. Disebabkan kandungan dan kata-kata yang dituliskan itu sangat memberi erti, maka saya telah meminta kebenaran dari mereka untuk saya introducekan message mereka itu dalam buku saya ini, dan saya harap sidang pembaca akan dapat menghayatinya.

Kepada diri saya, pihak pembaca tidak payah merenungkan lagi tentang apa yang sebenar yang saya cuba usahakan ini iaitu tidak lain dan tidak bukan mencari pendamaian dan perpaduan di antara pemimpin kita yang tidak bersehaluan. Perpaduan di antara mereka ini lebih-lebih lagi yang berkuasa sangat penting sekali kerana jika tidak negara akan kucar-kacir dan pendudukannya pula tidak akan lekap mata memikirkan masa depan anak cucu mereka yang tersayang. Jika saya ada kepentingan ataupun telah diupah sudah tentu saya akan memihak kepada satu kumpulan sahaja, dan seterusnya saya tidak akan lakukan apa yang telah saya tunjukan kepada umum. Sebaliknya saya telah berusaha untuk merapatkan mereka dengan melupakan segala risiko yang mungkin timbul di waktu itu.

Suka juga saya menerangkan di sini iaitu perkenalan saya dengan kedua pemimpin Agung Melayu itu bermula bertahun-tahun yang lalu. Semasa saya bersekolah lagi saya telah mula kagum dengan kepintaran Tunku untuk mencapai kemerdekaan tanahair dari British dengan tidak menumpahkan darah. Beliau juga seorang yang mempunyai visi yang jauh. Apabila beliau membuat keputusan untuk membina Stadium Merdeka umpamanya, beliau telah dikritik dengan begitu rupa kerana kata mereka Tunku membazirkan wang rakyat. Tetapi jelas kepada kita bahawa stadium tersebut tidak mencukupi tempat duduk sekarang ini. Perkara ini juga telah diakui oleh Dr. Mahathir dalam ucapan beliau

tidak lama dahulu bahawa Tunku mempunyai visi. Ada beberapa projek lagi yang Tunku bina pada ketika itu yang mendapat kritikan tetapi sekarang semua projek-projek tersebut sangat berguna kepada negara dan rakyat jelata. Tentang keadaan ekonomi pula Tunku telah dikecam kerana di masa beliau dahulu beliau tidak membuat apa-apa untuk menolong kaum bumiputra atau orang Melayu meninggikan taraf hidup mereka. Apa yang kita mungkin lupa ialah pada zaman Tunku itu Kerajaan tidak ada wang. Lagipun negara baru sahaja mencapai kemerdekaan dari orang kulit putih.

Selain dari itu orang-orang yang bijak pandai pun tidak ada melainkan guru-guru sekolah dan oleh itu Tunku terpaksa memujuk mereka supaya mereka masuk dalam kerajaan untuk menolong beliau untuk mentadbirkan negara. Juga kita mesti ingat bahawa komunis sedang bermaharajalela dan kerajaan terpaksa menggunakan banyak wang untuk menjaga pertahanan negara. Dalam pada itu pula negara jiran kita yang terdekat iaitu Indonesia telah melancarkan dasar Confrontation mereka terhadap Malaysia dan Philipina pula mengambil kesempatan itu untuk menuntut Sabah untuk mereka.

Jadi memandangkan kepada fakta-fakta di atas Malaysia di bawah pemerintahan Tunku tidak dapat bergerak maju seperti sekarang ini.

Apabila Dr. Mahathir mengambil alih taju Kerajaan pada tahun 1981 dari Tun Hussein Onn, keadaan ekonomi dunia dan negara adalah baik. Negara senang dapat pinjaman dari World Bank dan lain-lain kerana prestasi negara kita sangat memuaskan dan hutang negara tidak pernah yang tidak dibayar apabila sampai masanya. Kerajaan pula ditadbirkan oleh orang-orang yang berpengalaman dan ber-

pelajaran tinggi. Negara juga tidak menghadapi tentangan dari luar dan penduduk-penduduknya bolih dikatakan dalam kehidupan yang mewah. Sungguhpun masanya berlainan tetapi ada juga persamaan di antara kedua pemimpin Melayu yang datang dari negeri yang sama. Dr. Mahathir telah membuat dan membawa banyak perubahan semenjak beliau menjadi Perdana Menteri. Projek-projek yang memakan perbelanjaan berjuta-juta ringgit telah dikecam hebat oleh pihak pembangkang, tetapi disebabkan beliau mempunyai pandangan yang jauh beliau teruskan perlaksanaan projek-projek tersebut. Satu dari projek yang terbesar ialah projek ‘Proton Saga’. Apabila beliau membuat announcement tentang projek itu ramai orang yang mengatakan “The project was doom to failure before it could start”. Tetapi sekarang projek itu telah menunjukkan kejayaan yang sangat menggalakkan. Pada tahun lepas Proton Saga telah memenangi 2 gold awards dan satu silver. Dan pada tahun ini pula ia lagi sekali memenangi 2 gold awards. Setelah compete dengan kereta-kereta buatan negara-negara lain seluruh dunia dengan dasar-dasarnya yang membina. Perlantikan beliau sebagai penggerusi Anti Dadah di Vienna, kejayaan negara mengadakan Komanwel Meeting di Kuala Lumpur yang juga dihadiri oleh Baginda Elizabeth II dan seterusnya kejayaan negara di bawah pimpinan Dr. Mahathir menganjurkan Persidangan G-15 dengan terang sekali menunjukkan kewibawaan beliau sebagai seorang pemimpin Asia yang terkemuka di masa ini.

Oleh itu kita semua yang cintakan keamanan dan perpaduan mestilah bergantung bahu untuk menyatukan mereka ini dan jangan dibiarkan keadaan ini berterusan. Kedua-dua pemimpin ini telah berjasa kepada negara yang dicintai dan

oleh itu adalah tanggungjawab kita bersama untuk mengujudkan persefahaman yang kukuh yang membawa kepada perpaduan. Lagipun baru-baru ini Tunku telah memberitahu orang ramai bahawa beliau tidak lagi mahu terlihat dalam pilihanraya. Ini bermakna yang Tunku mahu berihat seraya melupakan apa yang telah lalu. Di kala inilah patut sekali pemimpin-pemimpin UMNO memulakan mengambil kesempatan ini untuk berbaik-baik dengan beliau biarpun beliau belum lagi menyatakan yang beliau tidak lagi menjadi ahli S.46. Oleh itu saya merasa terkilan benar kerana Tunku tidak dijemput ke Perhimpunan Agung UMNO pada bulan ini di atas sebab beliau menyebelahi pembangkang semasa diadakan pilihanraya.



Gambar yang diambil pada 2 November '90 menunjukkan Dato' Abu Hassan Omar sedang memperkenalkan penulis kepada Nelson Mandela sewaktu beliau melawat Malaysia baru-baru ini. Gambar ini dirakamkan di Kementerian Luar Negeri. Yang memerhati di belakang ialah Dato' Dr. Abdullah Fadzil Che Wan, Timbalan Menteri Luar Negeri.



Gambar menunjukkan orang-orang Madrasah (surau) Ampang Jaya sedang menikmati juadah sesudah membaca Yasin dan doa selamat untuk kepentingan dan perpaduan orang-orang Melayu. Gambar ini yang diambil di rumah penulis adalah satu-satunya perjumpaan orang-orang surau yang dijemput ke rumah penulis untuk bersama-sama meminta doa ke hadrat Illahi supaya orang Melayu tidak berpecah.

LAMPIRAN

SURAT-SURAT.

Cuma beberapa pucuk surat sahaja di antara sejumlah yang diterima disiarkan di sini.

(Isi surat adalah seperti asal, tidak ada dilakukan perubahan hendak memilihara keaslian).

Surat 1.

Idris Tulis seorang yang penuh dedikasi, keikhlasan dan bersungguh-sungguh di dalam menyatukan orang Melayu ketika berbagai pihak bersengketa akibat fahaman politik masing-masing. Hati sanubarinya patut difahami barulah diketahui niat suci beliau itu.

Semoga Allah memberkati setiap niat suci yang beliau niat dan curahkan.

Rahim Rasah

Setiausaha Sulit Tengku Ahmad Ridhauddin.

Ministry Of Defence K.L.

15 November, 1989.

Surat 2.

Saudara Idris,

Saya dengan ikhlas merakamkan hati suci saudara Idris untuk memperjuangkan dan mencapai matlamat bagi memperbaiki nasib orang Melayu terutamanya dalam bidang ekonomi dan persatuan politik orang Melayu dengan secara practical.

Moga-moga Tuhan izinkan dan memberi pertolongan atas cita-cita dan "effort", saudara itu serta juga masyarakat akan memberi "recognition" atas usaha, penat-lelah dan kebijaksanaan (skill) saudara untuk mencari jalan penyelesaian terhadap satu-satu masalah terutamanya dalam segi salah faham antara pihak-pihak.

Dato' Ismail Ambia

Duta Malaysia Ke Perancis.

28hb. November, 1989

Surat 3.

My dear Idris,

Since primary school to secondary education in V.I I have known you to be a student of above average intelligence. Your business acumen and personal relations with people far exceeded my expectations especially when I know you as a shy boy in the Primary.

It's great to know that you have managed to do the things which most politicians find hard to even start to bring about the close link between Tunku (who was upset over the deregistiation of old UMNO in 1988) and the new UMNO youth led by Dato' Najib and new UMNO Wanita led by Dato' Napsiah Omar, and finally culminating to the close meeting between Tunku and the Prime Minister, Dato' (Dr.) Mahathir Mohamad. Hopefully, such rapport between such leaders will bring about the Malay unity. You have started the ball rolling - that's most important. The rest is for others to gather momentum while you can assist to further the unity cause. Believe me, Malay unity is your first step; it could channel and affect the unity of all Malaysians. For such a commendable effort, you are Malaysia's "Henry Kissinger" peace-maker.

It is said, blessed are the peace-makers for they shall be called the children of God.

Since involving myself with the Mahsuri film - in the preview and promotion of it out of curiosity and friendship - I have learnt to appreciate the love of those participating toward the Tunku and the history of Mahsuri. It seemed to be a forging force of unity among even strangers. I have also noticed that despite the recession of two worst years 1987 and 1988 you had the resilience to hold on your business through your strong faith in God and prayer. I also prayed for your endurance and prosperity and whatever you had requested me to do as a church leader.

Surely, God has brought to pass success in your business, family, friendship with your fellow-beings. Most important of all, God has made you a stronger and humble man to cope with greater things to come.

My sincere prayers for your future happiness and success.

Written Sincerely and Affectionately

Lim Teong Keat (Anthony).

Surat 4.

Dear Idris,

Myself and on behalf of all Malaysian, wish to thank you for your historic role in arranging the meeting between Y.B. Dato' Seri and Y.T.M. Tunku, Malaysian history will enter a new era. An era of renewed hope for Malay unity and strength of UMNO. As such, this development will bring tremendous impact into all walks of life of all Malaysian. Syabas! Your effort is worth billions of dollars considering the far reaching consequences on the lives of every Malaysian. You have paved the way. It's for to leaders to walk - the path of UNITY.

5.45 p.m.

3 Disember, 1989.

Dr. Lau Ban Tin.

Surat 5.

DEAR IDRIS,

THANK YOU FOR EVERYTHING - SEORANG PEJUANG BANGSA YANG TULIN. SENTIASA BERJUANG UNTUK BANGSA MELAYU DAN PERPADUAN BANGSA. SEORANG YANG SETIA KEPADA KAWAN DAN SENTIASA BERJUANG UNTUK KEADILAN.

(TENGKU ISKANDAR SHAH)

Surat 6.

Saudara Idris,


Saya berkenalan dengan beliau semenjak di bangku sekolah. Encik Idris banyak berjuang kepada UMNO dan bangsa Melayu, dan menyatukan orang-orang yang berpecah-belah. Saya ucap syabas kepada usaha-usaha saudara kerana yang sentiasa memberi kepentingan, negara, bangsa dan agama. Tidak ramai orang yang sanggup berbuat seperti yang dilakukan oleh saudara kerana ini adalah satu sumbangan yang amat besar ertiannya kepada negara dan bangsa Melayu.

Saya berdoa agar saudara akan terus memperjuangkan nasib bangsa supaya berdiri sama tinggi dan duduk sama rendah dengan bangsa-bangsa lain di negara yang tercinta ini.

Sebagai rakyat Selangor saya berasa megah kerana seorang anak Selangor telah berjaya menyatukan dua orang pemimpin negara yang telah banyak berjasa supaya mereka bersatu semula dan melupakan apa-apa juga perselisihan di antara mereka berdua.

Di atas jasa saudara itu tidak akan dilupakan oleh rakyat khususnya orang-orang Melayu. Semoga Allah lanjutkan usia saudara Idris Tulis.

TENGKU ISMAIL SHAH,
Y.A.M. TENGKU BESAR PUTRA,
SELANGOR DARUL EHSAN.
11hb. Disember, 1989.



Gambar ini diambil di kediaman YTM Tunku Abdul Rahman Putra Al-Haj sewaktu penulis menghadap YTM Tunku sehari sesudah PBS menarik diri dari menjadi ahli Barisan Nasional. Gambar menunjukkan penulis bertanya kepada YTM Tunku apa akan jadi kepada Sabah apabila negeri itu tidak lagi berada dalam Barisan Nasional.

HARAPAN SAYA.....

Adalah menjadi harapan saya kandungan buku ini telah memberi manfaat kepada setiap pembaca kerana ianya dibukukan untuk menyedari orang-orang Melayu bahawa PERPADUAN itu adalah penting dan tunjang KEKUATAN. Di mana-mana dalam buku ini saya telah kaitkan dengan PERPADUAN kerana dengan PERPADUAN sahajalah kita boleh memandang ke hadapan dengan penuh keyakinan untuk menghadapi masa depan kita. Bercakap tentang PERPADUAN orang-orang Melayu maka teringatlah saya kepada beberapa pesanan Allahyarham Dato' Onn bin Jaafar iaitu Yang DiPertua UMNO yang pertama, "... masa hadapan orang Melayu akan gelap dan akan bertambah gelap jika tidak ada lagi PERSEFAHAMAN dan PERPADUAN di kalangan orang Melayu seluruhnya. Saya bimbang perpecahan orang

Melayu akan melemahkan kedudukan orang Melayu, serta kedudukan ekonominya." Hasrat Dato' Onn yang paling besar ialah beliau ingin melihat bangsa Melayu bersatu padu terus menerus dan menyedari serta menginsafi kedudukan politik tanah air yang sebenarnya dengan mengkaji sejarah yang lalu, meneliti apa yang sebenarnya dan waspada serta berhati-hati terhadap apa yang akan berlaku pada bangsa Melayu seluruhnya.

Saya tidaklah cuba mengajar itik berenang kerana sidang pembaca lebih-lebih lagi yang lebih tua dari saya tetapi diharapkn mereka inilah yang akan dapat menyedarkan pemimpin-pemimpin yang masih muda yang akan mewarisi anak cucu kita. Jika dikaji dengan mendalam persengketaan yang berlaku sekarang tidaklah begitu serious yang tidak boleh diperbetulkan asalkan kita benar-benar mahukan PERPADUAN. Apa yang menyebabkan perpecahan orang Melayu beberapa tahun yang lalu sehingga sekarang adalah berpunca dari ideology yang berlainan dan juga perasaan "tamak" kerana ada pihak-pihak yang tidak sanggup menunggu giliran mereka untuk naik. Saya tidak berniat menujukan pandangan saya ini kepada sesiapa pun tetapi di sinilah selalunya terdapat kelemahan orang Melayu.

Orang Melayu telah juga diingatkan oleh Dato' Onn, "... dari segala seginya orang Melayulah yang lebih banyak memberi daripada menerima. Ini disebabkan kelembutan hati orang Melayu." YTM Tunku Abdul Rahman Putra pula dalam ucapan selaku Yang diPertua Agong UMNO pernah berkata, "... tetapi kita mestilah ingat! Sekiranya kita hendak timbang menimbang di atas perasaan hawa nafsu bangsa-bangsa asing, apakah yang akan jadi kepada bangsa Melayu kita."

Dato' Onn berkata lagi tentang PERPADUAN, "Nasib bangsa Melayu kita hanyalah akan dapat diperkenalkan dengan kesatuan hati di antara kita dan marilah kita bersatu dan berusaha bagi faedah bangsa kita dan marilah kita bekerjasama dan menyamakan perusahaan kita itu bagi melayakan diri kita menjadi satu bangsa yang besar. Bersatulah sebagaimana belum pernah kita bersatu dahulu dan berusaha lah sebagaimana belum pernah kita berusaha. Dengan bersatu itu sahaja akan dapat kita menghadap masa yang akan datang dengan harapan akan berjaya cita-cita kita itu...."

Banyak lagi kata-kata yang disebutkan oleh pemimpin kita seperti Allahyarham Tun Abdul Razak, Allahyarham Tun Hussein Onn, Dato' Seri Dr. Mahathir dan Dr. Ghafar Baba tetapi disebabkan kependekan masa dan ruang saya minta maaf tidak dapat mempamirkannya di sini. Tetapi apa yang kita tahu tujuan dan objectifnya sama iaitu suka melihat bangsa Melayu bersatu dan berpadu untuk masa depan mereka dan anak cucu mereka. Oleh itu marilah kita renungkan bersama dengan amanah-amanah yang itinggalkan oleh mereka ini dan menukar haluan kita kepada membantu sebelum kita terlambat.

Sekarang izinkan pula saya menyentuh sedikit tentang pertandingan yang akan berlaku dan minggu ini dalam Perhimpunan Agong UMNO untuk memilih 3 orang Naib Presiden parti yang besar kemungkinan akan mengambil tempat yang akan dikosongkan oleh pemimpin-pemimpin kita yang ada sekarang. Saya berharap sangat supaya sesiapa yang akan menang menduduki tempat-tempat tersebut akan menggunakan kedudukan itu untuk menyatupadukan orang-orang Melayu yang berada dalam kem yang berasingan.

Mereka mestilah komited dengan hakikat mereka untuk memelihara kepentingan bangsanya dan tidak takut-takut menyuarakan apa yang mereka nampak tidak berjalan betul. Adalah juga diharapkan supaya di masa hadapan POLITIK WANG tidak akan terdengar lagi kerana ini akan hanya merosakan perpaduan. Bukan itu sahaja dengan menggunakan wang hanya orang yang mampu sahaja akan berjaya naik dan orang yang tidak mempunyai kedudukan kewangan yang kukuh akan gagal biarpun mereka yang kalah lebih berpotensi dan berkaliber.

Saya juga menyarankan di sini buat dikaji oleh pemimpin kita sekarang dan buat masa hadapan agar dasar atau cara pemimpin dipilih sekarang dengan sistem quota umpamanya akan merugikan bangsa kita sendiri kerana biarpun dua orang pemimpin yang berkaliber dari satu negeri boleh ditunjukkan tetapi disebabkan sistem quota maka hanya seorang sahaja yang layak dikemukakan. Apakah cara ini akan menguntungkan bangsa kita?

Saya pula menyokong supaya Ketua Pemuda dan Ketua Wanita cadangan Perdana Menteri supaya kedua jawatan tersebut dipertandingan di masa akan datang. Inilah satu-satunya perkara yang dibangkitkan oleh YTM Tunku apabila Pergerakan Pemuda dan Wanita menemui Tunku pada tahun lalu. Cara ini dapatlah mereka membantu UMNO dengan lebih berkesan kerana mereka boleh menjalankan tugas seperti "watch dog".

Saya mohon maaf daripada sidang pembaca dan ahli-ahli politik dan pemimpin-pemimpin Melayu yang ada sekarang sama ada dalam ataupun di luar Kerajaan supaya tidak kecil hati dengan saranan saya ini kerana saya menyuarakannya untuk kebaikan kita bersama dan saya

tidak ada kepentingan apa-apa selain dari ingin melihat bangsaku bersatupadu dan dapat berdiri sama tinggi dan duduk sama rendah di negara kita yang disayangi ini.

Saya harap dan berdoa iaitu apa yang telah dapat saya usahakan sebagai yang disebutkan dalam buku ini semenjak April 1987 untuk mencari PERPADUAN Melayu akan sedikit sebanyak memberi kesedaran kepada kita umat Melayu. Saya sebenarnya ada juga bercadang hendak menemui semua Menteri Besar dan Ketua Menteri Melayu dan juga ahli-ahli Majlis Kerja Tertinggi UMNO untuk berbincang dengan mereka dan menolong saya dalam usaha-usaha saya itu yang boleh membawa kepada Perpaduan. Malangnya saya tidak dapat berbuat begitu kerana saya tidak mempunyai keupayaan dalam segi wang ringgit. Namun, saya bersyukur ke hadrat ilahi kerana biarpun saya menghadapi tekanan yang begitu berat serta tanggungjawab saya kepada keluarga yang tidak boleh diabaikan dapat juga saya menjalankan tugas-tugas dan usaha-usaha saya yang murni itu dengan kemampuan yang ada pada saya.

*

Idris Tulis
Lot 1.05-1.07, Tkt Bawah
Wisma Central
Jalan Ampang
50450 Kuala Lumpur
Tel : 2614754/219270

9hb November 1989

Pengarang Berita
UTUSAN MELAYU (M) BERHAD
46M, Jalan Chan Sow Lin
55200 KUALA LUMPUR

U.P : Encik Khalid Mohamed

Tuan,

Saya bagi pihak YIM Tunku Abdul Rahman Putra sangat merasa duka cita dan menyesali dengan berita muka hadapan suratkhabar Utusan Malaysia keluaran hari ini yang menyebut, "TUNKU NAK JUMPA MAHATHIR". Sungguhpun tujuan berita itu baik tetapi kepala berita itu tidak benar dan ia masih dirahsiakan oleh sebab-sebab tertentu.

Saya sebagai seorang yang sangat maklum dalam hal ini dan juga kenal dan rapat dengan kedua-dua pemimpin ini, berita seperti yang disiarkan itu 'misleading' terutama sekali menyatakan yang YIM Tunku akan menemui Datuk Seri Dr Mahathir Mohamed.

Berita tersebut telah menyinggung perasaan YIM Tunku dan saya percaya YAB Datuk Seri Dr Mahathir juga merasa gelisah tentang berita yang sama. Sepatutnya pemberita daripada suratkhabar yang teragung seperti Utusan Malaysia dan Utusan Melayu mestilah lebih berhati-hati sebelum mengeluarkan apa-apa berita yang akan mengusutkan lagi keadaan. Walhal, kita semua sedang mencari jalan penyelesaian diantara pemimpin-pemimpin yang bertelagah supaya mereka dapat bersatu semula dan dengan itu dapatlah pengikut-pengikutnya bercantum seperti sediakala.


Saya masih ingat iaitu sebelum Datuk Seri Najib pergi mengadap YIM Tunku, Utusan Malaysia juga telah mengeluarkan satu rencana dimana penulis telah menasihatkan Datuk Seri Najib supaya jangan menemui YIM Tunku kerana kata beliau itu akan membuang masa sahaja. Sepatutnya penulis itu mengalu-alukan dan memberi peransang kepada tujuan yang murni yang dibuat oleh Datuk Seri Najib dan ahli-ahli Exconya dan bukan mengapi-apikan Pemuda-pemuda UMNO dan juga orang-orang yang ingin sangat melihat orang-orang Melayu

bersatu. Sebagai suratkhabar yang bertanggungjawab dan saya sebagai pembaca setia suratkhabar tersebut sudah bertahun-tahun lamanya, saya berharap perkara seperti ini tidak berlaku lagi kerana ini bukan sahaja menjelaskan usaha-usaha yang sedang dilakukan untuk merapatkan lagi silatulrahim orang-orang Melayu bermula dari pemimpin-pemimpin tetapi ianya akan menambah perasaan benci antara satu dengan lain. Kepada saya ini adalah satu perbuatan yang keji dan orang-orang yang sengaja mengapi-apikan ini sudah tentu akan menanggung dosa yang amat besar.

Ekoran dari berita di muka hadapan suratkhabar Utusan Malaysia dan Utusan Melayu hari ini bolehkah pihak tuan memuatkan satu pengumuman dalam suratkhabar esuk hari menafikan berita yang tidak benar itu. Ini adalah untuk menjaga imej kedua-dua pemimpin kita yang disegani dan teragung iaitu YAB Datuk Seri Dr Mahathir Mohamad dan YIM Tunku Abdul Rahman Putra Al-haj.

Sekian, terima kasih.

Yang benar,



IDRIS TULUS

s.k. Ketua Pengarang Kumpulan
(U.P : Encik Zainuddin Maidin)



YB Dato' Khalid Abdullah
Pengerusi Eksekutif

YAB Datuk Seri Dr Mahathir Mohamad
Perdana Menteri Malaysia



CETUSAN HATI NURANI RAKYAT

Mingguan Malaysia



JIL 6 • TAHUN KEDUAPELIMA TIGA • PP 94/139

ATAS • 12 NOVEMBER 1989 • 14 KADAR ASWIR 1410

HARGA 60 SEN • SABAH 80 SEN • SARAWAK 70 SEN

Mahathir - Tunku bincang satukan orang Melayu langkah positif

KUALA LUMPUR 11 Nov. — Datuk Sri Dr. Mahathir Mohamad dan Tunku Abdul Rahman Putra berlakar - nukar pendapat mengenai langkah - langkah positif ke arah menyatupadan masyarakat Melayu dalam pertemuan empat mata di sini hari ini.

Pertemuan kira-kira seringah jam di kediaman Tunku bellangung dalam suasana pemersahbaran dan mesra.

Tunku Abdul Rahman merantau kenabarn Perdana Menteri di tepi tanjung tingkat atas sebelum mempersilakannya ke bilik khas. Ketika berselamat, Perdana Menteri telah mersurut tangga Tunku.

Hanya para jurugambar dibenarkan masuk selama beberapa minit untuk merakamkan peristiwa bersejarah itu. Pemberita puak berkumpul di luar pagi kediaman Tunku dengan diawas oleh beberapa orang anggota polis.

Menurut para jurugambar, seisin daripada dua buah kamيرا video, tidak ada orang lain yang berada di bilik tersebut.

Perdana Menteri tiba di kediaman Tunku manakala kereta rasmi mereka pada pulih 11.18 pagi. Dengan senyuman, beliau menunduk lambakan tangan kepada wartawan yang bersidai sepi pagar.

Ketua Penyuatu UMNO, Datuk Sri Najib Tun Razak dan Naib Ketua Wanita UMNO, Datuk Napiah Omar turut mengiringi beliau. Bagaimanapun, kedua-duanya berada di tingkat ba-

wah kediaman Tunku ketika pertemuan itu berlangsung.

Pendara Menteri meninggalkan kediaman Tunku kira-kira pulih 12.05 tengah hari. Datuk Napiah keluar pada pulih 12.18 dilanjut oleh Datuk Najib beberapa meneri kemudian.

Sesauaha Akhbar Pertama Menteri, Encik Jalaluddin Bahaudin yang memberikan maklumat ringkas kepada pihak akbar selepas pertemuan itu membentah bahawa Datuk Najib dan Datuk Napiah hanya menerusi Tunku selepas pertemuan empat mata itu.

Menjawab pertanyaan pemberta, Encik Jalaluddin membentahu beliau yakni Perdana Menteri gembira dengan pertemuan tersebut.

"Perdana Menteri kelihatan gembira dan riang. Saya yakini beliau akan membawa ke penggaluan Majlis Tertinggi UMNO mengenai hasil pertemuan dengan Tunku," katanya.

Ditanya sama ada pertemuan lain akan diatur kemudiannya, Encik Jalaluddin membentahu "Mungkin bila perlu dan sesuai."

Beliau bagaimanapun tidak memberikan bantahan lanjut mengenai pertemuan tersebut.

Sementara itu, Encik Idris Tulus yang merupakan pihak akbar bagi pihak Tunku membentah bahawa pertemuan tersebut adalah mesra dan Tunku sendiri bertanyakan khabar kepada Perdana Menteri.

Katanya, Turku menyambut Datuk Sri Dr. Mahathir dan ketika herdak pulang, Turku mengiringi beliau ke muka pintu.



PERDANA Menteri, Datuk Sri Dr. Mahathir Mohamad mencium tangan Tunku Abdul Rahman Putra setibanya beliau di kediaman rasmi bekas Perdana Menteri di Jalan Putra, Kuala Lumpur pagi semalam.

Tunku akan hadir di sidang UMNO

KUALA LUMPUR 11 Nov. — Penasihat Parti Semangat 46, Tunku Abdul Rahman Putra mengesahkan beliau akan menghadiri majlis persamuan Perhimpunan Agung UMNO minggu depan.

Jurulakap Tunku membentah para pembentuk di sini hari ini, bekas Perdana Menteri itu juga bersempena hadir di majlis persamuan Pergerakan Pemuda dan Wanita UMNO Kharis depan.

